

**Ema San Lucas májuequenehahi eta
máichararacavahi ema Jesucristo,
ticaijare puiti eta
EVANGELIO SEGÚN SAN
LUCAS**

1-3 Némunaruquene nuparape Teófilo, nucajurevi puiti apaesa pecha píti apanavare eta juca néchaqueneanahi nútì. Ichapemurianahi ena vichamuriana tiájuequenehanahi tayéhe eta máichararacavahi ema Viáquenu Jesucristo. Tásicha puiti, nútì apanavare nájuequenehavare. Nucaejarusinahi tamutu eta nájuequenehairahi, taicha tamutuhi nucayasesereru nayehe ena tinecapaequenehanahi, tímahanahi eta apaicape eta táepaniravahi eta máitaresirahi ema Viáquenu. **4** Nútì nuvaraha nímimatichavi apaesa yátupina pecha tamutu eta juca piáravahuanahi.

*Ema ángele macametarapi eta máuchusirayare
ema Juan Tíicachasiricarahiyare*

5 Cape juca viásinequenehi te émarichaha ema Aluresi aquenucahi, réyhi tayéhe eta jena provincia Judea, matiarihihivare ema émana achane, ticaijare Zacarías. Éma, náumurivanahi ena ticaijareana Abías. Eta náematanerepi éna, náechapajirica eta námavahuasana ena achaneana tayéhe eta Templo. Esu mayena ema Zacarías ticaijaruhi Elisabet, mámariequenenihí ésu ema víyarahaini Aarón. **6** Ema maca Zacarías

ésupa esu mayena, tájina náichiravainahini te mamirahu ema Viya. Tamutuhi náitaucha eta mavanairipiana ema Viáquenu. Tacahe, tájina náechajisiequenénahini nayehe ena achaneana. ⁷ Nájinasera nachichainahini, macheruhi esu Elisabet eta suítaresira. Váipavare ticachichanaimahi taicha ichavicanaripahi.

8-10 Te jena sache, náichuhapa ema Zacarías eta masiapirayare tayehe eta Templo te Jerusalén, taicha áñopahi eta masiapirayare. Tacahe, ticátuparácasipa éma. Émapa táetupiacahi eta máematanerepiyarehi máijuchayarehi eta incienso te tainahu eta mesa náijuchirarehi, taicha tacahehi eta nayeherepini ena israelítana. Tacahe, ema Zacarías tisiapapa te tajuhe eta cuarto tacapicahuquenehi, máijuchapa eta incienso. Macarichusera tísapacarehi tisiapa. Ena apamuriana achaneana nanasipa te aneca, tiyujaracanaripa éna. **11** Tiáramicarepa tímerecava ema émana ángele te mamirahu ema Zacarías. Mavaneruhi ema Viáquenu. Titupiharipa ema ángele te vaure tayehe eta mesa náijuchirarehi eta incienso. **12** Tiáramecariñe ema Zacarías eta máimairahi ema ángele. **13** Émasera ema ángele máechajicapa:

—Vahi picupica, Zacarías —máichapa—. Ema Viya masamahi eta piyaseserepihi píti eta mayehe. Puiti esu piyena Elisabet ticachichayare. Juan eta máijareyare ema echichayare. **14** Ichapeyare eta piúrisamu-revayare te máuchucapa ema echichayare. Énaripa ena achaneana, ichapeyareva eta

náurisamurévaya taicha eta máuchusirayare.
 15 Numetacavi: Ema pichichayare, ichapeyare eta macunachacarevayare mayehe ema Viya. Píti, vahi písapaimahi tera eta vino, étaripa eta apamuriana téracareana muracaqueneana. Taicha éma, eta máuchusirayare, mávaháruyarepahi ema Espíritu Santo. 16 Éma pichichayare, éma tétupiricayare eta táurivayare eta napanereruana ena pijaneanana israelítana, tachavirayare eta nasuapirayare ema Viya. 17 Ema maca pichichayare, éma tínapumirauchayarepahi ema Viáquenu. Macutiyare eta máitupajijiasiravaini ema víyarahaini profeta Elías. Ichapeyare eta máitusirayare eta macajimuyasirayare eta nasamureana ena achaneana apaesa tachava eta nasuapiraina ema Viya, tacutei eta nasuapajirraivainihi ena náchucanaveanainihi. Énaripa ena váinarajipanereruana, tisuapajirahianayareva máicha. Mametacavacayare ena achaneana natsecavaipa eta najacapirayare ema Viáquenu —máichapa ema ángele.

18 Tásicha, ema Zacarías majicapapa. Ánipa maca-hehi:

—Páurenusami, vaipa numaitacavaimahi nucachichahini, ésuripa esu nuyena. Ichavicahavipa víti. Váhicha nusuapapajica eta juca vicachichairayarepuca —máichapa.

19 Émasera ema ángele máichavarepa:

—Núti nucaijare Gabriel. Núti mavanerunuhi ema Viya. Nutuparacasivaichuhi eta numetasiraviyare eta juca ecachichairayare. Piúriháine ichapenahini eta piúrisamurevainahini.

20 Puítisera úpaviyare. Eta ecutiarareyare piyehe taicha eta pimasuapiranuhi. Tiámáinucava te táitauchavapa eta juca numetaruvihi, péchajicainavarepa —máichapa ema ángele.

21 Tacahe, ena achaneana nanasiqueneanahi te aneca nacuchaparairicaipaicha ema Zacarías, náramipa eta mayerevaipahicha te tajuhe.

22 Jéhesareinehi, te tiúchucapa ema Zacarías, vaipa máechajicahini. Náimatiacapasera éna, eta máechajisirahi ema Viya te tajuhe. Tisuvereverecapaipahi éma eta mavarairahi máimicutiarachavaca ena achaneana eta yátpirahi masamaquenehi. Úpapaipahi éma.

23 Tacahe, te títauchavapa tamutu eta jena sácheanahi eta matuparacasivahi, tiyanapa ema Zacarías tayehe eta mapena. Nueve caje eta mayerevayarehi eta mamaechajisirayarehi.

24 Tásiba, esu mayena Elisabet, ticajaripa ésu. Váipasera súchuchurecahini te supena. Váhivare sumetajiricahini. Tiámáinucavapa te títauchavayarepa eta cíncocoquenehi caje eta sucajarirahi. **25** Tétavicavahi eta súrisamurevahi eta susamiravahi ésu. Ánipa sucahe:

—Ichape eta ñijapanuiranuhi eñi Viya, tíjara-canuhi eñi nuchichayare. Váipasare nayuna-caimahi ena achaneana eta numacheruvahi —sucuhepa.

Ema ángele macametarapi eta máuchusirayare ema Jesús

26 Tacahe, te sáisiquenepa caje, ema Viya mápechavare mavaneca ema ángele Gabriel tiúcupaica tayehe eta avasare Nazaret, tayehehi

provincia eta Galilea. ²⁷ Máucupauchapa esu amaperu esena ticaijaru María. Ésu, tájina suímatiyahini ema ajaira. Matiarihipasera ema suímayarehi, ema ticaijare José. Téjacaripahi eta natratune. Ésu, mámariéquenéinihi ema víyarahaini rey David. ²⁸ Tacahe, ema ángele máucupauchapa ésu tayehe eta suávihahi. Máichapa ésu:

—Pícharacava, María. Piti manerejiruvihi ema Viya. Tétavicavahi eta piúricacarevayare taicha ichape eta majapanuiravihi éma Viya. Picachuricahi namutu ena apamuriana esenana —máichapa.

²⁹ Ésusera tiáramecainehi eta máechajisirahi ema ángele. Supanerequenehainehi tájahahipuca tacayemahi eta máechajisirahi ema ángele.

³⁰ Émasera ema ángele máichavarepa:

—Vahi picupica, María. Piti manerejiruvihi ema Viya. ³¹ Numetapanavihi puiti eta picajrirayare. Ajairayare ema pichichayare. Jesús eta máijareyare. ³² Tétavicavaya eta napicauchi-rayare ena achaneana taicha Machichayarehi ema Viya. Ichapequeneyare eta aquenucairayare éma taicha ema Viya manacayareva eta mávacureyare aquenucayare. Macutiyarehi eta aquenucairahi ema máchucaini David. ³³ Éma téchayarehi namutu ena pijaneanana israelítana. Máepenacacayare eta aquenucairayare —máichapa ema ángele.

³⁴ Tásicha, esu María, sujicapapa:

—¿Tájahasica táicharacavayare eta juca? Taicha nútì nájinaichaha nímainahini —suíchapa.

³⁵ Émasera ema ángele máichavarepa:

—Picachichayare taicha eta máitupajijasiravahi ema Viya. Timicauchaviyare eta majaraiva, tásicha, tisiapahacavinapa ema Espíritu Santo. Eta tacahe, ema amuya pínaruyare, sántoyare éma, taicha machichayarehi ema Viya. Náimatiyare namutu eta machichairahi ema Viya. ³⁶ Picutiyare esu pijaneana Elisabet, énerichuvare ticajariipahi ésu. Tayanapanehi ichavicaschiccharipahinéni ésu, macheruinihihinéni. Sáisiripasera caje eta sucajarirahi puiti. ³⁷ Taicha ema Viya, tájinaquene máemáituca éma —máichapa ema ángele.

³⁸ Tacahe, esu María sujicapapa:

—Núti ñivanaranauichuhi eñi Viya. Nutiarihi puiti. Ñímahanuinépa eñi, eta ñícharacanuyare te ñivanairipiana —suíchapa ema ángele.

Tacahe, eta masamirahi ema ángele, tiyanapa tichavahi.

Esu María suéjirapanapa esu sujaneana Elisabet

³⁹ Tacahe, te jena sácheana titátájipa esu María tiyana tayehe eta avasarechicha te tataracucujianahi eta márijuecu tayehe eta provincia Judea, suávasahi esu sujaneana Elisabet émapa ema Zacarías. ⁴⁰ Te títecicapapa esu María tayehe eta napenahi, suéchajicapa esu Elisabet. ⁴¹ Te susamapa esu Elisabet eta suahu esu María suéchajisirahi, tiyamuricainehi eta amuya te sujuhe esu Elisabet, enevanepa mávahácahi ésu ema Espíritu Santo. ⁴² Tacahe, téchajicapa muraca esu Elisabet, suíchapa:

—Píti, tétavicavahi eta piúricacarevahi ñicha eñi Viya. Picachuricahavihi vimutu viti esenana.

Éñiripa eñi pichichayare, tétavicavahivare eta ñicunachacarevaya. ⁴³ Nusapihasamipa núti péjirapananuhi piti ñénaviyarehi eñi Náquenu. ⁴⁴ Te nusamapa eta piahu eta péchajisiranuhi, tiyamuricainehi te nujuhe eñi nuchicha, taicha eta tiúrisamuréinehi éñi. ⁴⁵ Tétavicava eta piúricacarevaya píti taicha eta pisuapajiraivahi ñe Viya. Títauchavainapa tamutu eta ñimetarapihi eñi Viáquenu eta piyehe —sucuhepa esu Elisabet.

⁴⁶ Tacahe, esu María sujicapapa:

—Ichapemurihi te náchaneva eta nucunachirahi eñi Viáquenu. ⁴⁷ Taicha tétavicavapa eta táurismureva eta nusamure ñicha eñi Viya Ticatiura-hiquene eta nuyehe. ⁴⁸ Taicha éñi, vahi ñépurunuñihini páurenuhinéni nútisami. Tétavicavahisera eta ñijapanuiranuhi nuti ñivanarahi. Nútipa ñinerejicanuhi, tásiba, ichapenapapuca eta nacapinarunuiraya namutu ena achaneana natiarihiquenehi puiti, énapa ena arajuruanayare. “Tétavicavapa eta súricacarevahi esu María” nacáhénapapuca. ⁴⁹ Tétavicavapa eta ñítupajijiasiravahi eñi Viya, tíjaracanuhi eta nûrvayarehi ñicha. Jéhevare éñi, Sántoquenehi eta ñijare. ⁵⁰ Eta tacaheyare eta ñijapanuirahaviyare puiti, énapa namutu ena arajuruanayare, nácani tipicauchanayare éñi.

⁵¹ Eñi Viya, ñíjaracayare eñi nuchichaya eta ñítupajijiasiravaya ichape. Tásiba, ñicaerajicavacaya ena ticasínavavairicana, énapa ena váinarajipanererueruanahivare. ⁵² Nácani aquenucana nacatianacainapapuca, ñicapaquechavacayarehisera éñi. Nasapihapa ena páureanasamahi, ñinerejiruanaya éna,

ñijupahanayare. ⁵³ Yátupiya eta ñíjarasiravacayare eta táetaviuchiraya eta náuricacarevaya namutu ena ticasíñavanayare ñiyehe. Énasera ena tímijachavanahí tájinahini nácamunuhini, ñicaerajicavacaya namutu.

⁵⁴⁻⁵⁵ Eñi Viya acane tíjaracavahi ñiyehe eñi viáchucaíni Abraham énapa ena ñíamariéqueneana, eta ñíjarasiravacainapa eta táetaviuchiraya eta náuricacarevanaya. Vahi ñémítisicaimahi eñi Viya eta ñéchajiriruvahi ñíjararuvahi. Puiti, eñi nuchichaya tiámayarepahi tamutu eta viúricacarevanaya viti israelítana. Maitavacacayarehi éta —sucalhepa esu María.

⁵⁶ Tásiha, sunasipanapa esu María te supena esu Elisabet. Mapana caje eta suyerevahi. Te táequenepa, tichavavarepa te supena.

Eta máuchusira ema Juan

⁵⁷ Tacalhe, títauchavapa eta sucajera esu Elisabet. Suínacapa ema suchicha. ⁵⁸ Tiyananapa ena sujaneanana énapa ena suchacayapenanahí, náejirapana ésu. Táicha eta nasamairirisirahí eta súrivahi maicha ema Viya eta majapanuirahí ésu. Tiúrisamureanarinehi namutu. ⁵⁹ Tacalhe, te óchoquenepa sache eta máuchusirahí ema amuya, nayanauchapa ena najaneanana, namarcachapanayarehi ema amuya; taicha tacalhehi eta nayeherepihi. Tásiha, navarahapa nanacayarehi eta máijareyarehi Zacarías, mámapicayarehi eta máijare ema máiya. ⁶⁰ Ésusera esu maena ema amuya vahi suvarahahini. Suíchavacapa:

—Juan eta ñíjareyare.

⁶¹ Tásiha, éna nacahepa:

—¿Tájaha tacayema? Namutu ena pijaneanana, nájina ticaijarena eta Juan —nacahepa.

⁶² Tásiha, éna náimicutiarachinapa eta nayaseresirahi ema Zacarías tájahapuca eta máijareyarehi maicha éma. ⁶³ Tacahe, ema Zacarías tiyaseserecapa eta táblamechicha, májuchihayarehi eta máijareyarehi ema machicha. Eta ajureca, ani tacahehi: “Juan eta máijareyare”. Tésenijiricacanarinehi éna taicha eta máijareyarehi ema amuya. ⁶⁴ Tásiha, tíjahúchavapa tichavapa eta máechajisira ema Zacarías. Macunachapa ema Viya eta máurisamurevahi. ⁶⁵ Ichape eta tiáramicarehi nayehe ena natarihiqueneanahi. Nasamairiricavanepa namutu ena távacuanahi eta avasarechichana tayeho eta provincia Judea. Náechajisiropa eta juca nasamaiririruanahi. ⁶⁶ Namutupa napanerequenehahi. Nácani tisamairiricanapahi, tiyaserejiricacanaripa.

Ánipa nacahe:

—¿Cañarihi tacayemaquenehi eta juca máuchusirahi ema amuya? —nacahepa.

Tásiha, ema amuya, tétabicavahi eta majaneasirahi ema Viya eta majurusirapaipahi.

Eta majirarapi ema Zacarías

⁶⁷ Tacahe, eta jena sáchequenehi eta macamarcirahí ema amuya, étaripa eta nanasirahi eta máijareyarehi, téchajicapa ema Zacarías. Macunachaipa ema Viya, taicha mávahácaripa ema Espíritu Santo. Ánipa macahehi:

⁶⁸ —Tétabicavapa eta macunachacareva ema Tata Vicaiyaquene, ema véhiruhi vimutu viti

israelítana. Taicha tijapanuhavihi vimutu viti machaneranahi, ticuchucuhahaviyarehi. ⁶⁹ Tíjaracahaviyarehi puiti ema yátupiqueneyare eta macatiuraivaya, ema manerejiruhi te namuri ena mámariequeneanainihi ema David, ema mavanarainihivare ema Viya. ⁷⁰ Títauchavaipahi eta náechajiruvanahi ena santo profetanaini acane, eta nametacasivanahi me Viya. ⁷¹⁻⁷³ Taicha tacahehi eta matratunehi ema Viya mayehe ema viáchucaíni Abraham. Ema Viya tíjaracahavi eta majapanuiravacayarehi ena viáchucanaveanaini, énapa ena ticachichahaviana, vítipa puiti. Énerichuvare tíjaracavahi eta mamaemitisisiraya eta macatiuchirahaviyare nayehe ena tictatianacahavianahi. ⁷⁴ Ema Cristo manerejiruhi ema Viya, ticatiuchahaviyarehi taicha mamavarairahi vipicahini, nacuijahivaréni ena nahapapicahavihini eta vicaematanesasirayarehi éma. ⁷⁵ Eta mavarahaquenehi tiúriyare eta vítaresirayarehi tamutu sácheana, tájina víchiravaimahi te mamirahu éma.

⁷⁶ Pítiripa, piti nuchicha, píchuarecasivaichuhi mayeheviyare profeta ema Tata Vicaiyaquene taicha píti pínapumirauchayarepahi ema Viáquenu Cristo. ⁷⁷ Pétupiricayarehi eta nasamureana ena achaneana, yátupinapa machaneranayarehi éna. Pímitucayareva nácaicutiaraya eta mavarairahi ema Viya macatiuchavacayare, macaepahairayarehivare eta napecaturana. ⁷⁸⁻⁷⁹ Puítiripa, eta máemunasirahavihi ema Viya, macucupaisinahavihi te anuma ema Machicha. Éma, tímimaticahahavinapa eta majaraiva ema Tata

Vicaiyaquene étapa eta táuriquene achene ticaijuhe mayehe. Máetucarácavacayare eta nasamureana ena ticatisamureanahi, nácani tépenanayarehíni —macahepa ema Zacarías.

⁸⁰ Tacahe, ema amuya eta majurusirahi, tiámavapahi eta masuapajiraivahi mayehe ema Viya. Váhivare étainahini te tajuhe eta avasare eta majurusinehi. Vámahicuruuhahi eta majurusirahi. Tiámainucava te ajairapa, tímerecavapa nayehe ena majaneanana israelítana, tépanavapasera ticametarairu.

2

Eta máuchusira ema Jesús

(Mt 1.18-25)

¹⁻³ Tacahe, te jena áñoanahi cape juca viásinequenehi te émarichaha aquenucahi ema Emperador Augusto, matiarihihivare ema apala achane ticaijare Cirenio, majupahahi ema Augusto. Prefectohi éma, tayehe eta avasareana. Ticaijare Siria eta mávihahi*. Tacahe, te jena sácheana, ema Augusto macavanairipipa nacuchuca eta vantu eta nacatupairayare namutu ena achaneana te avasareana. Tacahe, tiyananapa ena achaneana te návasanapachu te náuchusineana eta nacatupairayarehi. Nasuapayarehi eta vanairipi. Tainapuiruhi censo maicha ema Emperador Augusto.

⁴⁻⁵ Tacahe, tiyanapa ema José. Mámaga esu mayena María. Ticajaripaipa ésu. Tacahe,

* **2:1-3** Te jena año, matiarihivare ema ichapequenehi aquenucatiacaijarehi Aluresi. Éma, reyhi tayehe eta departamento Judea.

tiúchucanapa éna tayehe eta avasare ticaijare Nazaret te Galilea. Nacaijuhepa eta avasare ticaijare Belén te Judea, eta mávasainihi ema aquenucaini rey David. Étarichuvare mávasahi ema José, taicha ema José mámariequenehi ema David. Tiyananapa ticatupanayarehi.

6-7 Tacahe, títecapanapa te Belén. Tájinaipasera táviravainahini eta te péttiana eta náitecapihahini taicha camuriqueneanahi ena achaneana náitecapa queneanahi. Tacahe, tisiapanapa eta te peti tapena eta sárareana. Tacahe, esu María tiyuriticavaipa eta sucajera eta suínasirayarehi. Tacahe, tínacapa jena yati. Suínacapa ema amuya ema suárachichahi. Tacahe, suáyuruacapa eta te mámara-tataji pañal. Sucaivecapa ema amuya alauchu.

Ena pástulérhana ticametacasanapa nayehe ena ángeleana

8 Te vámahi te tachacaya eta avasare Belén, natiarihihi ena pástulérhana. Éna, najaneacahi eta nayeheana uvesana te jena yátiquenehi. **9** Tiáramicarepa tímerecava ema ángele mavaneruhi ema Viya. Jéhesare, tamicauchamurinehi ena pástulérhana eta majaraivahi éma. Tiáramecanarine éna. **10** Tásihasera, ema ángele máichavacapa:

—Vahi ecupica. Yare, jucarihi eta tímitecanuhi núti numetapanahheyare. Tétavicava táurisamuré-carevaya nayehe namutu ena achaneana. **11** Puiti te jena avasare Belén, mávasaini ema rey David, tiúchucaipa ema Ticatiurahiyare eyehe emutu éti. Éma, ticaijare Cristo Viáquenu. **12** Eta tacahe,

nímicucutiarachinaheyare eta ímairaya: Echimapayare ema amuya ticayuruuhahi te mámaratatajipañal. Tívecahi eta te tajuhe eta peti tapena eta sárareana —máichavacapa ema ángele.

13 Tásicha, tíjahúchavapa tímerecavana ena camuriqueneana ángeleana eta te mávihahi ema émana ángele. Najirahi eta alabanza eta nacunachirahi ema Viya te anuma. Ánipa nacahe:

14 ¡Tétávicavapa eta vicunachirahi ema Viya vimutu viti viávihanahi te anuma! ¡Jéhevare puiti, tiúricavanainapa ena achaneana te juca apaquehe, ena manerejiruanahi macatajiruanahi ema Viya! ¡Tájinainapa náichiravaimahi! —nacahepa.

15 Tacahe, tiyananapa ena ángeleana, tichavana te anuma. Tásicha, náichacacapa ena pástulérұana:

—Yare, viyana te Belén. Viyana vímahapana eta juca mametaruhavihi ema ángele mavaneruhi ema Viya Viáquenu —náichacacapa.

16 Tacahe, titátájianapaipahi tiyanana. Jéhesareinahi, te títecapanapa, nachimapainehi esu María émapa ema José. Matiarihisaréipahi ema amuya. Tívecahi éma eta te tajuhe eta peti tapena eta sárareana. **17** Te náimahapa tamutu, tépanavanapa náemechapa. Amairipahipnaecha eta mametarapianahi ema ángele eta máuchusiraipahi ema amuya. **18** Tacahe, náraminehi namutu ena achaneana eta nametarapianahi ena pástulérұana.

19 Tásihasera, esu María supanerequenehainehi te susamure tamutu eta juca susamaqueneanahi.

20 Tacahe, ena pástulérұana tichavanapa tayehe eta te najanearesihahi eta uvesana. Nacunachainehi

ema Viya te anuma táichavene eta máechajiruvahi ema ángele, táichavenevare eta náimairahivare ema amuya alauchu. Étapaichuhi tacahehi eta macaye-maquenehi ema ángele.

Námapa ema amuya Jesús te Jerusalén, náimerepana tayehe eta Templo

21 Te óchoquenepa sache eta máuchusirahi ema amuya, namarcachapa éma taicha tacahehi eta nayeherepi ena israelítana. Tacahe, nanacapa eta máijareyare Jesús. Eta máijare máimijarecha-quenehi ema ángele te sucajariyarepa esu maena María.

22-24 Tacahe, te cuarentaquenepa sache eta suínasirahi esu María, tiyananapa te Jerusalén. Eta tímiyanavacahi éna, náimerepanayarehi ema amuya mayehe ema Viya Viáquenu. Taicha ema Viya macavanairipihi eta te Sagrada Escritura eta májurehi ema víyarahaini Moiséini, ánipa tacahehi: “Te ajairapuca ema mácani suárachicha esu esena, ímerecayare nuyehe; íjaracanuyare taicha nícuchichuhi ema”. Énerichuvare náitauchayarehi eta juca apana vanairipi tayehe eta napachihairaina ena esenana eta te taequenerapa eta náinasira. Ánipa macahe: “Esu súcani esena arainacahi, suíjaracasichanupana eta apihina paluma símarrune; te váhipuca, apina paluma suítatiqueneana, amairuhichichanasera”.

25 Tiuri, matiarihihi te Jerusalén ema émana achane ticaijare Simeón. Tétávicavahi eta máuriva. Tipicaurahi éma. Émarichu mávaháruhi ema Espíritu Santo. Ticuchapavaipahicha ticaimairuvaipaicha éma eta máimatiraya ema

Cristo, éma ticaurisamurerahi nayehe ena achaneana majaneanana israelítana. ²⁶ Taicha ema Espíritu Santo mametacaripahi ema Simeón eta vuíchaha tépenavanemahi éma, táicha máimatinumayarehi ema Cristo mavaneruyarehi ema Viya.

²⁷ Tiuri, te jena sache, ema Espíritu mavanecapa ema achane Simeón mayana eta te Templo. Tacalhe, títecapanapa ena ticachichana ema Jesús. Námapaipa ema amuya. Náitauchayarehi eta vanairipiana taicha eta máuchusirahi ema suáracachichahi. ²⁸ Tacalhe, te máimahapa ema Simeón ema amuya, mavehapa, majupacapa. Tásicha, macunacharinehi ema Viya te anuma. Macahepa ema Simeón:

²⁹⁻³⁰ —Tiuri puiti, Tata Náquenu te anuma, nuvarahapa nunaraca te juca apaquehe, nuti pivanarahi. Taicha núrisamurepa eta nímairaipa ema Cristo. Étapaichuhi eta pimetarunuhi. Nímatipa ema Ticatiurahiqueneyarehi, ema pivaneruhi pitupararuhi. ³¹ Éma, tímaticareya picha nayehe ena achaneana ticavasanahi eta te tamutu avasareana. ³² Ticunachavanarinehi ema pinerejiruana israelítana. Tíjarahinevare te nasamure eta nacunachirahi. Éma, timicauchavacaya ena apamuriana achaneana apavasanana apaesa náimatiyare ema Viya — macahepa ema Simeón.

³³ Náraminehi ena ticachichana eta máechajiriruvanahí ema Simeón mayehe ema amuya.

³⁴ Tacalhe, ema Simeón mayaseacapa ema Viya eta náurivaina éna. Tacalhe, máichapa esu María esu

maena ema amuya Jesús:

—Pímaha. Ema maca amuya, matuparaca-sivaichuhi me Viya eta máimituresirayare eta máechajiriruvana ema Viya. Natiarihiyaresera camuriana ena vijaneanana israelítana énajivayare táchavanayare, taicha náepuruyare ema pichicha, nacatianacayareva. Tásicha, natiarihiyaresera ena apamuriana vijaneanana tinaracanayare tiúricavanayare taicha eta nacasiñairaya éma. ³⁵ Étainapa tacaecheraiyaya eta napanereruanapachu te nasamureana. Énerichuvare, numetacavi piti María: Ichape eta picatisamurevayare, taicha pímahayare eta táíñehiqueneyare máichararacavayare ema pichicha. Tímicutijiricavayare tayuvavaracahini eta pisamure eta tumare —máichapa ema Simeón.

³⁶ Tiuri, sutiarihihivare esu ésuna esena ichavicaschicha. Ticametarairurahi esu. Ticaijaruhi Ana. Ema suíyaini ticaijaréni Fanuel. Ésu, mámariequenehi ema víyarahaini Aser. Eta suámaperuvahi esu, siete año eta sucachanerahi ema suímaini. ³⁷ Tásicha, ochenta y cuatro áñoripahi eta suépenaimavahi. Sunasiquenehi sucapenahi esu eta te Templo. Tamutuhi sácheana, yátiana, tiyujaracahi esu. Suhayunachahivare. ³⁸ Tacache, ema Simeón téchajiricavainirichaha, títecapanecha esu Ana. Eta suímairahi ema amuya Jesús, sucunacharinehivare esu apanahivare, suhasulupayachapa ema Viya máichavene ema amuya. Tásicha, sucametarairupa mayehe ema amuya. Suéchajisihi éma nayehe ena tisuapajirairahana ticuchapanahi eta máitecapirayare te Jerusalén ema Cristo.

Tichavanapa eta te návasa Nazaret

³⁹ Tiuri, náitauchapa tamutu eta mavanairipiana ema Viya eta te Sagrada Escritura. Tacahe, tichavanapa eta te Nazaret te Galilea, te návasaichuhi éna. ⁴⁰ Tacahe, ema amuya Jesús tiúrijuruhi. Túmehi. Téchemarahihi, tamutu maecha, taicha mamunavahi me Viya.

Ema Jesús téchajiricava nayehe ena máestroana

⁴¹ Tiuri, tamutu áñoana te Pásquamuahuana, eta nayeherepi ena ticachichana ema amaperu Jesús, tiyananayarehi tayehe eta avasare Jerusalén. ⁴² Tacahe, ema Jesús, te macayeheda doce año, tatuparacaripahi ena ticachichana náimerepanayarehi éma, námayarehi tayehe eta Jerusalén, náimimatichayarehi eta piesta ticaijare Pascua.

⁴³ Tiuri, te jena táequenerapa eta piesta, tichavanapa te napena. Tíminasichavapaserá ema amaperu Jesús eta te Jerusalén. Eta napaisirapahi te achene, vahi náejiacavanehini ena ticachichana, ⁴⁴ taicha náimijachahi matiarihipahi éma te namuri ena achaneana nacachanequeneanapahi. Étanaripahi sache eta napaisirahi, napaenumavapa náejiacahi éma. Te jena cáperehiquenepa, natanucapa te namuri ena najaneanana nacachanequeneanapahi. ⁴⁵ Májinaserá náichimavahini. Tacahe, tichavanavarepa te Jerusalén, natanupanayarehi éma. ⁴⁶ Tacahe, te jena mapanaquenepa sache eta natanusirahi, napaenumavapa náetupiacahi ema Jesús tayehe eta Templo. Macachanemurihi, téjacahi te

namuri ena máestroana. Masamararacavacahi, mayaseremurihavacahivare éma apanavare.
47 Ichaperinehi eta náraminehi namutu eta náimairahi eta máechemaraivahi, taicha táurivapahi eta majicapiravacapahi éna, taicha eta máechemaraivahi. **48** Tacahe, tiáramivanarinehi ichape ena ticachichana te náetupiacapa. Tásiba, suíchapa esu maena:

—Nuchicha, ¿tájaha tacayema píchahavihi? Ichapemuri eta vicañamarasiravahi pícha. Vitanujiricavihi, núti éñipa eñi piya —suíchapa esu maena.

49 Tacahe, ema Jesús majicapapa:

—¿Tájaha tacayema, meme, eta etanujiri-canuhi? ¿Váhipuca échahini éti eta návhairahi eta ani? Níchayare eta máemataneana ema Tata —macahepa ema Jesús.

50 Énasera vahi nacaicutiarahini eta macayemaqueneanahi ema nachicha Jesús.

51 Tacahe, tiyananapasera tichavana te návasahi Nazaret. Ema Jesús, tisuapajirahihi nayehe ena ticachichaña. Esu maena María tamutuhi supanerequenehahi te susamure eta juca susamaqueneanahi.

52 Tacahe, ema Jesús tijurucapaipa, tijuruhacapaipavare eta máquehe, tacachanepahisera eta máitupajijiasiravahi. Máimicatacahi ema Viya. Tétavicavahivare eta náemunasirahi éma, ena achaneana.

3

Ema Juan Tícacchasiricarahi tépanavapa ticametarairu eta máechajiriruva ema Viya nayehe

*ena vámahicuruhana
(Mt 3.1-12; Mr 1.1-8; Jn 1.19-28)*

¹ Tacahe, eta máopeniraipahi ema aquenucaini Augusto, tisiapapa ema Tiberio máitsivaquenehi. Émapa Emperadorhi. Quince áñoripahi eta macatuparahairahi. Ema Poncio Pilato, émaripa prefectohi tayehe eta departamento Judea. Tásicha, ema Herodes Antipas, machicha ema Aluresini, prefectohivare tayehe eta departamento Galilea. Ema maparape Felipe, prefectohivare éma, tayehe eta departamento Iturea étapa eta Traconite. Ema Lisanías, prefectohivare tayehe eta departamento Abilina. ² Te Jerusalén, ema Caifás, corregidorhi. Énerichuvare tipicauchacarehi ema Anás, pasado corregidor, máimachuca ema Caifás.

Tacahe, te jena sácheinahi, ema Juan machicha ema víyarahaini Zacarías, ajairaripa. Manasirichahahisera tayehe eta mávapahi majurusinehi. Tásicha, ticametacasipa ema Juan eta mayehe ema Viya eta macametarairuirayarepa eta máechajirruvana.

³ Tacahe, tiyanapa tipaicahi ema Juan tayehe eta avasarechichana tiávihanahi te tachausi eta cajacure Jordán. Mametacavapaipa ena achaneana. Ánipa maicha:

—Ítsivacha eta epanereruana. Éneuchava mayehe ema Viya apaessa maperdonachahe eta epecaturana. Te éneuchavapuca, nútí níccachasicahénapa —máichapa.

⁴⁻⁶ Ema maca Juan, émaripa ema máechajishihaquenehi ema Viya eta te Sagrada Escritura, taicha ánaquiaparipahi eta áñoana acane, ema Viya mametacapa ema víyarahaini profeta Isaías

eta mapanereruhi, eta mavanesirayare ema Machicha te juca apaquehe. Eta tímitecahi ticatiurahiyarehi. Énerichuvare matiarihiyareva ema apana achane máichuhuqueneyarehi ema Viya. Macametarairuyarehi, máetupiricavacayare ena achaneana, náinajisirayarehi eta napanereruana tamauriqueneana, apaesa táuri eta najacapirayare ema Machicha ema Viya. Tacamunuhivare yátupina eta nacasiñairavayarehi mayehe, náinajicayarehivre eta nacasiñavavaisirahi, étapa eta navayuaraivahi. Nasapihahi tijapanurahianainapa éna. Tásicha, te máitecapapa ema ticatiurahiyarehi, éma máimimaticchainapa namutu eta najacapacarevaya me Viya namutu ena ticasíñavana mayehe.

⁷ Tacahe, ena achaneana tiyananapaipa napauchapipa ema Juan, navarahapa ticaicachasianayare eta mayehe. Tásicha, éma máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairiricahipuca eta járajapairayarepa eta táíñehiqueneyare ecuñaraqui. Evarahahipuca iúchucuhayare. ⁸ Tiuri puiti, te evarahapuca eta iúchucuha, yátupina tátupiruva eta epanereruana. Ímerecava eta ínajisiraya eta epecaturana. Váhivare ecucajamurava eta mámariéquenérahehi ema viáchucai Abraham. Taicha tayanapane mámarihepuca éma, váhisera iúchucuhaimahi te vahi ecuitsivacha eta epanereruana. Ema Viya, tájina máemaitucaimahi éma. Te mavarahapuca, vahi máejecarachaimahi máepiyaca

achaneanaina eta juca mari, mavarairainahi yátupina ena mámariequeneanaina ema Abraham. ⁹ Ecauneuchava, taicha tiánehipa títecapauchaheyare eta ecuñaraqui nayehe ena achaneana máitucarahanahi téneuchavana, váhivare náitsivachahini eta napanereruana. Tímicutijircavaipa te máechucayarepa ema achane eta yucuqui máhireana; tásicha, máijuchainapa tamutu. Ene nacaheyare ena máeneuchavarahana —máichavacapa ema Juan.

¹⁰ Tásicha, ena achaneana nayaserecapa:

—¿Tájahasica eta vícharacavayare eta viúrivaina?

¹¹ Ema Juan majicapapa:

—Ecajirahiyare. Mácani tatiarihi apina eta macamisa, májaracasichayarehi eta étana mácani tájina macamisaina. Énaripa nácani ticaniruanahi, nacajiyareva nácani tájina naviyahini eta nani-caquene —máichavacapa.

¹² Te jena sácheana, náitecapauchavare ema Juan ena ticobrarecarahiana eta impuesto. Navarahapa ticaicachasianayarehi. Nayaserecapa ema Juan, náichapa:

—Maestro, ¿tájahapuca vícharacavaini eta viúrvainaini víti apanavare? —náichapa.

¹³ Majicapapa ema Juan:

—Vaipa ecuapechava ecuvayuyujica eta ecobraresira, tátupiruva jácani tavanairipihi eta ley —máichapa.

¹⁴ Énerichuvare náitecapaucha ena suntaruana. Nayaserecavare ema Juan, náichapa:

—Víti apanavare, ¿tájahapucaini vícharacavayare eta viúrivaya? —nacahepa.

Máichavacapa éma:

—Vaipa ecuvorejica eta náimahaqueneana ena achaneana. Váipavare ecuipicarareca. Nacuijapa ecuepiyequeneha. Tarataripa tacurisamurechahe eta evachasana —máichavacapa.

¹⁵ Ena achaneana ticunevanaripaicha eta mayehe ema Juan, náimijachaipahi émaripa ema Cristo nacuchapaquenehi, cátiurahiyarehi. Váhisera námutuimahi. ¹⁶ Tásihasera ema Juan máichavacapa:

—Yátupi núti nícacasicacahehi te une. Ávanepaipahisera mácani yátupiquene Cristo. Éma, tiápajupanavahi nuyehé núti, eta mapicauchacarevahi. Váiparinehi nácutinasimahi eta máitupajijiasiravahi. Váiparinehivare nácaemuñavaimahi macamusuranuhini nuti páuresami. Te yátupina ecasiñava mayehe, tícacasicaheyareva; tíjaracaheyareva ema Espíritu Santo. Téhesera vahi ecucasiñavapuca mayehe, tícuñacaheyare tayehe eta tájurequene yucu. ¹⁷ Puiti éma mårabajapainapa tinerejiricainapaipa nácani yátupiqueneanahi téhicanayare. Máunacainapa éna. Ticutinapa mácani achane te tiácatayajiricahi eta arusu. Máunacainapa. Tásiha, máquijicapa eta tapiraquiji, máijuchayarepa te yucu. Eta nacaheyare ena máurirahanahi, tíjuanáinapa te yucu, máitavacacayarehi eta tamuruira —máichavacapa ema Juan.

¹⁸ Tacahéhi eta juca máechajisiravacahi ema Juan. Ichape eta maconsejachiravacahi ena achaneana, máimitusiravacahi eta máechajiriruva ema Viya. ¹⁹ Émaripa ema Herodes Antipas ema

aquenucahi, maconsejachahivare vahi macuimiyanova macuveha esu Herodías, mayenahi ema maparape Felipe. Váhivare macuimiyanova macuquicha eta apamuriana táñemahiqueneana máichaqueneana. ²⁰ Émasera ema Herodes vahi masuapahini. Masapiharichucha tisemahi, máimicaratacapa ema Juan, macasiapayarehi te cárcel.

Eta macaicachasirahi ema Jesús

(Mt 3.13-17; Mr 1.9-11)

²¹ Tiuri, te tamirahupaichaha eta macaeratairaya ema Juan, tímiyanavaichahahi máicachasicavacahi ena achaneana. Étana sache, máitecapauchapa ema Jesús, mavarairahi ticaicachasi éma apanavare. Tacahe, te tamutupa eta macaicachasirahi, mayujarasirahi. Tíjahúchavapa téjiaca eta anuma. ²² Tiúcupaicapa ema Espíritu Santo, mavasimahipaipa eta paluma eta máimahi. Matupiruruchapa te mápusi ema Jesús. Tásicha, nasamapa eta mahu ema Viya te anuquehe. Ánipa macahehi:

—Pítira nuchicha némunaruquene. Núrisa-murecha piyehe—macahepa.

Ena achaneana máchucaequeanaini ema Jesús eta acane

(Mt 1.1-17)

²³ Tiuri, ema Jesús, macayeheripahi treinta año te tinacuchavapa tímiturecahi nayehe ena achaneana. Éma, náimijachaquenehi machicha ema José.

Ema máiyainihi ema José, ema Elí.

²⁴ Ema máiyainihivare ema Elí, ema Matat.

Ema máiyainihivare ema Matat, ema Levi.
Ema máiyainihivare ema Leví, ema Melqui.
Ema máiyainihivare ema Melqui, ema Jana.
Ema máiyainihivare ema Jana, ema José.

25 Ema máiyainihivare ema José, ema Matatías.

Ema máiyainihivare ema Matatías, ema Amós.

Ema máiyainihivare ema Amós, ema Nahum.

Ema máiyainihivare ema Nahum, ema Esli.

Ema máiyainihivare ema Esli, ema Nagai.

26 Ema máiyainihivare ema Nagai, ema Maat.

Ema máiyainihivare ema Maat, ema Matatías.

Ema máiyainihivare ema Matatías, ema Semei.

Ema máiyainihivare ema Semei, ema José.

Ema máiyainihivare ema José, ema Judá.

27 Ema máiyainihivare ema Judá, ema Joana.

Ema máiyainihivare ema Joana, ema Resa.

Ema máiyainihivare ema Resa, ema Zorobabel.

Ema máiyainihivare ema Zorobabel, ema Salatiel.

Ema máiyainihivare ema Salatiel, ema Neri.

28 Ema máiyainihivare ema Neri, ema Melqui.

Ema máiyainihivare ema Melqui, ema Adi.

Ema máiyainihivare ema Adi, ema Cosam.

Ema máiyainihivare ema Cosam, ema Elmodam.

Ema máiyainihivare ema Elmodam, ema Er.

29 Ema máiyainihivare ema Er, ema Josué.

Ema máiyainihivare ema Josué, ema Eliezer.

Ema máiyainihivare ema Eliezer, ema Jorim.

Ema máiyainihivare ema Jorim, ema Matat.

30 Ema máiyainihivare ema Matat, ema Leví.

Ema máiyainihivare ema Leví, ema Simeón.

Ema máiyainihivare ema Simeón, ema Judá.

Ema máiyainihivare ema Judá, ema José.

Ema máiyainihivare ema José, ema Jonán.
 Ema máiyainihivare ema Jonán, ema Eliaquim.
 31 Ema máiyainihivare ema Eliaquim, ema Melea.
 Ema máiyainihivare ema Melea, ema Mainán.
 Ema máiyainihivare ema Mainán, ema Matata.
 Ema máiyainihivare ema Matata, ema Natán.
 32 Ema máiyainihivare ema Natán, ema David.
 Ema máiyainihivare ema David, ema Isaí.
 Ema máiyainihivare ema Isaí, ema Obed.
 Ema máiyainihivare ema Obed, ema Booz.
 Ema máiyainihivare ema Booz, ema Salmón.
 Ema máiyainihivare ema Salmón, ema Naasón.
 33 Ema máiyainihivare ema Naasón, ema Amínadab.
 Ema máiyainihivare ema Aminadab, ema Aram.
 Ema máiyainihivare ema Aram, ema Esrom.
 Ema máiyainihivare ema Esrom, ema Fares.
 Ema máiyainihivare ema Fares, ema Judá.
 34 Ema máiyainihivare ema Judá, ema Jacob.
 Ema máiyainihivare ema Jacob, ema Isaac.
 Ema máiyainihivare ema Isaac, ema Abraham.
 Ema máiyainihivare ema Abraham, ema Taré.
 Ema máiyainihivare ema Taré, ema Nacor.
 35 Ema máiyainihivare ema Nacor, ema Serug.
 Ema máiyainihivare ema Serug, ema Ragau.
 Ema máiyainihivare ema Ragau, ema Peleg.
 Ema máiyainihivare ema Peleg, ema Heber.
 Ema máiyainihivare ema Heber, ema Sala.
 36 Ema máiyainihivare ema Sala, ema Cainán.
 Ema máiyainihivare ema Cainán, ema Arfaxad.
 Ema máiyainihivare ema Arfaxad, ema Sem.
 Ema máiyainihivare ema Sem, ema Noé.

Ema máiyainihivare ema Noé, ema Lamec.

³⁷ Ema máiyainihivare ema Lamec, ema Matusalén.

Ema máiyainihivare ema Matusalén, ema Enoc.

Ema máiyainihivare ema Enoc, ema Jared.

Ema máiyainihivare ema Jared, ema Mahalaleel.

Ema máiyainihivare ema Mahalaleel, ema Cainán.

³⁸ Ema máiyainihivare ema Cainán, ema Enós.

Ema máiyainihivare ema Enós, ema Set.

Ema máiyainihivare ema Set, ema Adán.

Ema Adán macaepiyaquenepa me Viya.

4

Ema Váinaraji Satanás mavaraha macaitsamara ji ema Jesús

(Mt 4.1-11; Mr 1.12-13)

¹ Tacahe, ema Jesús, mávahácaripa ema Espíritu Santo. Tásiha, ema Espíritu Santo eta mávasamurechirahi, máimitucaipahi eta mayanirayarehi te mávapahi apaquehe. Majunijicayarehi eta cajacure Jordán. ² Cuarenta sache macahehi tayehe. Tájinavare manicahini eta jena sácheanahi. Técuhassamurepa. ³ Tacahe, ema Váinaraji témeñahavapa mayehe. Mavarahapa macaetemayarehi. Ánipa maicha:

—¿Pécuhapa pítí? Tacahe, pivaneca eta juca mari táepiyacava pan, taicha pítí machichavihi ema Viya, ¿masi? —máichapa.

⁴ Ema Jesús majicapapa:

—Váhipuca pecha eta táechajiriruvahi eta Sagrada Escritura, ani tacahehi: “Vahi tácharichuimahi eta tinicacare ticaitarecayare ena achaneana. Tacachaneyarehi eta máechajiriruva

ema Viya. Jéhevare, éta ticaitarecarahiyare” — macahepa.

⁵ Tacahe, ema Váinaraſi mámavarepa te táinahu eta anuquehe mari. Tíjahúchavapa máimecha tamutu eta ichapequeneana avasareana te juca apauehe ticutirinehi tacachacayajiricacahini taicha eta máitupajijasiravahicacha ema Váinaraſi. ⁶ Tásicha, máichavarepa ema Váinaraſi:

—Núti níjaracaviyare tamutu eta juca avasareana. Ichape eta napicauchiraviyare, nacunachiraviyareva ena achaneana. Pítina náquenuvina ena távacuanahi eta avasareana. Taicha núti néchavacahi éna. Nútivare nécha mácani nuvarahaqueneyare níjaraca. ⁷ Pépuyucanumaserá te numirahu pitsiucanu apaesa níjaracavisiarepa tamutu —máichapa.

⁸ Émasera ema Jesús majicapapa:

—Pévuishatataji piti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu ema Viya vépuyumirauchaya. Macarichuvare vicaemata-neacayare” tacahepa. Váhiqune táurica nucaemata-neacavihini —máichapa ema Jesús.

⁹ Tacahe, vahi máevuisihahini ema Váinaraſi. Mámavare te avasare Jerusalén. Máimiapanapa te táinahu eta Templo. Tásicha, máichavarepa:

—Te yátupina machichavina ema Viya, písapavayare pémirica te anuquehe. Tájina píchavaimahi eta pémirisirayare. ¹⁰ Pécharichuhi eta táechajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajiricavianayare, énevaneyarehi tijaneacaviana. ¹¹ Tiámavianayare te navahuana,

apaesa vahi picucayutetu eta máriana eta te pipaisirana” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

12 Tacahe ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamarajimahi ema Viya taicha éma Piáquenu” —máichapa.

13 Tacahe, tiyanapa ema Váinaraji. Majunijicapa ema Jesús taicha tímahavaipahi vahi máiturucahini macaetema. Mavarahahisera tichavayarehi tiápechavayarehi macaetemapana.

Ema Jesús tépanavapa ticametarairu

(Mt 4.12-17; Mr 1.14-15)

14-15 Tacahe, tépanavapa ema Jesús mapaica eta avasareana tayehe eta provincia Galilea. Ichape eta máitupajijiasiravahi taicha mávahácapahi ema Espíritu Santo. Tímiturecapaipa tayehe eta náurujisirarevana te avasareana. Ichapemuri eta nacunachirahi namutu ena tisamararacanapahi. Nasamairiricavarepa ena apamuriana achaneana ticavasanahi te tachacaya eta avasareana.

Tichavapa ema Jesús te mávasa Nazaret

(Mt 13.53-58; Mr 6.1-6)

16 Tásiha, tiyanavarepa te avasare Nazaret te majurusinehi. Te jena sache sávaru, tiyanapa tayehe eta náurujisirareva nayujarauchirare ena achaneana, taicha tacahehi eta mayeherepihi. Titupihapa ema Jesús, táicutiarahi eta mavarairahi téchajicureca eta Sagrada Escritura.

17 Náichuhasarepa eta máechajicuresiraya.

Náijaracapa eta libro májurehi ema profetaini Isaías. Te mavejiacapa eta libro, matanucapa eta máechajicureyarehi. Ani tacahehi eta táechajiruvanahi: ¹⁸ “Tiávahácanuhi ema Espíritu Santo. Taicha manerejirunuichuhi núti ema Viya Viáquenu eta numetasiravacayare ena páureana eta juca máemunasiravacahi éma, máimicatasirayareva. Eta tímitecanuhi nucanaracayare ena ticatisamurevanahi. Nucaititijicayareva ena máerataruanahi ema tivayuarahi Satanás. Nucaimairicayareva ena púchuquiana. Nucuchucuhayareva ena ticatajivanahi, níjaracaya eta náuricacarevaya. ¹⁹ Numetacayareva járajapainapa eta sácheyare tamutuiraya máetupirica ema Viya, tamutuinapa tiúrisamurécarepa máicha” tacahehi eta Sagrada Escritura eta máechajicurehi.

²⁰ Te tamutupa eta máechajicuresirahi ema Jesús, máeratacapa eta libro. Máimichavapa mayehe ema tijanearecarahi eta libroana. Téjacavarepa ema Jesús. Náimaranaracaripa ena achaneana natarihiqueneanahi. ²¹ Tacahe, tépanavapa téchajica ema Jesús:

—Nútiripa ema táechajisihaquenehi eta juca libro. Tímitecanuhi numetacahe eta máemunasi-rahehi ema Viya —macahepa.

²² Tacahe, náramipa namutu ena achaneana. Ánipa náichacaca:

—¡Tétavicavahi tapachinava eta máechajiruvanahi ema maca! Émachuchasera ema machicha ema Joséini ema carpintéroini. ¿Tájahasica eta juca? —nacahepa.

23 Émasera ema Jesús máichavacapa:

—Németeaca éti váhirichuhi esuapapajicanuhini. Tásiha, evaraharinepuca íchanuyare: “Te yátupina píturuequeneha, pípuchavaca ena ticajumanahi te juca. Vímahaséji piápechavavare picuchuca te juca piávasaichu tacuti eta pímereruhi te avasare Capernaum” íchanuyare. **24** Nutupiruvasera numetacahe: Tatuparaca eta epicauchirahaviya vimutu viti mavaneruana ema Viya. Étisera eti nujaneananahi ecavasanahi eta te juca viávasa, vahi epicauchanuhini, váhivare ejacapanuini. Ecuti ena achaneana acane eta náepuruirahi ena apamuriana profetana mavaneruanahi ema Viya. **25** Eta tacahe, eta máimairahi ema Viya eta náepuruiravacahi, tivanecavaca ena profetana nayana napauchayare ena apavasanana. Acane, te matiarihichaha ema profetaini Elías, mapana año y medio vahi taquivahini, tásiha, ichapevare eta ecuha. Németeaca núti camurianahi nácani ena tépenaimana israelítana. **26** Váhisera étainahini macavanahiyahini me Viya ema Elías eta nayehe ena majaneananahi. Ánaqui te avasare Sarepta tachacayahi eta avasare Sidón, étapa macavanahiyahí máitecapihayare suyehe esu ésunahi esena apavasana tépenaimahi. Ésupa máimicataruhi táichavenehi eta susuapajiraivahi me Viya. **27** Énaripa ena israelítana nacajumaqueneana eta lepra te jena sácheanahi te matiarihichaha ema profetaini Eliseo. Váhivare énainahini macanaracahini ena majaneanana. Masapihapa macanaracahi ema apavasanaquenehi ticaijare

Naamán, ticavasahi te Siria. Ema Naamán, tinaracaripa eta majuma, táichavenehi eta masuapajiraivahi —máichavacapa ema Jesús.

²⁸ Tacache, eta juca máichiravacahi ema Jesús, tisemanapa ena natarihiqueneanahi. ²⁹ Tásicha téchepumurihanapa éna. Nacuchucapa ema Jesús te tachachacu eta avasare, te tachausi eta táupenaquene, navarahapa nacamiricayarehi éma. ³⁰ Émasera tichavapa mánucumurihapipa éna. Tiyanapa, majunijicavacapa.

*Ema Jesús máimijuna ema éreana tiávahácainihi ema achane
(Mr 1.21-28)*

³¹ Tacache, títecapapa ema Jesús tayehe eta avasare Capernaúm te Galilea. Tamutu sávaruana tiyanapa tayehe eta náurujisirareva ena achaneana, tímiturepanaya. ³² Ichape náramihi ena achaneana eta máimiturapianahi taicha tétavicavahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

³³ Étana sávaru, matiarihihi te namuri ema émana achane mávaháruhi ema éreana. Tipiararecahi, ánipa macahe:

³⁴ —Núti nímativi. Pítira Sántoquenevihi. Machichaquenevihi ema Viya. Pésamiri-cahavipaini, piti Jesús Nazareno. Váhini picuesirujicahavini. Pivarahainapapuca picajanerepaicahaviyare —macahepa ema achane.

³⁵ Tacache ema Jesús macajachapa ema éreana. Ánipa maicha:

—¡Pámatina! ¡Piyana pijunijica ema maca achane! —máichapa.

Tásicha, tíjahúchava tiáquipaicavapa te apaquehe ema achane. Tásicha majunijiacapa ema éreana. Tájinaserá máichavahini ema achane. ³⁶ Náraminehi ichape namutu ena achaneana eta náimairahi. Tiyaserejiricacanapa:

—¿Tájahasica tacayema eta juca? Ema maca Jesús, téavicava eta máitupajijiásiravahí, marata-hahi máquijica nácani éreanana. Tásicha, ichape eta napisirahi éma. Vahi najicapaemachahini. Tamutupa arairu eta máimiturapianahi ema maca —nacahepa.

³⁷ Enevanevarepa naecha namutu ena achaneana eta juca máichaqueneanahi ema Jesús. Énaripa ena ticavasanahi te avasareana eta te provincia Galilea.

*Ema Jesús macanaraca esu máimase ema Pedro
(Mt 8.14-15; Mr 1.29-31)*

³⁸ Te tiúchucapa ema Jesús tayehe eta náurujisi-rareva, tiyanapa te mapena ema Simón Pedro. Te tisiapapa, náechajiacapa ema Jesús máimaharine esu máimase ema Pedro. Ticajumahi ésu eta muraca fiebre. ³⁹ Tásicha, mapauchapa ema Jesús. Máquijisinapa eta muraca fiebre. Tinaracavanepa ésu, téchepucavanepa. Suéchapajiricapa éma, énapa ena máimitureana.

*Camuriana ena macanararuuanapahi ema Jesús
(Mt 8.16-17; Mr 1.32-34)*

⁴⁰ Te jena cáperehiquenéhi, te téricapa eta sache, ena achaneana námavacapaipa namutu ena nacajumaqueneana eta mayehe ema

Jesús. Apanapaneneji eta najumanapahi éna. Manacapaipa eta mavahu te náinahuana, macanaracapaipahi. **41** Maveranavare ena éreanana máquijiruanapahi te náqueheana ena nacajumaqueneana. Tipiararecanapaipa eta náuchusirapahi. Ánipa nacahe:

—Pítira Machichaquenevi ema Viya.

Émasera ema Jesús vaipa másapahini náimiyanovahini napiaraca éma, taicha náimatihi éna eta émairahi ema Cristo.

Tamutu avasareana te Galilea mapaica ema Jesús

(*Mr 1.35-39*)

42 Te apanapa sache, te tijararahipa, tiyanapa ema Jesús te mávapahi. Natanucapasera ena achaneana. Náetupiasirapa éma tayehe eta mávihahi. Navarahapa náminasichayarehini. Vaipa náisapahini mayanahini. **43** Émasera ema Jesús máichavacapa:

—Nutuparacasiswaichuhi eta nuyanirayare tayehe eta apava avasareana taicha nuvanahirichuhi eta níchuiravacaya ena achaneana náehisiraina ema Viya apaesa macuchucuhavaca —máichavacapa.

44 Tacahe, tiyanapa tipaica ticametarairupaipa te náurujisirarevana tayehe eta avasareana te Galilea.

5

Tiáramicarepa eta náitusiravahi eta jíma

(*Mt 4.18-22; Mr 1.16-20*)

¹ Te jena sácheinahi, ema Jesús mávinehi te tachausi eta cáquiure ticaijare Galilea. Títecapanapa ena camuriqueneana achaneana. Váipanecha náratavahini, tipamihejiricacanapa eta navarairahi nasama eta macametarairuirahi ema Jesús eta máechajiriruvana ema Viya.

² Máimahapa ema Jesús eta apisi pacure te tachausi. Ena ticayehheana eta pacureana, tisipajiricanahi eta ichapequeneana nayutaheana. ³ Tacalhe, ema Jesús tiávacuhapa tayehe eta mapacurehi ema Simón Pedro. Mavanecapa máevataeca apaesachicha eta pacure. Téjacapa ema Jesús eta te pacure, tépanavapa máimitucavacapa ena achaneana. ⁴ Te titapiricapa eta máimitusiravacahi, máichapa ema Pedro:

—Tata, iama eta juca epacure tayehe eta táupenamaiya. Iáquijieca eta jara eyutahe —máichapa.

⁵ Ema Pedro majicapapa:

—Maestro, tamutu yati vinajuiricahi, tájinaserá vítucavahini. Tavetijipa puiti eta tajarahiraripa. Nusuapavisera eta juca pivanesiranuhi, náquijiecaya eta nuyutahe —máichapa.

⁶ Jéhesaréinehi, te nachurucapa eta yutahe, tiyututucavaipahi eta jímana. Vaipa táratavahini ténarujicapa eta ichape yutahe taicha eta tajitacareva eta jima. ⁷⁻¹⁰ Natariihihisera te apala pacure ena nachamuriana: ema Jacobo émapa ema Juan. Tacalhe, náevehauquichapa tímicatacanayarehi. Te títecapanapa, náinicachapa eta apisiquene pacure. Tiánehirichahavare vahi táratavayarehini taicha eta tajitacarevahi, téricayarepaini eta pacure. Ichape eta

náramesirahi namutu taicha eta náimairahi eta camuriquene jímana. Tásicha, ema Pedro máepuyumirauchapa ema Jesús. Máichapa:

—Tata, pítiyara yátupiquenévihi Viáquenuvi. Váhicha nímiuriacava nutupihamirauchavi núti. Nucapecaturarahiquenehi —máichapa.

Matiarihihi ema Jacobo émapa ema Juan, machichanaveana ema Zebedeo. Machamurianahi ema Pedro. Énerichuvare tiáramecanarinehi éna, énapa ena apamuriana natiarihiqueneanahi. Émasera ema Jesús máichapa:

—Vahi picupica, Simón. Pínajicainapa puiti eta juca pématanerepini. Núti níjaracaviya eta apana pématanerepiyare. Pitanucainapa ena achaneana nuchaneranaya —máichapa.

11 Tacache, te nachurupaicapa eta napacureana te tiájipahi, étapa nanaquisinehi. Tiyananapa náehicapa ema Jesús.

Ema Jesús macanaraca ema émana achane leproso

(Mt 8.1-4; Mr 1.40-45)

12 Tacache, eta mánucuirapaipahi ema Jesús eta avasarechicha, mácapajicapa ema émana achane macajumaquenehi eta lepra, tamutu eta máquehe. Eta máimairahi ema Jesús, máitecapauchapa. Tépuyucapa te mamirahu. Máichapa:

—Tata, nucasiñavahi eta piyehe, picanaraca-nupaini.

13 Majicapapa ema Jesús:

—Nuvaraha nucanaracavi. Tájinapa píchiravaina puiti —máichapa.

Manacapa eta mavahu. Énevanerinehi témitiacahi eta majumainihi. ¹⁴ Matuparacapasera ema Jesús. Ánipa máicha:

—Pímaha, nacuija picumetaca eta nútirahi nucanaracavihi. Piyanavaresera pímerecava nayehe ena tuparairucana, apaesa náimamacavi. Énainapa timetajiricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta pihasulupayachirayare taicha eta macanarasiravihi —máichapa ema Jesús.

¹⁵ Tásihasera, náechapa namutu ena achaneana te avasareana eta maitupajijiasiravahi ema Jesús. Nayanauchapaipa ena camuriqueneana achaneana, navarairahi nasamararacayarehi, macanarasiravacayarehiva tayehe eta najumana. ¹⁶ Émasera ema Jesús, majunijimurihachucha. Tiyanapa tayehe eta mávapahianahi apaquehe. Ánaqui mayujarasihayarehi.

*Ema Jesús macanaraca ema émana achane macajumaquene eta muracaquicha
(Mt 9.1-8; Mr 2.1-12)*

¹⁷ Étana sache ema Jesús tímiturecahi te tajuhe eta peti, camuriana ena achaneana. Natiarihihivare ena fariséoana tépiyacavana religísoana, énapa ena escribánoana, tímatiana eta nayeherepiana ena israelítana. Éna, tiásihanahi te Jerusalén, ena apamuriana tiásihanahivare te avasarechichana tayehe eta Galilea, étapa te Judea. Ema Viya máimicatacahi ema Jesús eta macanarasiravacayarepahi ena

nacajumaqueneana. 18 Títecapanavarepa ena apamuriana, námapahi te áchuji ema achane muracaha. Navarahainipa nacasiapa te tajuhe te mávihahi ema Jesús. 19 Étasera eta nayututusiravahi ena achaneana, vahi náitujicavahini nasiapahini. Tímipanerechavanapasera náimiapanapa te tamaequehe eta peti. Navetatamaequechapa eta peti te manapaicahi ema Jesús, nacajuchuchucapa ema macajumaquene. 20 Tacahe, te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi, nucaepahainavipa.

21 Ena escribánoana énapa ena fariséoana, eta napanerequenehairahi eta macayemaquenehi ema Jesús, tisemanarinehi. Ánipa nacahe te nasamureana: “Ema maca tímijachavaipapuca Viya eta macaepahairayaréji eta pecatuana. ¡Tétavicava eta matapirava! ¡Taicha macarichu ema Viya marataha macaepaha eta pecatuana!” tacahehi eta napaneruana.

22 Émasera ema Jesús máimatihí eta napaneruruanahi. Máichavacapa:

—¿Tájaha tacayema téjecapavahi eta epanereruana? 23 Tájina táejeravaina eta níchirahi ema maca: “Nucaepahainavipa eta pipecaturanaini”. Máejerarepánapuca eta níchahini: “Péchepuca, piyana pipaica”. 24 Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha

eta pecatu te juca apaquehe. Ímararacanu —tacahe, máichapa ema macajumaquene—. Puiti nuchicha, nuvanecavi péchepuca. Piveha eta jara piyereruva. Piyana te pipena —máichapa ema Jesús.

²⁵ Enevanerinehi téchepuruca ema macajumaquenéni. Mavehapa eta mayereruva. Tipacipa te namirahu ena achaneana. Tiyanapa te mapena. Ichaperinehi eta macunachirapahi ema Viya. ²⁶ Ichaperinehivare eta náramirahi namutu ena natarihiqueneanahí. Tétavicavarinehi eta nacunachirahi ema Viya, napicaucharinehivare. Ánipa nacahe:

—Tétavicavapa táramicareva eta juca vímahaquenehi puiti —nacahepa.

Ema Jesús máichuha ema Mateo, mayeheyare apóstole

(Mt 9.9-13; Mr 2.13-17)

²⁷ Te táequenepa eta júcana, ema Jesús tiúchucapa. Eta mapaisirapahi, máimahapa ema achane ticaijare Mateo. (Ticaijarehivare Leví.) Téjacahi éma eta te macatuparahaíyahi eta macobrarezirahi eta impuesto.

—Yare, péhicanu —máichapa ema Jesús.

²⁸ Enurujipa téchepucahi ema Mateo. Manaquicapa tamutu eta matuparahainihi. Tiyanapa máehicahi ema Jesús.

²⁹ Tacahe, te jena sácheanahi, tépiyarecapa eta fiesta ema Mateo te mapena. Máichuhapa ema Jesús eta máenirisirayarehi, énapa ena camuriqueneana macutiqueneanahí ticobrarecarahiana impuesto, énapa ena

apamuriana máemunacasareana ema Mateo.
30 Natiarihihivare ena máimitureana ema Jesús. Tásiha títecapanavarepa ena fariséoana énapa ena escribánoana. Eta tímiyanavacahi, ticaecahirecanayarehi. Ánipa náichavaca ena máimitureana:

—¿Tájaha tacayema ecachanemuri eta enisirahi ena nánitatajiana ticobrarecarahiana eta impuesto? ¡Tétavicavahi eta nacapecaturaraivahi! —nacahepa.

31 Émasera ema Jesús, te masamairiricapa eta náechajiriruvanahi, máichavacapa:

—Ena majumareanahi vahi nácamunuimahi ema médico. **32** Núti, vahi étaina tímitecanu nutanupanavacayare nácani matapiravareanahi. Eta tímitecanuhi núti nutanupanavacayare ena tisipecaturanapanahí apesa náitsivacha etá napanereruana, náeneuchavapa me Viya — máichapa ema Jesús.

*Nayaserecapa ema Jesús tayehe eta ayuna
(Mt 9.14-17; Mr 2.18-22)*

33 Tiuri, nayaserecavare ena achaneana ema Jesús:

—¿Tájahapuca tacayema vahi ayúnanainahíni ena pímitureana? Énayapasica ena máimitureana ema Juan náichahi eta muraca ayuna etá nayujarasirana. Énaripa ena fariséoana, énerichuvare. Tásiha, ena pímitureana píti tinicanahi, téranahivare —náichapa.

34 Majicapapa ema Jesús:

—Nímicutichinahe puiti. Vahi táuricaimahi ayúnanainahíni icha ena íchuhaqueneanahi

tinicanayare nayehe ena araimana. Tiúrisamu-reanayarehi taicha matiarihihi ema arayena. Tájina táuricahini ayúnanaínahíni. Téhesera te tépenapuca éma, jéhesare ticatisamurevanayare. Tacutiquene, vuíchaha táuricaimahi ayúnanaínahíni ena nímitureana.³⁵ Járajapainapasera eta sácheyare, ticaverejicasianayare, taicha ticaratacanuanainapa ena ticapacanuanayare núti. Jéhevarepa ayunanainapa.³⁶⁻³⁸ Esamanuchaha. Eta juca eta nímiturapiána, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tácoticacaimahi eta nayeherepiana ena apamuriana achaneana. Eta ítusirahi éti eta nímiturapiána, tavaraha ínajica eta ichasi eyeherepiana tamauriqueneanahi.³⁹ Ticajerasera eta náinajisirahi ena achaneana eta nayeherepiana tamauriqueneana. Apaesachicharichu eta navarairahi naicha eta juca arairu nayeherepianayare. Namutuyaréni navaraha náimiyanava eta nayeherepiana tásihaqueanahí eta napanereruana ena náchucanaveanaini —máichavacapa ema Jesús.

6

Ena fariséoana náimipicauchahi eta nayeherepiana tayehe eta sávarumuhuana. Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare

(Mt 12.1-8; Mr 2.23-28)

¹ Eta jena sache sávaruquenehi, tiyanapa tipaica ema Jesús. Mámamurihapa ena máimitureana. Témehicavanapa ena fariséoana.

Náetavivijicapaipahi eta isanitiana. Tacahe, eta napaisirapahi, ena máimitureana navechuquihapaipahi étajavapahi eta trigo. Navepiraquihipaipa, tépurajacachavanapaipa. Tinicanapaipa. Tísapacareichucha eta nanisira, taicha técuhanahi. ² Tacahe, eta náimarasirapahi ena fariséoana, tisemanapaipa. Ánipa naicha:

—¿Tájaha tacayema vahi epicaucha éti eta juca sache tacapicahuquenehi? Écharichuhi éti vahi tísapacaré mahi eta vicaematanerahi puiti. Eta juca evepiraquihipahi eta trigo, ticaijare ecaematanehi —náichapa.

³ Tásicha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahí ema víyarahainí David eta mapaisirapahi técuhipaipa, énerichuvare ena téhicanapahi. ⁴ Écharichuhi éti te masiapapa eta mapena ema Viya, tiyaseserecapa eta manicayarehi. Náijaracapa eta pan tacapicahuquenehi nanacasarehi te namirahu ema Viya. Nanicasarehi ena tiyujaracarahaní émasera ema David vahi tátuparacahini manicahini. Étasera eta máecuavahí, manicapa eta pan, énapa ena macachanequeneanapahi.

⁵ Tiuri puiti, numetacaheyare: Nuti Manerejirunuhi ema Viya, nútirichu néchahi eta sache nanarasirayare ena achaneana —máichapa.

*Ema Jesús macanaraca ema achane tépenavahu
(Mt 12.9-14; Mr 3.1-6)*

⁶ Tiuri, te apanapa sávaru, tiyanavarepa ema Jesús tayehé eta náurujisirareva.

Tímiturecavarepa. Tásicha, matiarihihi ema émana achane, ticajumahi eta mavahu váure. Vaipa tayamuricahini, tépenavahuhi. ⁷ Natiarihihivare ena escribánoana, énapa ena fariséoana. Náimaharipahi ema Jesús te macanaracayarehipuca ema macajumaquene eta jena sache tacapicahuquenehi. Natanunuiricahi eta tiviuchayarehi éma. ⁸ Émasera ema Jesús máimatihi eta napanereruana éna. Tacáhe, máechajicapa ema achane ticajumavahuhi. Máichapa:

—Yare, pitupihayare ani te namirahu ena achaneana —máichapa.

Tásicha, titupihapa ema achane te namirahu. ⁹ Tásicha, máichavacapa ema Jesús:

—Nuvaraha epanerechaya. Puiti juca sache sávarumuuhuhi, táuricahi víchaya eta táuriqueneana, ¿masi? Táuricahi vípuchayare ena nacajumaqueneanahi, ¿masi? ¿Ímijachapuca tiúriyare eta víchirayare eta tamauriqueneana, vicaparecapuca ena achaneana? ¿Tájahasica eta epanerechahi? —máichavacapa.

¹⁰ Tacáhe, ema Jesús máesenimurihana ena achaneana. Tásicha, máichapa ema achane macajumaquene:

—Nímaha, picajaruvauchava pímereca eta pivahu —máichapa.

Eta máimeresirahi eta mavahu ema achane, enevanepa tinaravauchavanepa. ¹¹ Tacáhe, tisemanarinehi ena fariséoana eta náimairahi. Tásicha, tiyaserejircacanapa:

—¿Tájahapuca vícharacaini ema mácatataji eta táimicaviúchaini? —nacahepa.

*Ema Jesús manerejica ena dócequeneana
apóstoleanayarehi
(Mt 10.1-4; Mr 3.13-19)*

¹² Te jena sácheinahí, tiyanapa ema Jesús tayehe eta tápusi eta márijuecu. Tamutu eta jena yati tiyujaracahi me Viya. ¹³ Te tijarahipa, máichuhavacapa namutu ena máimitureana. Manerejicapa ena dócequeneana mayeheanayarehi apóstole. ¹⁴⁻¹⁶ Ena nani ena manerejiruanahí: ema Pedro (éma ticaijarevare Simón), émapa ema maparapeichuhi ticaijare Andrés; émapa ema Jacobo* émapa ema maparape Juan; émapa ema Felipe; émapa ema Bartolomé; émapa ema Mateo; émapa ema Tomás; émapa ema apaña Jacobo; émapa ema apañavare Simón; émapa ema Judas; émapa ema Júlasi Iscariote (ema tíjararecahi ema Jesús).

*Ema Jesús máimitucavaca ena camuriqüeneana
achaneana*

(Mt 4.23-25)

¹⁷ Tacáhe, tichavapa ema Jesús, énapa ena máimitureana. Te tachachacu eta mari tainunapahinepa, étapa nacainunainehi ena camuriqüeneana achaneana. Ena nani

* **6:14-16** Ema apaña Jacobo machichahi ema Alfeo. Ema apaña Simón, tímaticarehi éma, náumurivainihi ena revolucionárioana ticaijareanahí “cananístan”. Navaraha náquijica ena extranjeroana romanoana, énaripa nacapaquerecavacahi ena israelítana. Eta májuchirahi ema Lucas, ani macahehi: “...ema Judas mayehe ema Jacobo...”. Váipasera vecha te machichahipuca ema Jacobo, téhevare maparapehipuca. Véchahisera eta mapapirahi eta máijare ema Judas. Ticaijarehi Lebeo étapa eta Tadeo. (Te pivaraha pécha, pitanuca te Mateo 10.3 étapa te Marcos 3.16-19.)

tiásihanahi eta te avasare Jerusalén, eta te provincia Judea, étapa eta provincia Siria. Eta tímitecanahi éna, navarahahi nasama ema Jesús eta máimiturapiana, navarahavare macanaracavacahini tayehe eta najumana. **18** Ena ticatajivanahi návaháruanahi ena éreanana, macanaracavacapasera ema Jesús. **19** Namutu ena achaneana navarahahi náemamahaca ema Jesús taicha náechahi tinaracanayarehi eta najumana eta náemamahasirayare taicha titupajijiacavahi éma.

*Ema Jesús máimituahi nayehe ena
ticunachacareanahi me Viya
(Mt 5.1-12)*

20 Tacache, máesenimurihana ema Jesús ena máimitureana. Máichavacapa:

—Éti ímatihi eta tacamuñuqueneanahi eta iáchanevana, tétavicavahi eta iúricacarevayarehi taicha máejerare eta ejacapirayare eta máechajiruva ema Viya, machanerahérayarehi. **21** Eti ejamurachahi puiti eta ítaresirahi eta matapiravarecare te mamirahu ema Viya, tétavicavahi eta iúricacarevayarehi taicha tíjaracaheyare éma eta evarahaquenehi.

Eti íyauchavanahi puiti taicha eta epecaturana, tétavicavahi eta iúricacarevayarehi. Títecapainapa eta evapinavairaya, écavainapa, taicha eperdonachacareya me Viya.

22-23 Eti nuchaneranahi, járajapainapa eta sache ticatianacaheanainapa ena achaneana, navarahainapa tiáquijicaheana. Tipanararachaheanainapa. Nacatianapicainapa

eta íjareana. Eta juca náichiraheyarehi, táichavenehi eta éhisiranuhi nuti Manerejirunuhi ema Viya. Váhisera ecuarami eta juca. Ene nacahehi eta nacatajivairahi ena profetanaini. Te tictorianacaheanahi, jecurisamurechavachucha, evapinavavare! ¡Tétavicava eta iúricacarevaya taicha ejacapainapa eta ícuchirichuhi te anuma!

Ema Jesús máimituahi nayehe ena tavayuaruanahi eta tájiparacana

²⁴ Tacahe, ema Jesús máechajicapa ena apamuriana achaneana, tímicutijiricavahi natarihihi te mamirahu, tiyerehianahisera éna. Ánipa máicha:

—Eti evapinavapa eta ecaimahaquenerahi, páurehesamiyare éti. Tíchecuhainapa eta evapinairavainihi.

²⁵ Páurehesami eti esatuhehererecanahi, taicha ichapenapa eta écuhairaya.

Páurehesami eti ecasamureana eta piesta, écarairicavahi, taicha ichapeyare íyairaya, ecatisamurevainapa.

²⁶ Páurehesami eti namunaneanahi ena achaneana. Eta tacahehi eta nacunachiravacahi ena profetana tépiyacavanahi tímijachavana mavanaranahi ema Viya, tivayuarahianahisera.

*Vémunacayare ena tictorianacahaviana
(Mt 5.38-48; 7.12)*

²⁷ Puítiripa eti esamanuanahi, numetacahe: Émunacayare ena tictorianacaheana. Ímereca eta iúriva nayehe ena ticatichaheanahi. ²⁸ Eyaseaca ema Viya eta nayujarahuina nácani téchajicanahi eyehe. Eyujaraucha ena tiúmehaheanahi. ²⁹ Te máehahepuca mácani achane te emira, vahi

ecujicapa. Íjaracasera eta étachacaya eta emira. Te naverejicahepuca eta esacu, ísapayare. Te naverejicahevaré eta ecámisa, énerichuvare ísapayare. ³⁰ Énaripa nácani tiyaseacaheanahi eta ecajirayare, íjaracaya. Te naverejicahepuca eta ímahaqueneana, vahi ecucamesa eta náimichaviraina. ³¹ Numetacahe eta apaña: Te evaraha eta náuriraya ena achaneana eta eyehe, tituparacahe iúriyare éti eta nayehe.

³² Éti, tájina ecunachacarevaimahi eta me Viya, te nacarichuhi émunaca nácani témunacaheanahi éti. Apanasica témunarahiana ena máimatirahanahi ema Viya. ³³ Tacutiquene, tájinavare ecunachacarevaimahi me Viya, te tacarichuhi icha eta táuriqueneana nayehe ena tiúrianahi eyehe. Apanasica títsirijicavanahí ena máimatirahanahi ema Viya. Tituparacahe ecachuricavacayare eta iúriva. ³⁴ Téhevare nacarichupuca íjaraca nácani títsirijicavanahí te ticapuchaheana, tájinavare tacunachacarevaina eta me Viya. Apanasica ena máimatirahanahi ema Viya tíjaracana ena títsirijicavanahí te ticapurecana. ³⁵ Étisera émunacayare ena ticatianacaheana. Íchayareva eta táuriqueneana nayehe namutu. Íjaracavare nácani ticapuchaheana. Vahi ecucuchapa eta náitsirijirápiyare. Máimaharine ema Viya. Éma tíjaracaheyare eta táitsivayarehi eta iúriyanahi. Eta tacahehi eta ímereuchirava eta machichaheira ema Tata Vicaiyaquene. Taicha éma, tétavicavahi eta máuriva nayehe namutu ena váinaraqueneana énaripa ena máechavaranahí eta máemunasiravacahi éna. ³⁶ Ejapanurahiyareva, ecutiyare eta majapanuirahavihi ema

Tata Vicaiyaquene.

*Ema Jesús tímítucahavi eta vahi vicucune eta náejecapiravana ena apamuriana achaneana; vítinasera vicuneuchava
(Mt 7.1-5)*

³⁷ Vahi ecunemahi eta náejecapiravana ena apamuriana achaneana, váhivare ecucaecahivaca, machu étina táimicuñacahe me Viya. Te máejecapavapuca mácani achane, vahi ecuvaraha macaicuñavane, apaesa vahi macuicuñacahe éti ema Viya. Eperdonacha ena téjecapavana eyehe apaesa maperdonachahe ema Viya. ³⁸ Ecajirahiya nayehe ena achaneana. Ema Viya títsirijicavayare eyehe. Tímepanávainapa eta máijararuheyare éma. Te iúrihi éti nayehe ena achaneana, ema Viya, tétavicavayarehi eta máurivaya eta eyehe éti.

³⁹ Tacache ema Jesús, ánipa tacache eta máimiturapi, máimicutichirahi:

—Váiparinehi tichurucacanaimahi ena apinana púchuquiana, taicha tiáquipaicavanayarehi te pusu. ⁴⁰ Émaripa mácani amaperu te escuelahipuca, váiparinehi macachuricaimahi mácani mayehe maestro. Tapaenumava te máitucapa, macutisarepa ema mayehe maestro.

⁴¹ Vahi taurica eta ecunerahi eta ánicchichaqueneana náejecapiravana ena apamuriana achaneana. Tituparacahe ecuneuchava eta táichapeva eta ejecapirava étijiva. ⁴² Vahi tituparacahemahi étupirica eta jácani ánicchichaquenehi máejecapiravahi ema eparaepiya. Tájina eviyahini eta econsejarapinahini. Ichapesera

eta tatuparasirahéhi étupirica eta éjecapiravanahi éti. Tapaenumava eta étupirisirapa eta íchavaquenévanahi, tauricapaini econsejachá ema eparaepiya tayehe eta máichavaquenévahi.

*Ema Jesús maimicuticha nayehe ena achaneana
eta tacahirahi etayucuquiana*
(Mt 7.17-20; 12.34-35)

⁴³ Tacutiquene tímaticarehivare eta táhiana eta yucuquiana. Jararihi eta tinicacareana. Jararihivare eta vahi tánicacare. ⁴⁴ Énerichuvare eta yucuqui tímaticarehi eta táurinisiva eta táhi. Étaripa eta sitavere, váiparinehi tiúchucaimahi eta táhinhini narasahinahipucaini. Tásiha, eta ijicaqui váiparinehivare tacahimahi eta tahi cachicheruhinahini. ⁴⁵ Ene nacahe nácani tiúriana achaneana tatupiruvahi eta náechajirisirava taicha tiúrihi eta nasamure. Nácanisera achaneana váinarajipaneruana, vahi tiúrimahi eta náechajirisirava. Tíñemahipivacahi taicha eta tavayuchahi eta tavainarajiva eta nasamure.

*Ema Jesús maimicuticha ena tisuapajirahiana
énapa ena masuapajirairahana*
(Mt 7.24-27)

⁴⁶ ¿Tájaha tacayema eta échajicanu éti, “Tata náquenu” ecahepa; tásiha vahi esuapahini eta nuvanairipiana?

⁴⁷ Nácani tisuapanuanahi náitauchahivare eta nuvanairipianahi, téchemarahianahi táicha. Nuvaraha nímicutichinahe éna. ⁴⁸ Nacutiyarehi mácani tituca ticatupiareca peti, manacayarehi eta túmeana yucuqui emuruquiana. Tiúpenavacahi máicha eta masucuqueruana. Jéhesare te járajapapa

eta muraca técaticava, tiámaquiha eta tiquiva, tisiamapa eta une, váipasera tacaeyayacahini eta peti, taicha máetupiricahi eta máepiyasirahi. **49** Nararihivare ena tépiyacavana tisuapanuana, váhisera náitauchahini eta nuvairipiana. Éna nacutihi ema máitucaraha tépiyareca peti. Vahi manacaimahi eta túmeana yucuqui, váhivare táusiapirahini máicha. Te járajapapa eta muraca técaticava, tisiamavarepa eta une, tacajimuyapaicapa eta apaquehe. Tíjahúchavapa tiáquipaicava eta peti, témitiequenepa tamutu — máichavacapa ema Jesús.

7

*Ema Jesús macanaraca ema manusura ema capitán romano
(Mt 8.5-13)*

1 Tiuri, te titapiricapa ema Jesús eta máimitusiravacahi ena achaneana, tichavapa eta te avasare Capernaúm. **2** Matiarihihi ema achane apavasana. Comandante éma nayehe ena suntaruana romanoana. Capitán eta mávacure. Ticajumahi ema manusura. Tiánehiripahi tépena. Ichaperinehi eta máeñamiravahi taicha máemunaruquenehi ema manusurahi. **3** Tacahe, te masamairiricapa ema capitán eta matiarihirahi ema Jesús, máevatacavacapa ena náiyamurianahi ena israelítana náichuhapanayarehi ema Jesús, macanarasinapanahini ema manusura. **4-5** Tacahe, te náitecapauchapa ema Jesús ena vanairucanahi, nayaseacapa, ánipa naicha:

—Mararihi ema capitán te viávasahi. Ichapemuri eta máimicatasirahavihi. Máemepiyarecahivrete eti ichape peti eti viúrujisirareva eti viyujarasirarehi. Tásicha puiti, tivanecahavihi víchuhapanávi picatajicahini picanarasinapanahini ema mamusura. Tatuparacahi pímicatacaini ema maena — náichapa.

⁶ Tacahe, ema Jesús tísapavapa tiyana, máehicavaca éna. Étasera te tiánehianapa eti mapena, mavanecavaca ema capitán ena máimaticasareana, nametapana ema Jesús. Ánipa naicha:

—Tata Jesús, eti juca máechajiriruvahi ema capitán: “Tata, vahi picucaeñamacava eti pítesiraina eti nuyehe, taicha vahi táuricahini pisiapauchanusamihini te nupena. ⁷⁻⁸ Eta tacahe, vahi nupatsicavahini nútijacarúvainahini níchuhapanávi. Németeaca tarataharichu picavanairipi eti picanarasiraya ema numusura. Taicha nuti nusuapahi te tivanecanuana ena anuquehepananahi eti nuyehe. Nútiripa nusuapacarehivrete nayehe ena nusuntaruranahi. Te nuvanecavaca, téhevare níchuhavacapuca, tisuapanuanahi. Te nuvanecapuca ema nuvaneru, enurujipa tisuapanuvane” macahepa.

⁹ Te masamapa ema Jesús eti juca, ichaperinehi márami eti yátupirahi macasiñavairahi eti mayehe. Máichavacapa ena téhicanapahi:

—Numetacahe: Nájina nímaha émanaina vijaneana israelíta mágutini ema maca achane

apavasana eta macasiñavairahi eta nuyehe — máichavacapa.

¹⁰ Tacahe, nacarinepa tichavanahí ena vanairucana. Te títecapanapa, náimaharinehi ema macajumaquenehini, tinaracaripa.

Ema Jesúis macaechepuca ema amaperu máepenaquenehi, suchicha esu esena suépenaimaquene

¹¹ Te táequenepa eta juca, tiyanavarepa ema Jesúis tayehe eta avasare ticaijare Naín. Náehicaphahivare ena máimitureana, énapa ena camuriqueneana achaneana. ¹² Te títecapanayarepa te avasare nácapajicavacapa ena achaneana tiámanapahi ema máepenaquene, náecarayarehi. Camurianapahivare ena achaneana téhicanapahi. Éma máepenaquenehi, macarichuhi suchichahi esu esena suépenaimaquenehi. ¹³ Eta máimairahi ema Viáquenu, majapanurinehi esu esena. Tásicha, máichapa:

—Vahi picuiyaha —macahepa.

¹⁴ Tásicha, mapauchapa ena tiámanapahi ema máepenaquene. Titupihanapa éna. Máemamahicapa eta macajone. Tásicha, macahepa:

—Nuchicha, nuti nuvanecavi, péchepuca —macahepa.

¹⁵ Enevanelinehi téchepucapa ema amaperu máepenaquenéhi. Téchajicapa ema amaperu. Tásicha, ema Jesúis máijaracapa esu maena.

¹⁶ Tacahe, ichaperinehi tiáramicarehi eta juca nayehe ena camuriqueneana achaneana. Ánipa nacahe:

—Tétavicava eta macunachacareva ema Viya. Jéhevare ema maca achane yátupiquene profeta,

mavaneruhi ema Viya. Tétávicavapa táurisamure-careva eta máuchusirahi te vimuri —nacahepa.

Ena apamuriana ánivare nacahe:

—Ema Viya tiúcupauchahavihi tímicatapana-havihi viti machaneranahi —nacahepa.

¹⁷ Eta juca máichaquenehi ema Jesús, téchacrevanepa tamutu avasareana te návasanahi ena israelítana. Títecavarepa te tányerehiqueneana avasareana.

*Ema Juan Tícachasiricarahi mavanecavacapa ena máimitureana
(Mt 11.2-19)*

¹⁸ Énerichuvare ema Juan, te mávihahi te cárcel, masamairiricapa eta juca taicha nametacapa ena máimitureana. ¹⁹ Tacahe, máevatacapa ena apinana, nayaserepanayarehi ema Jesús te yátupihipuca émaripahi ema Cristo ema macuchapa-quenehi. ²⁰ Tacahe, ena vanairucanahi me Juan náitecapauchapa ema Jesús. Nayaserecapa, ánipa náichahi:

—Ema viáquenu Juan tivanecahavihi viyaserepanavyare te yátupihipuca pítiripahipuca Cristo ema vicuchapaquenehi. ¿Téheserapuca vímiyanavayarepuca vicuchapa? —náichapa.

²¹ Eta náitecapauchirahi ema Jesús, éma ticanrararerecaichahahi ena nacajumaqueneana, énapa ena nacajaraqueneana. Máquijicavare ena éreanana tiávahácanahi nácani achaneana. Macaimairiricavare ena maveraqueneana púchuquiana. ²² Tacahe, ema Jesús majicapavacapa ena vanairucanahi me Juan. Máichavacapa:

—Nuvaraha ímararacaya eta níchaqueneana puiti. Nucaimairiricavacaipa ena púchuquiana.

Nímipaisiraipa ena masariana. Nucanaracavacaipa ena leprósoana, énapa ena túhuquiñana. Nucaechepusiravacaipavare ena náepenaqueneanaini. Énerichuvare níchuhahi ena páureana náeneuchava apaesa náuchucuha. Tásicha, eyana emetaca ema Juan tamutu eta níchaqueneanahi. ²³Vaipa macueñamava ema Juan eta nuyehe. Tétavicavapa eta máuricacarevahí éma, te ticasiñavahí eta nuyehe —máichavacapa ema Jesús.

²⁴Tacahe, tichavanapa ena vanairucanahi me Juan. Tásicha, tépanavavarepa téchajica ema Jesús, máechajisihapa ema Juan. Ánipa macahe eta mamegasiravacahi ena achaneana:

—Nuvaraha epanereuchayare ema Juan. Te jácani vuíchaha nacaratacrahini éma, te eyanapa te mávapahi apaquehe te mávihahi, ¿tájaha eta epanereruana tayehe eta macametarairuirahi? Éti ímijachavaipapuca mamapachichijiruvaichucha eta máechajisirahi tacutihi te vímararaca eta taflurena eta acutena te tacayamuririjicahi eta técaticava. ²⁵Ímijachaipavarepuca tavayuaruhi ema tiúrinanácavayarehi eta macamuirihairahi. Écharichuhi éti mácani tiúrinanacavahi, píncanillahi eta máitaresira, váiparinehi tiúchucaimahi te sache, vahivare tiyanaimahi te mávapahiana apaquehe. Manasiqueneyarehi te jácani tiúrina peti. ²⁶Nuyaserecahe: ¿Nájahapuca ímijachahi éma? ¿Ímatihipuca eta profetairahi éma? Núti numetacahe: Matupiruvahi eta macametarairuirahi ema Juan. Mavaneruhi ema Viya eta yátupiquenéhi profetahi éma. Nájina

mácutihini ena apamuriana profetana. ²⁷ Ema maca Juan émara máechajisihaquenehi ema Viya eta te Sagrada Escritura, ánipa macahehi: “Nuvanecayare ema tínapumirauchaviyarepahi ema ticametarairuyarepahi, apaesa natseca-vapaipa ena achaneana eta najacapiraviyare” tacahepa eta Sagrada Escritura. ²⁸ Núti nutupiruva numetacahe: Ema maca Juan, nájina mácuti nayehe ena achaneana. Tétavicava eta macunachacarevahí. Iápjupanavahisera eta ecunachacarevahí eti nuchaneranahi, apaesachicharipa eta ecaicutiarairahi eta mapanereruanahi ema Tata. ²⁹ Ena achaneana, énaripa ena tisipecaturarahianaini, náimatiacahi ema Juan eta mavanecasivahí me Viya. Nasuapahivare eta mame tarairuana ema Juan. Eta tacahe, ticaicachasianapa mayehe. ³⁰ Énasera ena fariséoana énapa ena máestroana, éna másapavarahanahi nacaicachasihini mayehe ema Juan. Témpururecavanaripa eta náurivayarehini maicha ema Viya.

³¹⁻³² Etiarihihi eti achaneana puiti juca sácheana, eta emasuapajiraivahí, nímicutichinahesa ena amaperuana tiútseruanahi. Apapijichucha eta nacayemaqueneanapahi. Ema apana macahepapuca: “Vépiyacapa eta piéstachicha”. Énasera ena apamuriana vahi náisapavahini. Tásicha, ema apana macahepuca: “Vépiyacapa eta ecari”. Váhivaresera náisapavahini. ³³ Ema Juan Tícacachasiricarahi, te tímerecavapa, muraca eta máimiturapi anahí. Eta manicasareana, vahi tácutihini eta nanicasareana ena achaneana.

Nararihisera te emuri ena tépiyaequenehanahi éma. Náimijachahi mávaháruhi ema éreana.

³⁴ Núti Manerejirunuhi ema Viya, eta nítecapauchirahepa, nucachaneheripa eti achaneana eta enisirahi. Etiarihihivaresera eti épiaequenehanuhi: “Ímaha ema maca, cánisiuquitataji, cávahárasí. Macachanevacapaipa ena cóbrarecarahianatataji énapa ena apamuriana nasipecaturarahiqueneanahí”.

³⁵ Éti épiajavapa épururahi, ticutirinehi yátupinahini échemarahihini. Tétavicavahisera eta ejecapiravahi taicha eta emasuapajiraivahi. Te yátupihipucaini échemarahihini, ímatinuhini eta nucavanahirahi eta me Tata*.

Ema Jesús ticaichuhacasihi te mapena ema fariseo ticaijarehivre Simón

³⁶ Matiarihihi ema achane ticaijarehi Simón, fariséohi éma. Macumpirachapa ema Jesús, manipana te mapena. Masuapahisera ema Jesús. Tiyanapa. Te tiúripa eta tinicacare, téjacapa te mesa. ³⁷ Susamairiricapa esu ésuna esena tisipecaturarahinihi eta matiarihirahi ema Jesús te mapena ema fariseo. Tásicha, tiyanapa supauchahi ema Jesús. Suámapaipa eta bótechicha. Tínicapahi eta táijiyequene perfume tasivachaquenehi. ³⁸ Tépuyucapa te máivapeana ema Jesús. Tíyahacavapa, táetsipapapevachapa eta sutsera. Suájahapa te

* **7:35** Eta juca mayeherepi proverbio ema Jesús te máechariuruva, ani tacache: “Eta téchemarahicare, éta nacunachihayare namutu ena tachichanaveana”. Tatarihi eta tacayemaquenehi tayumurevahi.

suchutimaca. Tásiha, suépusapevachavare eta suámaquenepahi perfume, sutsiucapevachavare. ³⁹ Tacahe, eta máimairahi ema fariseo eta juca, mapanerequenehapa. Téchajicapa te masamure: “Te yátupinahini profetainahini ema maca, máimatiacaripahini esu suca esena eta susipecaturaraivatatajihí. Vahi táuricahini suémamacahini” macahesamurepa. ⁴⁰ Émasera ema Jesús masamahi eta mapanereruhi ema fariseo. Máichapa:

—Simón, jucarihi nuvaraha numetacaviya.

Ema fariseo majicapapa:

—Nímahaseji, pimetacanu, maestro —máichapa.

⁴¹ Tacahe, ema Jesús máimicutiarachinapa, máichapa:

—Natiarihi ena apinana ajairana ticanteveanahi mayehe ema rico. Ema émana ticantevehi quiniento; ema apana ticantevehi cincuenta. ⁴² Tacahe, vahi náratahahini navachachahini eta nanteveana. Tásiha, maperdonachavacapa ema rico ena apinana. Tiuri puiti, nuyaserecavyare. Ena nani apinana, ¿nájahapuca ema témunacapanahi ema rico? —máichapa.

⁴³ Majicapapa ema Simón:

—Ticutimahi ema tisintevepanahi.

Tacahe, máichapa ema Jesús:

—Pímhahipajira.

⁴⁴ Tacahe, ema Jesús máimrararacaripahi esu esena. Tásiha, máichapa:

—Pipanereaca esu suca esena. Puítihí, te nusiapapa te pipena, vahi pímisipacahini eta

nívape. Ésusera esu suca esena tisipapevachanuhi te sutsera, tiájapevachanupa te suchutimaca.

45 Píti vahi pitsiucanuhini eta pijacapiranuhi. Ésusera, ichapemurihi eta sutsiucapevachiranuhi.

46 Váhivare piámasichanuhini eta aceite eta pijacapiranuhi. Ésusera esu suca esena tisipapevachanuhi eta te táijiyequene perfume. **47** Yátupi tisipecaturainihi esu suca. Numetacavyaresera, nuperdonacharipahi ésu tamutu eta supecaturanaini. Eta tacahe, ichape eta suímeresirahi eta yátupirahi eta suémunasiranuhi. Nácanisera apaesarichuhi eta napecaturanaini, apaesarichuhivare eta náemunaraiva, taicha apaesarichuhivare eta najacapiroahi eta nayehe perdón.

48 Tacahe, ema Jesús máichapa esu esena:

—Vahi picueñamava, nuperdonacharipa tamutu eta pipecaturanainihi.

49 Tacahe, ena natarihihipuqueneanahi chimaracanahi náejaruanahi te mesa nacahepa te nasamureana: “¿Nájahapuca ema maca ticaemuñavahi marataha maperdonacha eta pecatuana?” —nacahepa.

50 Émasera ema Jesús máichapa esu esena:

—Táuricapa piyana. Yátupi eta piúchucuhairaya táichavenehi eta picasiñairanuhi.

8

Natiarihihipuqueneanahi ema Jesús te mapaisihapahi tayehe eta avasareana

1 Te táequenepa eta juca, tiyanavarepa ema Jesús, tipaicahi tayehe eta tasimutuqueneana

avasarechichana. Ticametarairupahi eta máechajiriruva ema Viya eta náuchucuirayare ena ticasinavanahi mayehe, machaneranayarehi. Náehicapahivare ena dócequeneana apóstoleana.

² Énerichuvare náehicapahí ena esenana máepachiaruanahi nayehe ena éreanana tiávahá-canainihi. Sutiarihipahi esu María Magdalena, máepachiaruhí nayehe ena siétequeneana éreanana tiávahácanainihi ésu. Natarihihiyare ena apamuriana esenana macanararuanahi tayehé etá apanapanenejiqueneanahi najumanainihi.

³ Sutiarihipahi esu Susana, ésupa esu Juana, mayena ema Chuza. (Ema Chuza, mayehehi empleado ema Herodes, téchahi tamutu eta máimahaqueneana ema Herodes.) Maveranahivare ena apamuriana esenana, tiámauchavanapahi eta nirure, náitátipapahi ema Jesús, énapa ena apóstoleana.

*Eta máimicutichaquenehi evaraqui tacaevaquenehi te apanapaneneji máteji te apaquehe
(Mt 13.1-9; Mr 4.1-3)*

⁴ Te jena sácheanahi, camuriana ena achaneana tiyananapaipa napaucha ema Jesús. Tiásihanapahi te avasareana. Te máimahapa éma ena camuriqueneana, máechajicavacapa; máimicutiarachinapa eta máimitusiravacahi. Ánipa máicha:

⁵ —Matiarihi ema émana achane. Tévapanahi te máesane. Tásihasera, eta mapaisirapahi témiricapaipapuca eta evaraqui te achene. Eta nanucuiraparacahi ena achaneana, nácatayacapaipa eta evaraqui támimiriruanapahi. Táimahapa eta cayure, tanicapa. ⁶ Tásicha, eta

apana evaraqui témiricapa te máripahi apaquehe. Tímarucainipa, tásihasera tájijicapa eta sache taicha muracapahihi eta apaquehe. ⁷ Eta apana evaraqui témiricapa te taparereji eta itapequiji. Tiúrinainihi eta táimarusira, étasera eta ítipe tacachuricapa eta tajurusirahi, taeemuriachapa. ⁸ Eta apana evaraqui témiricapa te tiúrina máteji. Tijurucarahihi eta táimarusira. Tiúrinahivare eta tahi. Táijaracahi ichapemuri eta tahi —macahepa.

Te titapiricapa ema Jesús eta máechajirisiravacahi, máichavacapa:

—Te evarahapuca ecaicutiara, tavaraha eta epanerechinavaya —macahepa.

Ema Jesús máitametacavaca ena máimitureana eta juca máimiturapihi

(Mt 13.10-23; Mr 4.10-20)

⁹ Tacahe, ena máimitureana nayaserecapa ema Jesús tájahapuca tacayemahi eta máimicutichaquenehi mayehe ema tévacarahi.

¹⁰ Émasera máichavacapa:

—Ema Tata tituparacanu nítametacaheyare éti eta juca mapanereruana taequeneruana. Mavarahahi ímatiequenehaya éti. Énasera ena apamuriana achaneana nímicutiarachinavacahi, apaesa vahi máejeraré mahi eta nacaicutiarairaya eta nasamaquenehi. Tavaraha napanerechinavaya. Te vahi yátupina eta navaraira nasuapa, váhivare nacaicutiaraimahi eta nímiturapiana.

¹¹ Étara eta juca tacayemaquenehi: Eta evaraqui tímicutijiricavahi eta máechajiriruva ema Viya eta nímiturapianahi. ¹² Natarihi ena achaneana nasamaripahinéni eta nímiturapianahi, émasera

ema Váinaraji vahi másapahini tánasihini te nasamureana. Enevanehi macamitisicavaca eta nasamaquenehi, mamavarairahi nacasiñanuhini apaesa nucuchucuhavacayarehini. Éna, nacutihi eta máteji muracapahi te achene. ¹³ Natarihivare ena apamuriana achaneana, nacutihi eta máteji máripahi. Te nasamararaca eta nímiturapiana, nasuapa, tiúrisamureanarinehi. Váhisera naratahahini nacaravahuhini yátupinahíni. Vahi nácutihíni eta evaraqui tiúparehi. Ániperichu eta náehisirahi. Tínajicavanávane taicha eta náimairavahi eta nacatajivairahi. ¹⁴ Natarihivare ena apamuriana achaneana nacuti eta máteji te távhahi eta itapequiji. Énerichuvare nasamararacahinéni eta nímiturapiana. Napane-réquenehahinéni, tahapapiricavacahisera eta jácani táicharacavayare eta náitaresira. Váhivare náinajicahíni eta tacaeñamarasiravaca eta tájiparacana, étapa eta navarairahi tirricocharava. Váhivare náinajicahini eta náichirahi eta tamauriqueneana. Tamutu eta juca táemetavicahi eta navarairahi téhicanuana. Tamapurujíhi eta najacapirahi eta nímiturapiana. Tájina vahi nacaematanecahini ema Viya. ¹⁵ Natarihisera ena apamuriana achaneana nacutihi eta tiúrina máteji. Éna, nasamararacahi eta nímiturapiana, náunacahi yátupi te nasamureana. Tájinavare náichiravainahíni eta náehisiranuhi. Ichape eta nacaematanearisrahi ema Viya. Vahi nayacujimahi.

Ema Jesús máimicutiarachava eta lámpara eta

*máimituresira
(Mr 4.21-25)*

16 Ánivare macahe:

—Súnsuanahi nácani tiyustacanahi eta lámpara namicahuyarehi, tásihasera, naijhapaicapa-pucaini, nanacavarepucaini te tápecu eta náetsatsame náimasirare. Vahi tamicauchaimahi. Tacamunuhi nanacayarehi te anuquehe. Jéhesare ticaecherasareyarepa tamutu apaesa nácani tisiapanapahi, tímairiricanayarepahi.

17 Tayanapanepuca ticayumuruquianahi, tamutuyarehisera ticaechera jácani tayumu-rurevanahi. Tájina tépacuchaimahi jácani najajairairuvanahi. Tamutuyarehi téchacareya.

18 Eta tacahe, ecaquiñaicha yátupina eta juca. Taicha mácani máitururuequenehahi yátupi, tiápajucavayarehi eta máitupajijiasiravayarehi. Mácanisera apaesarichuhi eta máitucaquene, te váipa mapanerequenehahini, máemitisicayarehi eta máitucaquenénihi.

Suítcapauchapa esu maena ema Jesús énapa ena maparapenaveana

(Mt 12.46-50; Mr 3.31-35)

19 Tacahe, esu maena ema Jesús énapa ena maparapenaveana títecapanapa te peti te máimituresihahi ema Jesús. Váhisera náitujicavahini nasiapahini taicha tiyututucavanahi ena achaneana. **20** Nametacapasera ena apamuriana achaneana ema Jesús:

—Esu pémunaruquenehi pena énapa ena pipara-penaveana nararihi ani te aneca, navarahahi téchajicaviana —náichapa.

21 Émasera majicapavacapa:

—Yátupi némunacavacahi esu meme énapa ena nuparapenaveana. Nararihisera ani te juca nuchacaya ena némunaruuanahivare, nuparapenaveanahi. Taicha tisuapajirahianahi éna tayeheta máechajiriruvana ema Viya, ticaematananeacanahivare éma —máichavacapa.

Ema Jesús macaesamirica eta táepacusirahi eta une étapa eta técaticava

(Mt 8.23-27; Mr 4.35-41)

²² Étana sache, ema Jesús tiávacuhapa eta te pacure. Tásiha, máichavacapa ena mayeheana apóstoleana:

—Viyana, viánueca te apachara —máichavacapa. Tacahe, tiyananapa tiánuecanayarehi. ²³ Eta napaisirapahi, ema Jesús tívecapa tímacapaipahi. Tacahe, járajapainapa eta muraca técaticava. Tépacucapa muraca eta cáquiure. Tasiapauchapaipa eta une te pacure. Tipicanapa ena máimitureana, taicha tímatiacavanapa eta náecharisiravayarehi. ²⁴ Tacahe nacajamicapa ema Jesús, náichapa:

—¡Maestro! ¡Maestro! ¡Péjamica! ¡Pímaha vécharicavainapa taicha eta tépacuca!

Enevanepa téchepucapa ema Jesús. Macamatinacapa eta técaticava étapa eta táepacusirahi eta une. Tésamirieievacapa tamutu. ²⁵ Tacahe, máichavacapa ena máimitureana:

—¿Tájaha tacayema vahi ácasíñavahini eta nutiarihirapahi eta eyehe? —máichavacapa.

Énasera tiáramecanapa. Tésenijiricacanapa, tásiha nacahepa:

—¡Tétavicavapa eta máitupajijiasirava! ¡Jéhesare, yátupiquene eta émairahi machichahi ema Viya! Taicha eta mavanairipi, tamutu tasuapahi eta técaticava étapa eta une —nacahepa.

Ema achane návaháruanahi ena ichapemurique-neana éreanana
(Mt 8.28-34; Mr 5.1-20)

²⁶ Tacahe, títecapanapa te apachara tayeheli apaquehe eta provincia Gadara. Te apachara tacanaraipahi eta provincia Galilea. ²⁷⁻²⁹ Te tiúcupaicapa ema Jesús, énapa ena máimitureanahi, máuchujiuchavacapa ema émana achane. Ema maca achane mávasaichuhi tayeheli eta juca avasare Gadara. Tájinapasera máimatiyahini mayanahini te peti taicha namaurishichaipahi ena camuriqueneana éreanana tiávahácanahi. Ánaquiaparipa eta návahásirahi. Nametapanéni ena achaneana nacarataca. Náitiaca te ichapepi carena étapa te enure, te náimahavarepa tacananesica naicha ena tiávahácanahi. Émasera, tétavicavaipahi eta matumevahi. Mavechuquimurivare eta carena máitihanahi. Tijunavare, tiyanavarehi te mávapahiana naicha ena éreanana. Macapenajuechavacahi eta ecariana. Mamuriarehi eta máitaresirahi.

Tacahe, te máimahapa eta matiarihirahi ema Jesús, mapauchapa. Tépuyucapa te mamirahu. Ema Jesús mavanecavacapa ena éreanana náinajiacá ema achane. Ema achane tipiararecapa. Ánipa macahe:

—¿Tájaha picha píteca pipauchanu, piti Jesús, Machichaquenevihi ema Viya?

¡Pájapanunu vuíchaha picuvanecanu ánaqui te nucaicuñaiyayare! —máichapa.

³⁰ Tacahe, ema Jesús mayaserecapa:

—¿Tájaha píjare píti?

Ema achane majicapapa:

—Núti nucaijare “Nacapenaharu ena ichape-muriqueneana éreanana”.

Éma, tacahehi eta majicapirahi ema Jesús taicha camurianahi ena tiávahácanahi. ³¹ Tacahe, ena éreanana nayaseacapa ema Jesús vahi macuaquijicavaca te táupenaquene pusu náicuchihi návhayare éna. ³² Tatarihivare eta camuriqneana cúciana. Tinihicanahi te táemiripaisine eta masihi. Ena éreanana nayaseacapa ema Jesús másapahini nasiapahacavaca eta cúciana. ³³ Tacahe, ema Jesús macuchuchujicavacapa te máquehe ema achane, másapahivare nasiapahacavaca eta cúciana. Te tasamapa eta cúciana eta nasiapahasiravacahi ena éreanana, tijunaparacanapa témiririjicanapa te tachausi eta cáquiure. Téririjicanapa tamutu.

³⁴ Natarihivare ena tijaneacanainihi eta cúciana. Te náimahapa, tiáramecanarinehi. Tiyananapa tijunapanapaipa timetajiricanapaipa nácani nácapajiruvanapahi, étapa te avasare namutuvare nametaca. ³⁵ Tiáramicarénehi nayehe ena achaneana. Tiyananapa náimahapana tájahapuca eta táichavaquenevahí eta cúciana. Te títecapanapa, náimahapa ema achane návaháruinihi ena éreanana. Téjacaripahi te máivapechacaya ema Jesús. Tájinarihpahi máichiravainahini. Ticamuirihaipahivare. Tásihasera, tipicanarinehi ena achaneana.

³⁶ Tavetijipa te náitametacapa ena tímahanahi eta macuchuchujisirahi ena éreanana te máquehe ema achane. ³⁷ Tacahe, te nasamairiricapa, namutu ena achaneana ticavasanahí te Gadara, vaipa napatsicavahini máitecapauchavacahini ema Jesús taicha náeñamaipahi tácahémahivaréni eta apamuriana náitátiqueneana. Nayaseacapa ema Jesús machavahini te másinehi. Tacahe, tiávacuhavarepa éma, tichavavarepa. ³⁸ Tacahe, ema achane mayaseacainipa ema Jesús másapahini máehica. Émasera máevatacaichucha machava te mapena. Ánipa maicha:

³⁹ —Piyanachucha pichava te pipena. Pimetajiricaya eta majapanuiravihi ema Viya eta macanarasiravihi —máichapa.

Tacahe, tiyanapa tichavahi ema achane. Mametacavacapaipa namutu eta macanarasirahi ema Jesús.

*Ema Jesús macanaraca esu machicha ema Jairo,
ésupa esu apana esena sucajumaquenehivare
(Mt 9.18-26; Mr 5.21-43)*

⁴⁰ Te títecapavarepa ema Jesús te apachara, enevanepa nácapahi ena ichapemuriqueneana achaneana taicha nacuchaparairicaipahicha. Tiúrisamureanarinehi eta náimairahi éma.

⁴¹ Títecapavarepa ema émana achane ticaijare Jairo. Ema maca achane, tuparairucahi tayehe eta náurujisirareva tayehe eta jena avasare. Tacahe, ema maca achane tépuyucapa te mamirahu ema Jesús. Mayaseacapa macatajicahini mayanahini te mapena, macanarasinapanahini esu machicha.

⁴² Taicha ésunaracavahi esu machichahi. Doce

áñoripahi eta suhañorahi. Téñamajiricavaipahi ésu, taicha eta sujuma. Tacahe, tiyanapa ema Jesús, máehicapa te mapena. Náehicavarepa ena camuriqueneana achaneana. Váipanecha náratavapahini eta napaisirapahi.

43 Sutiarihipavare esu apana esena, sucajumaquenehivare. Doce áñoripahi tayerevahi eta suhitiarevahi. Ichapemuripa eta sutanusirahi ena médicoana, váhisera sucanaracahini ésu.
44 Tépiyayacavapa témeñahava te maquecu ema Jesús. Suémamajiacapa te tacheyarapi eta mamuiriha. Enevanelinehi tinaraca ésu. Tíchecapa eta suítine.

45 Émasera ema Jesús masamarichucha eta suémamajiasirahi. Macahepa:

—¿Nájaha témanajiacanuanahi? —macahepa.
 Nájina tísapavaina.

Émasera ema Pedro énapa ena machamuriana náichapa:

—Maestro, pímaharichuhi eta nasimutuvahi ena achaneana. Tiyututucavanahi te pichacaya. Váiparinehi tímaticarémahi nájahapuca nácani témanajiacavianahi —náichapa.

46 Émasera ema Jesús macahevarepa:
 —Nacañárihi témanajiacanuanahi taicha nusamavahi núti eta nucanarasirahi eta jumare táichavenehi eta nítupajijiasiravahi —macahepa.

47 Ésusera esu esena, tímaticavapa eta máimatirahi ema Jesús eta suémamajiasirahi, tiyanapa supauchahi. Tépuyucapa te máivapechacaya. Tiyayacareripa eta supisirahi.

Sutupiruvapasera timetaurecavahi eta ésuirahi témamajiacahi. Ánipa sucahehi:

—Tata, nútira némamajiacavihi, nuvarairahi nunaraca tayehe eta nujumahi. Nusamavapasera eta nunarasirahi —suíchapa.

48 Tacahe, ema Jesús, máichapa esu esena:

—Tiuri, nuchicha, pinaracapa puiti táichavenehi eta picasiñairanuhi. Vaipa picueñamava eta pichaviraya te pipena —máichapa.

49 Téchajiricavaichahahi ema Jesús eta suyehe esu esena, títecapanecha ema émana achane tiásihahi te mapena ema Jairo. Mametacapa:

—Esu pichicha tépenasamipahi. Vaipa picucamesa ema Maestro —máichapa.

50 Émasera ema Jesús, te masamapa, máichapa:

—Vahi picuarameca, váhivare picueñamava. Pácasíñava eta nuyehe. Tinaracayareichu esu pichicha —máichapa.

51 Tacahe, tiyanavanepa ema Jesús. Te títecapanapa, vaipa másapahini ema Jesús nasiapahini ena achaneana. Nacarichu tisiapanahi ema Pedro, ema Jacobo, ema Juan, émapa ema suiya esu amaperu, ésupa esu suena. **52** Natarihihisera ena achaneana te tajuhe. Tíyahanaripa éna. Te máimahavacapa ema Jesús, máichavacapa:

—Vahi ecuiyaha. Váhira suépenahini esu suca amaperu. Tímacarichucha —máichavacapa.

53 Técavanarichuchasera eta mayehe éma, taicha náimahahi eta suépeniraipahi. **54** Tacahe, ema Jesús macaratacapa eta suvahuana. Tásicha, máichapa:

—Nuchicha, nuvanecavi: Péjamica, péchepuca —máichapa.

55 Tacahe, esu amaperu tichavapa titareca. Tásiha, téchepucavanepa. Ema Jesús mavanecavaca ena ticachichana náijaraca eta sunica. **56** Ichaperinehi eta náramirahi ena ticachichana. Émasera ema Jesús matuparacavaca vahi nacuechajisiha eta náimahaquenehi.

9

*Ema Jesús mavanecavaca ena dócequeneana apóstoleana, napaicayare tamutu avasareana
(Mt 10.5-15; Mr 6.7-13)*

1 Ema Jesús macurujimuriha ena dócequeneana mayeheana apóstoleana. Tacahe, máijaracavaca ena náitupajijiasiravanayare naratahairayare náquijica ena éreanana, naratahairayareva nacanaraca nácani nacajumaqueneanahí. **2** Tásiha, ticavanahianapa ticametaraíruanayare ena tacamunucarevarehi náeneuchiravayarehi ena achaneana, náinajisiraina ena napecaturana, náehica ema Cristo. Ticanararecanayarepahivare nácani nacajumaqueneanahí. **3** Eta mavanesirayacahi, máichavaca:

—Tájina iámaimahi ena eyereruva. Váhivare ecucayupairiquipahi. Tacuijavare ecaniruru-cuhaina te alforja. Étaripa ena plata, tacuijavare iama. Étanainarichu ena emuiriha iámayare. **4** Enasinumayarepahisera te jácani peti nayehe ena tiúrihi ena najacapiraheya. Tiámainucava te táitecapa ena eyanirayareva. **5** Téhesera nacui-japuca nacuvaraha najacapahe tayehe te jácani avasare, váhivarepuca nacuvaraha nasama ena

emetarairuya, iúchucavanepa. Étatapevachavanumayaresera eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehini —máichavacapa.

⁶ Tacache, tiyananapa ena apóstoleana. Tamutu napaica eta avasarechichana. Ticametarairuanapaipahi eta máechajiriruva ema Viya, eta viúchucuiraya majacapirahaviyare éma. Ticanararecanapaipavare ena nacajumaqueneana nácani náetupiaruanapahi.

*Ema Herodes masamairiricavare tamutu eta juca máichaqueneanapahi ema Jesús
(Mt 14.1-12; Mr 6.14-29)*

⁷ Tacache, ema aquenucahi Herodes masamairiricavare tamutu eta tiáramicareana máichaqueneanahi ema Jesús. Váipasera máitucacarehini. Taicha masamairiricahi náimijachahiji émahi ema Juan téchepucahi te máecari. ⁸ Ena apamuriana náimijachahivare téchepuca ema antivuini profeta. Ena apamuriana náimijachahivare ema Elías.

⁹ Émasera ema Herodes macahepa:

—Nútijacaruvahisera nucavanairipi náechatinuca ema Juan, eta máepenirahi. Puiti, ¿nájahapuca ema maca nusamaiririruasaparacahi eta máichira eta tiáramicareana? Nuvarahasa nímatini ema mácará —macahepa.

*Ema Jesús máitaparaha máenicavaca ena camuriqueneana achaneana
(Mt 14.13-21; Mr 6.30-44; Jn 6.1-14)*

¹⁰ Tacache, tichavanapa ena apóstoleana eta napaisirahi. Nametacapa ema Jesús tamutu

eta náichaqueñeanapahi. Tásiha, éma mámamuríhavacapa te mávapahi, tinapaicahi eta avasare Betsaida. ¹¹ Téhesera náechavarepa ena achaneana eta macaijuhehi ema Jesús, tiyananavarepa nacapayacahi. Émasera majacapavacaichucha, máimitumuriharipavare tayehe eta náitaresira ena machaneranahi ema Viya. Macanaracavare ena nacajumaqueneanahi.

¹² Te náimahapa ena apóstoleana cáperehiyareipahi, témeñahavanapa eta mayehe ema Jesús. Tásiha, náichapa:

—Táuricapa pivanecavaca ena achaneana nayanapa natanuca eta nanisiha étapa eta náimasihaya te avasarechichana tachacayaranahahi eta juca viávihahi, taicha ani, tajina náiyavaimahi eta te juca —náichapa.

¹³ Tásiha, ema Jesús majicapapa:

—Étina, íjaraca eta nanica.

Énasera náichavarepa:

—Tájina viviyaimahi eta nanicahini ena nani achaneana. Jucárihinéni cinco eta pan, apiquipa jima jitaruca. Váiparinehisera nárataimahi. Tayanapané tatiarihinapucaini eta vivacharesihahini eta tinicacare, váiparinehivaresera nárataimahi ena nani camuriqueñeaná achaneana —náichapa.

¹⁴ Ena achaneana, cinco mil eta náichapemurivahi ena ajairana, énarichahavare ena esenana, énapa ena amaperuana.

Tásiha, ema Jesús máichavacapa:

—Evaneca náejahapaicavaca ena achaneana. Cincuentavacainapahi eta náiputsitsisiravaina — máichavacapa.

15 Énepasera tacahehi naicha ena apóstoleana. Tásicha, ticaejarecanapa namutu. **16** Tacahe, ema Jesús mavehapa eta cincoquene pan étapa eta apiqui jima. Máesenicapa te anuma. Mahasulu-payachaipa ema Maiya eta máenisiravacayarehi ena camuriqueneana achaneana. Mayuvetutu-hecavacapa, máijaracapa ena apóstoleana. Náijara-capasera namutu ena achaneana. **17** Namutupa tinicana, tisatuhevacapa. Váhicaruvare náitahini eta tinicacare. Dócehi saye ichapehiana tínicahi eta náemacharájiana.

Ema Pedro máimereucha ema Jesús eta émairahi Cristo

(Mt 16.13-19; Mr 8.27-29)

18 Étana sache, ema Jesús énapa ena máimitureana tiápechavare típutsiacavana, tiyananapa tayehe eta nayujarasihayarehi. Te titavanapa eta nayujarasirahi, éma mayaserecavacapa:

—¿Tájaha nacayema ena achaneana eta nuyehe? ¿Nájahapuca náimijachanuhi éna? — macahepa.

19 Éna najicapapa, ánipa naicha:

—Ena apamuriana náimijachavihiji téchepuca ema Juan Tícachasiricarahini. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavia-nahivare ema mácani apana profetaini antivuini, téchepucahi —náichapa.

20 Ema Jesús mápechavare mayaserecavaca éna:

—Étiyapa, ¿nájaha ímijachanuhi núti?
 Ema Pedro majicapapa:
 —Pítira yátupiquenave Cristo, piásihaqueñenehi
 me Viya —macahepa.

*Ema Jesús tímereuchava eta máepenirayarehi
 (Mt 16.20-28; Mr 8.30-9.1)*

21 Tásiha, matuparacavacapasera ema Jesús nacuija nacumetaca eta émairahi ema Cristo.
22 Tásiha, máichavarepa:

—Tacamunuichaha eta ichapemuriyare eta nucatajivairaya, nuti Manerejirunuhi ema Viya. Tépurunuanayare ena tuparairucana énapa ena aquenucarahaná énapa ena escribánoana. Éna, tímicapacanuanayareva. Mapanayareichuhisera sache eta nucaheyare eta népenirayare. Tásiha, nuchavayarehi néchepuca —máichavacapa.

23 Tásiha, máimitucavacahi namutu ena achaneana, ánipa máichavaca:

—Nácani navaraha náehicanu, tacamunu náinajica tamutu eta tihapapiricana eta náehisiránuhi. Nacaravahuyareva eta nímiturapiana. Náijaracavavare eta táimicapasiraina eta náehisiránuhi. **24** Nácanisera téñamanahi eta náitaresira, tiávamirahuayanaya eta náehisiránuya, énajivayare ticamitiequenehavanaya eta náitaresira. Énasera nácani yátupihi tíjaracavana téhicanuana, tayananpane táimicpacavacapuca eta náehisiránuhi, éna titujicavanayare tiúchucuhanayare eta náitaresiranaya.

25 Énerichuvare nácani tacáeñamararuanaahi eta nacaimahaquenéirayare te juca apauehe, tájina náimaequenehaimahi, taicha eta

tacaeñamarasiravacahi tahapapiricavacahi
 tayehe eta náuchucuirayare. ²⁶ Énaripa nácani
 titsirihanapuca téhicanuana, náimitsirihapuca eta
 nímiturapiana, núti apanava nutsirihayarevare
 nayehe ena nani. Nucaerajicainapa ena nani,
 núti Manerejirunuhi ema Viya, te táitecapapa eta
 sácheyare nuchavirayare aquenucanuinapaipa.
 Te jena sácheyare, námainapaipa núti eta
 nujaraiva, étaripa eta majaraiva ema Tata.
 Nucachanénapaipa ena sántoqueneana ángeleana.
²⁷ Nutupiruva numetacahe: Puítiripa te etaracu éti,
 etiarihi éti vahi épenavanéimahi, ímahanumayare
 eta nucatuparahairahi aquenucanuya nuti
 Manerejirunuhi ema Viya —tacahepa eta
 máimituresirahi ema Jesús.

*Ema Jesús, tihapamaichava eta máimahi
 (Mt 17.1-8; Mr 9.2-8)*

²⁸ Tiuri, te tábiquenepa eta óchoquenehi sache,
 tiyanapa ema Jesús, tiápanahi te anuquehe mari.
 Tiyujaracayarehi. Mapananarichusera ena
 mámaqueneanahí: ema Pedro, ema Jacobo, émapa
 ema Juan. ²⁹ Tacahe, eta mayujarasirahi ema
 Jesús énapa ena mámaqueneanahí, tíjahúchavapa
 títsivachavahí eta máimahi ema Jesús. Apaimahipa
 eta mamira étapa eta mamuiriha. Tétavicavapa
 eta tajapuvahi tajarárasirahi tamutu eta máquehe.
³⁰ Tásicha, tiáramicareanavarepa tímerecavana ena
 apinana ajairana. Téchajiricavanaripa mayehe
 ema Jesús. Ema émana, émahí ema víyarahaini
 Moisés. Ema apana, ema víyarahaini profeta
 Eliás. ³¹ Tétavicavaipahivare tajarárasirahi
 eta te natupihaiyahi. Náechajisihaipahi eta

macatajivairayarehi máopenirayarehi ema Jesús tayehe eta avasare Jerusalén. ³² Tavarahaipaichanéni tímaca ema Pedro énapa ena apinana machamurianahi. Téhesera te náimahapa eta tijararacahi te nachacaya, témitiacarinehi eta náechapuneana. Náimamaracaripahi eta majaraivahi ema Jesús, énapa ena apinana ajairana tiúcupauchanahi. ³³ Tacahe, te máimahapa ema Pedro eta nachavirayarepa ena nani apinana, témeñahavapa. Tásicha, macahepa:

—Tata Maestro, téavicavapa táuricacareva eta viávihairahi eta ani. Tiúripanahipucaini vépiyacahini eta epenahuinapachuhini. Pipenahuinrichuhini píti, mapenainarichuhivaréni ema Moisés, émapaini ema Elías —máichapa.

Váhinéni máimatiquenehahini ema Pedro tájahahipuca eta mavarahaquenehi macayema. ³⁴ Tacahe, eta máechajirisiravaichahahi, tijahúchavapa tiúcupaicahi eta úcaji, tamuichavacapa ema Jesús énapa ena apinana ajairana. ³⁵ Tásicha, nasamarinehi eta mahu ema Viya, tayehe eta úcaji. Ánipa macahe:

—Ema maca ema yátupiquenehi nuchicha némunaruquenehi. Éma esuapayare —macahepa.

³⁶ Te tímatinapa eta mahu ema Viya nasamaquenehi, náimahapa ema Jesús, macarineipahi. Nájinari pa ena tiúcupauchanahi.

Tacahe, ena mapanana apóstoleana, tiyerehi eta namametasirahi ena apamuriana nachamuriana eta náimahaquenehi.

*Ema Jesús macanaraca ema amaperu
mávaháruhi ema éreana
(Mt 17.14-21; Mr 9.14-29)*

³⁷ Te apanaquenepa sache, tiúcupaicanavarepa tayehe eta anuquehe mari návinehi. Natiarihipavare ena camuriqueneana achaneana. Te náimahapa ema Jesús, tiyananapa nácapahi. ³⁸ Matiarihihi ema émana achane te namuri ena camuriqueneana achaneana. Tipiaracapa muraca éma, ánipa macahe:

—Tata maestro, picatajicanupaini pípuchi-nanuini ema maça nuchicha. Émanaracavahi te numirahu. ³⁹ Mávaháruhi ema éreana. Macapiarerereahi técharipaicavavare ticarisasajacavare. Ichapemuri eta macatajivaira máicha. Vahi mávaraha máinajiaca. ⁴⁰ Néchajiacaripahinéni ena pímitureana. Váhisera náratahahini nacuchuca ema éreana tiávahácahi ema nuchichasami —máichapa ema achane.

⁴¹ Tásiba ema Jesús majicapapa:

—¡Tétavicava emasuapajiraivavaca eti achaneana! ¡Cúverarecaichapucaini eta nucamichirahenahini! Piama ani ema pichicha.

⁴² Témeñahavainipa ema amaperu, tápechavarepa tacañamacahi tiáquipaicavapa, téchariripaicavaipavare. Émasera ema Jesús, máquijicapa ema éreana, muracapavare eta macajachirahi. Tásiba, máijaracapa ema maiya, tinaracaipahi. ⁴³ Náramirinehi ena achaneana taicha eta tamutuirahi marataha ema Viya, máitupajijiasiravahi.

*Tiápechavavare ema Jesús tímereuchava
máepenirayarehi
(Mt 17.22-23; Mr 9.30-32)*

Nanasirichahahi napanerequenehahi ena achaneana eta juca náimahaquenehahi. Ema Jesús mápechavare mametacavaca ena máimitureana. Ánipa macahehi:

44 —Ecaquiña yátupina eta juca numetaruheya. Váhivare ecuemitisica. Núti Manerejirunuhi ema Viya, járajapainapa eta sácheyare tíjararecanuyare mácani achane nayehe ena ticatianacanuanahi. Ticaratacanuanayareva —máichavacapa.

45 Énasera ena máimitureana váhiquene nácaicutiarahini eta macayemaqueneanahi. Taicha émarichuhí ema Viya tíjaracahi eta vuíchaha nácaicutiaraaimahi. Váhivare napatsicavahini nayaserecahini tájahapuca tacayemahi eta máichiravacahi.

*¿Nájahapuca ema apóstole ticapicahupana?
(Mt 18.1-5; Mr 9.33-37)*

46 Te taequenepa eta juca, ena apóstoleana ticapinarujiricacanapa nájahahipuca ema ticapicahupanahi. **47** Émasera ema Jesús máimatiacavacapa eta náechajiriruvanahi. Máichuhapa ema émana amaperuchicha, macatupihapa te namirahu. **48** Tásiba, máichavacapa ena apóstoleana:

—Nácani tijacapanayare ena amaperuana níchavenéinahi núti, ena nani yátupi náimerecayare eta náemunasiranuhi núti taicha tímicutijiricavahi nútinahini najacapa. Taicha nácani tijacapanuanahi núti, énerichuvare tacahehi

eta najacapirahi ema Ticachichanu, ema tivanecanuhi. Nácani náechapajiricayare namutu ena nachamuriana, náemunasiravacahivare, énahi ena ticapicahupananayare te etaracu — macahepa.

*Nácani vahi tictatianacahaviana, éna
tímicatacrahaviana
(Mr 9.38-40)*

49 Tacuhe ema Juan mamecapa, máichapa:

—Tata Maestro, vímahahi ema émana achane máquijicavacahi ena éreanana te píjare ticutirinehi pítinahini píjaracahini eta máitupajijiasiravahi. Tásihasera, vicavacahi éma, taicha vahi viúmurivainahini —máichapa.

50 Émasera ema Jesús máichapa:

—Vahi ecucavaca éma. Taicha nácani vahi tictatianacahavianahi, éna tímicatacrahaviana — macahepa.

*Ema Jesús macajachavaca ema Jacobo émapa
ema Juan*

51 Te jena sácheanahi tiánenehipaipa títecapa eta mayanirayarehi ema Jesús te anuma. Tásicha, tíjaracavaichaha eta mayaniranumayare te Jerusalén. **52** Macavanairipipa tiyanana ena tínapumirauchanayarepahi. Titanucanayarehi eta máitecapihayare tayehé eta jácani avasare. **53** Énasera ena samaritánoana vahi návarahahini najacapa taicha náimahahi éna eta matupiruirapahi te Jerusalén. **54** Tacuhe, ena apinana apóstoleana, ema Jacobo émapa ema Juan, tisemamajuheanapa eta namajacapirahi ema Jesús. Tacuhe, náichapa éma:

—Tata Viáquenu, ¿pivarahapuca viyasesereca táemirica eta yucu tiásicha te anuma? Étaina títatapaimuriha ena náenatatajiana, tacuti eta máichaquenehi ema profetaini Elías —náichapa.

⁵⁵ Tacache, ema Jesús máimararacapa éna. Tásicha, macajachavacapa, máichapa:

—¿Tájaha tacayema vahi tétupicava eta epane-
reruana? Ticutipa vahi mávaháruhénahi ema Espíritu Santo. ⁵⁶ Vahi étaina tímitecanu nícuñacava-
cayare ena achaneana, nuti Manerejirunuhi ema Viya. Tímitecanuhi nucuchucuhavacayare éna —
máichavacapa.

Tásicha, tiánucuhanapa te apachacaya te apana-
hivare avasare.

*Vínajicayare tamutu, te vivaraha véhica ema Jesús
(Mt 8.19-22)*

⁵⁷ Eta napaisirapahi te achene ema Jesús
énapa ena máimitureana, nacainunapa ema émana
achane, mavarahapa máehica. Ánipa macahehi:

—Tata, núti apanavare nuvaraha néhicavi te
jácani pivarahaqueneyare piámianu.

⁵⁸ Ema Jesús, ánipa tacachehi eta majicapirohi:

—Tamutu eta sárareana ticapenavaca.
Énerichuvare eta cágureana tamacajipachuvare.
Nútisera núti Manerejirunuhi ema Viya, tájina
nuviya nusiapihahini —máichapa.

⁵⁹ Te apanavarepa sache, máichuhapa ema Jesús
ema apana máimiture apóstoleyare. Tásicha, ema
majicapapa:

—Tata, nuyaseacavi písapanuhipucaini
nuchava te nupena. Nucuchapanumayarehini

eta máepeniraya ema ticachichanu, nécaranumaya.
Tásicha, nucapayacavipa néhicaviya —macahepa.

60 Ema Jesús majicapapa:

—Pésamirica náecaracacaichaha ena
máecharaireana. Tájina táijaracavimahi
eta juca tihapasamurerecavihu. Yare,
péhicanu. Níjaracaviyare eta pémataneyare.
Picametarairuyare eta máechajiruvana ema
Viya —máichapa.

61 Matiarihivare ema apana énerichuvare macahehi:

—Tata náquenu, núti nuvaraha néhicavi. Písapanusera nucametavapananumaya te nupena —macahepa.

62 Ema Jesús majicapavare:

—Mácani achane tipaicapahi téyarecapahi
vahi tichavaequenehavaimahi mámarairicahini
eta mámaquene. Ene picaheyare piti,
vahi pichavaequenehavaimahi tayehe
eta tájiparacana. Taicha vahi nuvaraha
mácani tínjicavahi eta macametarairuira eta
máechajiruvana ema Viya —máichapa.

10

*Ema Jesús mavanecavaca ena setentaqueneana,
tímiturecanayare*

1 Te táequenepa eta júcana, ema Viáquenu Jesucristo manerejicavarepa ena setentaqueneana apamuriana máimitureanahivare. Tiyananapa ticametarairuanayarehi te avasareana mapaisineanapahi éma. Apinanavacapahi eta napaisirayare éna. **2** Máichapa eta matuparasiravacahi:

—Tétavicavapa eta vicamunuirava ena tímicatacavahianaya tayehe eta juca vématanerepihi. Eyaseacayaresera ema Tata Vicaiyaquene máijaracahavi ena náimicatacavah. Eta juca tímicutijiricavahi mácani achane eta macamunuiravahí ena tímicatacana eta máechatijisiraya eta maharusura.

³ Puiti, névatacaheyare eyana epaica. Nararihisera ena achaneana váinarajiqueneanahi étupiaruanayare. Éna nacutihí eta sárare táïñehiqueneanahi. Étisera ecutiyarehi eta uvesachicha eta tamansuvahi. ⁴ Eta epaisirayare, tájina iámaimahi eta tarera, váhivare iámaimahi eta billetera. Váhivare iámaimahi eta eparupeva. Eyaiauchavayarepahisera eta epaisirayarepahi te achene. ⁵ Te jácani peti ítecapihayarepahi, ani tacaheyare eta échajisirayare ena achaneana: “Ema Viya, tiúrichaheyare éti te juca peti”. ⁶ Nararihiyare ena achaneana navarahaya eta náurivaya mayehe ema Viya. Eta échajisiravacayare, tatupiruvaya me Viya máijaraca eta náurivaya. Téhesera vahi nacuvaraha najacapahe, vahi ecucaeñamacava nayehe, taicha énapa téchinavana. ⁷⁻⁸ Te jácani avasare, jácani peti eta najacapiahepuca, enasipanayare tayehe eta peti ítecapihahi. Vahi ecuepuru jácani tinicacareana náeniruheanayare. Étaripa jácani náesiruheanayare. Éti, táitsivayare eta ecaemataneasiranuyarepahi. Váhivare ecupamirahapahi ímacacuhapahi eta pétiana. ⁹ Ecanaracayarepahi ena nacajumaqueneana natarihiqueneanahi. Tásiba, emetacavacapaipa

námutu ena achaneana eta núcupaisiraripa nuti Cristo, nútirichuhi ema nacuchapaquenehi. Nucuchucuhavacayare namutu ena téneuchavana, ticasíñavanavare eta nuyehe nuti Mavanerunuhi ema Viya. ¹⁰ Téhesera nacuija nacujachapahe te jácani avasare ítecapihayarepahi, iúchucavanepa te calle. ¹¹ Ánipa ácae: “Vétatapevachavahi eta juca tavaparu támaquenehi eta vívape. Eta juca táicutiarahi eta máicuñasiraheyare ema Viya taicha eta emavarairahi ejacapahavihini. Vivarahasera vimetacahe eta máucupaisiraripa ema Cristo, émarichuhi ema vicuchapaquenehi, ema Mavaneruhi ema Viya. Macuchucuhahéhini éti, te éneuchavahini, ácasiñavahini mayehe” íchavacayare éna. ¹² Jéhesare, te táitecapapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanaini te avasaréni Sodoma —máichavacapa ema Jesús.

*Eta táicuñayare eta návasana ena achaneana masuapajirairahana
(Mt 11.20-24)*

¹³ Tacahe, ema Jesús máechajicahi ena apamuriana achaneana, tímicutijircavahi natarihinahini te mamirahu. Ánipa macahe:

—¡Páurehesami eti nujaneanana ecavasanahi te avasare Corazín étipa eti ecavasanahi te avasare Betsaida! Ichape eta ícuñayare taicha eti ímaharipa tamutu eta tiáramicareana níchaqueneanahi te emirahu, váhisera ávarahahini éneuchavahini. Ena nani achaneana ticavasanahi te Siria, apavasanánahinéni, tétavicavahinéni eta namaurivahi,

németeacasera nútí téneuchavanavanehini eta náimairahi eta níchaqueneanapahi. Enévanénahíni náimerecavahíni yátupi eta náeneuchiravainahíni.

14 Tásicha puiti, muracapanayare eta ícuñayare éti, taicha eta emavarairahi éneuchava. Tacachuricayare eta nacaicuñairaya ena achaneana apavasanana ticavasanahi te Siria.

15 Étiripa eti ecavasanahi te avasare Capernaúm, tamapuriji eta nímitusirahehi étapa eta ímairahi eta tiáramicareana níchaqueneanapahi. Eti ecasiñavavaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épjuquichavayare eta te yucu taicha vahi éneuchavaimahi éti —macahepa.

16 Tacahe, tiápechavavare máimitucavaca ema Jesús ena máimitureana, ánipa macahe:

—Nácani tisuapaheanayare, ticaecheranahi eta nasuapiranuyareva nútí. Énaserá nácani tépuruheanayarepahi, ticaecheranayareva eta náepuruiranuhi nútí. Ene tacahehi eta náepuruiravare ema Tata tivanecanuhi —máichavacapa ena máimitureanahi eta napaisirayare.

Tichavanapa ena setentaqueneana vanairucanahi

17 Tacahe, tichavanapa ena setentaqueneana. Tiúrisamurereacavanapaipa eta náitecapirahi. Ánipa nacahe:

—Tata Viáquenu. Vítuchaipa eta pivanaipi. Viratahahivare viáquijicavaca ena éreanana taicha eta vipiarasirahi eta pijare —nacahepa.

18 Ema Jesús majicapavacapa:

—Tájinarinehi matumevaimahini ema Satanás eta viáquiquisirapahi ena majupahana. Taicha ema Espíritu Santo tímechanuhi eta nunecapirahi eta máquipaisiravahi ema Satanás, tacutihi eta térameca eta táijahúchiravahi eta macauijirahi te anuma. ¹⁹ Táitaurevaquene nútì, ichape eta nujaneasirahehi. Tayanapanepuca iácatayaca eta quichare, alacránpuca, tájinaserá táicharacahémahi. Eta juca ítupajijiasiravaya níjararuhehi, tacachuríaca eta máitupajijiasiravahi ema Váinaraji Satanás, énapa ena majupahanahí. ²⁰ Váhisera ecucasiñavavaica eta eratahairahi iáquijica ena éreanana. Iúrisamurereacavasera eta taejasiraipa te anuma eta elistana.

*Ema Jesús tiúrisamuréinehi mayehe ema Maiya
(Mt 11.25-27; 13.16-17)*

²¹ Tacahe, enévanehinehi táitecapauchahi ema Jesús eta máurisamurevahi maicha ema Espíritu Santo. Tásiha, macahepa:

—Tata Nucaiyaquene, téavicava eta nucunachiravi. Jéhevare píti táquenuvihí eta anuma étapa te juca apaquehe. Títauchavaipa eta pipanereruhi. Vahi písapahini náitucahíni eta júcana ena achaneana tímijachavanahí téchemarahiana. Énapasera píjaracahi ena nani téhicanuanahí, tájinahinéni náechemaraivainahíni. Puiti nasapiharipahi nacachuricahi ena titupajijiacavanahí. Tétávicavahi eta táurivahi eta pipanereruhi, piti Tata Nucaiyaquene.

²² Tacahe, ema Jesús máichavacapa ena achaneana:

—Ema Tata Nucaiyaquene, ema tíjaracanuhi eta nútiraya néchaya tamutu. Nájina náratahaimahi énajivainahini náimatihi ema Tata. Nucarichu nuti néchinavahi ena nímimatruanayare éma. Taicha núti yátupihi eta nímatirahi ema Tata Nucaiyaquene; tacutiquenehi eta yátupirahivare eta máimatiranuhi éma —macahepa.

²³ Tacahe, mañajichamuripa ena máimitureana, máichavacapa:

—Tétavicavahi eta iúricacareva éti taicha tíjaracahehi ema Viya eta juca ímairahi puiti eta níchaqueneanahi. ²⁴ Jéhesare, numetacahe: Acane ichapemuriana ena víyarahahanaini profetana énapa ena réyeainaini, tétavicavahi eta navarairahi tímatinuana, navarairahivare náimaha eta juca níchaqueneanahi ímahaqueneanahi. Navarahahivare nasama eta nímituresirahi. Váipasera nacapayacahini —máichavacapa.

Ema Jesús máimicuticha, máechajisihahi ema achane máuriquenehi, samaritánohi. Tijapanurahi mayehe ema émana achane macajaraquenehi, tayanapane vahi émainahini majaneanainahini.

²⁵ Matiarihihí ema achane, maestro tayehe eta mavanairipiana ema víyarahaini Moisés. Tiyanapa matanucahi ema Jesús, téchajiricavayarehi eta mayehe. Mavarahahi macaicutiarayare. Máichapa:

—Tata maestro, ¿tájahapucaini nícharacavaini eta níturusirayare eta núchucuirayare te apána vítaresira? —macahepa.

²⁶ Ema Jesús majicapa:

—¿Tájahasica tacayemahi eta táechajiriruvahi eta Sagrada Escritura? ¿Tájaha tacayemahi eta pisamirahi eta péchajicuirahí? —macahepa.

27 Tásicha, ema maestro majicapapa:

—Ani tacahehi eta néchejicuirahí: “Macarichu ema Viya pémunacayare te pisamure. Macarichuvare éma piáchanevaqueneya. Píjaracayare tamutu eta pitumeva eta picaemataneasirayare. Éma pipanerechayare tamutu sácheana. Pémunacayareva ema piparaepiyahi táchuti eta pémunasi-ravahi pítí”.

28 Ema Jesús majicapapa:

—Tétupicava eta juca pijicapiranuhi. Te pítaucha eta juca, piúchucuhayare.

29 Émasera ema maestro vahi mavarahahini apaquehereruinhini. Máichapa:

—¿Nájahasica ema nuparaepiyahi? —macahepa.

30 Ema Jesús máichavarepa:

—Nímicutichinaviyare eta juca. Matiarihi ema émana achane. Tipaicahi te achene, másiha te Jerusalén. Tiyanayarehi te Jericó. Eta mapaisirapahi te achene, náuchujiuchapa ena tiámerahiana. Náepuchiricanumapa. Tiánehi nacapacayaréni. Námeyechapa eta mámaqueneanapahi étapa eta mamuiriha.

31 Tásicha, macahepaipa ema émana tiyujaracarahi. Máimahapa ema achane te apaquehe te achenechacaya. Váhisera májapanuhini máichejiuchahini. Máetávicaichucha. **32** Tásicha, macahepaipavare ema apana achane. Éma, téchapajiricahi eta Templo. Énerichuvare te máimahapa, máetávicaichuchavare. **33** Tacache,

macahepaipavare ema apana achane. Éma, indigenahi samaritano. Éma, te máimahapa ema macajaraquenehi, majapanurinehi.

³⁴ Tíchecanumapa éma, témeñahavapa. Máipuchapa te aceite étapa eta alcohol eta majarana. Máepacuchavacapa te amaratataji. Tásiha, manaracuhapa manacaquechapa eta te maperapahi cavayu. Mámama eta te máitecapihayarehi. Máipupuaracaipahi.

³⁵ Te apanapa sache, tiyanayarepa ema samaritano. Tivecuacavapa apipe eta maplatane. Mavachachapa ema ticapenahi eta peti. Tásiha, máichapa: “Picatajicanu. Péchapajirisinánu ema maca achane. Te tatiarihinapuca eta macamunuirava, píjarasinánuya. Nímahavirine nuvachachavi te nuchava” máichapa.

³⁶ Tiuri puiti, nuyaserecavyare píti. ¿Nájahapuca ena nani mapanaqueneana ema témunacahi ema maparaepiya najararuquenehi ena tiámerahiana? —máichapa ema Jesús.

³⁷ Ema maestro majicapapa:

—Ema témunacahi ema maparaepiya, ema titapanuhi —macahepa.

Ema Jesús máichapa:

—Pímhajapajira, ene picahayare piti apanava. Pijapanurahiyare —máichapa.

*Ema Jesús máejirapanavaca te napena esu Marta
ésupa esu María*

³⁸⁻³⁹ Tímiyanavavarepa eta mapaisirahi ema Jesús. Máitecapauchapa eta avasarechicha suávasa

esu ésuna esena ticaijaruhi Marta, ésupa esu suparape ticaijaruhi María. Mayanauchapa te supena esu Marta. Tétavicavahisera eta táurivahi eta najacapirahi éna. Tacahe, esu María téjacapa te máivapechacaya ema Jesús. Susamararacaripa eta máimiturapiana éma. ⁴⁰ Ésusera esu Marta tahapapiricaichucha eta sucaparujirahi, taicha eta suénisirayare ema Jesús. Tacahe, esu Marta tisemamajuheripa eta suímairahi esu suparape suéjasirahi. Tacahe, suíchapa ema Jesús:

—Tata Náquenu, picatajicanupa. Pivanesinanu esu suca nuparape súimicatacanuichu apaesaina tayehe eta ematanecana —suíchapa.

⁴¹ Tásicha, ema Jesús majicapapa:

—Páurevisami piti Marta, tétavicavapa tahapapirisiravi eta pématanerepiana. ⁴² Tituparacavi pínajica eta tihapapiricavihi. Picaravahu eta máechajiruva ema Viya. Esu suca piparape María tétupicavahi eta supanerero. Suvarahahi suítucayare. Eta tacahe, tisamararacanuhi. Nájina tiverejicaimahi eta suvarahaquenehi suítuca —máichapa.

11

*Ema Jesús tímitucahavi eta viyujarasiraya
(Mt 6.9-15; 7.7-11)*

¹ Tacahe, te jácani apanapa sache, ema Jesús mávihahi eta te mayujarasirarehi. Te titayujarápa, témeñahavapa ema émana máimiture, máichapa:

—Tata Viáquenu, pímitucahavi eta viyujarasirayare víti apanavare, tacuti eta

máimitusiravacahi ema Juan ena máimitureanahi —macahepa.

2 Tásiha, ema Jesús máimitucavacapa:

—Ani tacaheyare eta eyujarauchiravaina: Tata Vicaiyaquene, piti piávihahi te anuma, vipicauchahi yátupi eta píjare. Vivaraha ichapeina eta tasuapacarevaina eta pivanaipiriana nayehe namutu ena achaneana ani te apauehe, tacuti eta nasuapirovihi ena ángeleana te anuma. **3** Pájapanuhavi píjaracahavi puiti juca sache eta vicamunuqueneana vinicaquenerepiana. **4** Pájapanuhavivare piperdonachahavi eta viviurevana piyehe. Víti apanava viperdonachavacaripa namutu ena ticaviurevanahi viyehe. Vahi picuisapahavi vicha eta tamauriquene. Picatiuchahavi mayehe ema Váinaraji. Tacaheya eta eyujarauchiravaina.

5 Máichavare ema Jesús:

—Tiuri, nímicutichinaheya puiti. Matiarihi ema émana achane. Tacahe, máitecapauchahi ema apana achane máitunacasarehi te enumuhu yati. Viajéropahi éma. Émasera ema avasarecuruhahi, tájina maviya eta máenicahini. Tásiha, mayana mayehe ema apana máitunacasarehivre. Máichainapapuca: “Picatajicanu, nucapucavi mapanaina pan. **6** Taicha títecapauchanuhi ema nítunacasare viajéropahi. Tájinaserá nuviya nucumpirachahini”. **7** Tacahe, ema macaijuhequenehi váhipuca macujapanuhí, macahénapapuca: “Vahi picujarareca eta néchapune. Pésamirisinanuvare eta tapaja

tacaerataquenehi. Tímacanahivare ena nuchichanaveana. Vahi nítujicava néchepuca níjaracavihini eta pivarahaquenehi” macahenapapuca.

8 Maitunacasarequenénihipuca éma, váhisera máipurajihini maechepucahini máijaracahini eta mayasesereruhi. Téhesera te tímiyanavapuca mapiararaca ema ticamunuvhali, németeaca tipamicavayarehi téchepuca, máijaracayarehi eta macamunuquenepahi.

9-10 Eta tacache, numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tijapanurahi.

Tisamaheyare, tijaracaheyareva. Vahi ecuyacuji eta eyaseasiraina. Téhevare tatiarihinapapuca eta jácani íchiraya ichapehi eta tacajeravaya, eyaseacayare máijaracahehini eta ítupaijijiasi-ravaya. Éma, tijaracaheyare. Te jararihipuca eta táichejimiráuchahe, éma macaevuisihainaheyare.

11 Eta juca tímicutijiricavahi te natarihipuca ena echichanaveanahi éti, te tiyaseacaheanapuca eta pan nanicayare, váiparinehi táuricaimahi íjaracahini éti eta márijahi, tímicutijiricavipa ecavijaruhini ena echichanaveana. Étaripa te tiyaseacaheanapuca eta jima, váhivare

táuricaimahi íjaracahini eta quichare. **12** Étaripa te tiyaseacaheanapuca eta varayuha, váhivare

táuricaimahi íjaracahini eta sáse. **13** Étiarihi éti vahi ecajirahihini nayehe ena achaneana. Iúrihisera

nayehe ena echichanaveana. Ítuahi íjaracavaca jácani nayasearuheanahi táuriqueneana. Mavetiji

ema Tata Ecayiaquene tiávihahi te anuma. Éma,

vahi ticavijaruheimahi eta te eyaseserepiana. Tíjaracaheyarehi tamutu eta eyasearuana, émaripa ema Espíritu Santo tiávahácaheyarehi —macahepa ema Jesús.

*Ena achaneana téjecapavanahi eta náimijachirahi
ema Jesús mávaháruhi ema Váinaraji Satanás*
(Mt 12.22-30; Mr 3.19-27)

¹⁴ Te apanaqueñepa sache, ema Jesús macanaracahi ema achane, úپainihi eta máitaresira taicha eta mávahásirahi ema éreana. Tacahé, eta máuchusirapa ema éreana te máquehe ema úپainihi, tiúripa téchajica. Ichaperinehi nárami ena achaneana. ¹⁵ Natarihihisera ena apamuriana achaneana, ánipa nacahehi:

—Ema maca Jesús, vémeteaca majupahahi ema Satanás, ema náquenumurihi ena éreanana. Máijararuhi jácani eta maitupajijiasiravahi eta macuchusiravacahi éna —nacahepa.

¹⁶ Nararihihivare ena apamuriana achaneana váhivare nasuapapajicahini ema Jesús. Eta tacahé, navarahapa nacaicutiarayarehi, nayaseacapa macuchucahini eta tiáramicare, máimereuchayare eta émairahi Cristo mavaneruhi ema Viya. Váhisera nasuapayarehini. ¹⁷ Émasera máimatihi eta napaneruana eta namasuapirahi. Máchavacapa:

—Nímicutichinahe puiti ena machanerana ema gobierno. Éna, vahi típutsimurihacacanaimahi apinainahipucaini partido. Te típutsimuriacanapa, énajicacaipapucaini tiáquipaicacana. Émaripa mácani achane te camurianahi ena machichanaveana, váiparinehivare típutsimuriavanaimahi náehajiricacahini, énajicacahini

náquipaicacahini. ¹⁸ Ene macahehi ema Váinaraji Satanás, váiparinehi másapahini típutsicacana ena machamuriana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi. Éti ímijachaipa nútirichuhi machamuri ema Satanás, táichavenehi eta nuratahairahi nucuchucavaca ena éreanana. ¹⁹ Tájina vahi étupicavahini éti eta juca epanereruana. Te émahipuca tímicatacanuhi ema Satanás, énerichuhivare éti máimicataruanahivare jácani éma, eta ecuchusiravaca ena éreanana. Epanerechinávanuma. ²⁰ Émaquenehisera ema Viya, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare necha tamutu. Nútiripara nuti ecuchapaquenehi.

²¹ Tacutiquene mácani achane tume. Te macaratacahi eta mataquiriqui eta majaneasirahi jácani macayehequeneana, nájina tiámeyechaimahi. ²² Téhesera macahepaipa mácani achane túmepanahi mayehe, maverejicayare eta mataquiriquini macasiñaquenehi. Máitiacavane. Tásiha, émapa técha tamutu eta majanearuinihi ema achane. Ene nucahehi núti, túmepananuhi mayehe ema maca Satanás.

²³ Te vahi ecuehicanu, ecucaemataneacanu, éta tímereuchaheya machamurihehi éti ema ticatianacanuhi. Masapiha ímicatacahi éma eta macaete-majirisiranuhi.

*Ema Jesús máimicutichinahi ena masuapajiraira-hanahi mayehe
(Mt 12.43-45)*

24 Tímiyanava eta máechajirisiravahi ema Jesús, ánipa macahe:

—Énerichuvare éti ecuti mácani achane máinajiruhi ema émana éreana. Ema éreana tiyanainapa matanucainapa eta jácani masiapihayarehi. Eta mamaichimavira eta mavarahaquene, mapanerechayarehi tichava. Macahénapapuca: “Nuyanayare nuchava, nusiapahacayareva ema návaháruinihi”.

25 Te títecápapa ema éreana mayehe ema achane mávaháruinihi, máimahapa ema achane máinajicaripa tamutu eta mapecaturana, vuíchahasera máehicahini ema Viya. **26** Tásicha, tiúrisamurepa ema éreana. Tásicha, tíchuarecpa ena siétequeneana machamuriana. Váinarajipanána éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane —máichavacapa ema Jesús.

Viúriyare te visuapa eta máechajiriruva ema Viya

27 Mapaenumavahi titapirica ema Jesús eta juca máechajiruvanahi, tipiaracapa esu ésuna esena te namuri ena achaneana. Ánipa sucahehi:

—¡Tétavicavapa eta sucunachacarevahi esu pena, táichavenehi eta suínasiravihi, suájisiravihi eta sucajurusiravihi! —sucuhepa.

28 Ema Jesús majicapapa:

—¡Tiápajucavayaresera eta nacunachacarevayarehi namutu ena tisamanayare eta máechajiriruvanahi ema Viya, yátupiyarehi eta nasuapirayareva! —máichapa.

*Ema Jesús macajachavaca eta namasuapajiraiyahi ena achaneana
(Mt 12.38-42; Mr 8.12)*

²⁹ Tacahe, títecaparacanapaichucha te machacaya ema Jesús ena camuriqueneana achaneana. Tásiba, eta máimitusiravacahi, máichavacapa:

—Nararihi ena achaneana puiti juca náetaviuchahi eta navainarajivana taicha vahi návarahahini nasuapa eta yátupirahi mavanerunuhi ema Viya. Tiyaseacanuanahi nímechayarehi eta tiáramicare táicutiarahi eta mavanesiranuhi ema Viya. Váhisera nímechaimahi. Tacarichu náimahayare eta níchararacavaya tacuti eta máichararacavahi ema profetaini Jonás. ³⁰ Ema profetaini Jonás yátupihi ecutiararehi éma eta mavanesirahi ema Viya nayehe ena achaneana ticavasanahi te avasare Nínive. Ene nucahehi nuti Manerejirunuhi ema Viya, ecutiararenuhi puiti eyehe eti achaneana. ³¹ Tacutiquene, esu reina Seba eta acane, te susamairircapa eta máitupajijiasiravahi yátupi ema Salomón. Ésu, tayerehiquenehineni eta suávasa, tiyanahisera sucipayaca ema Salomón taicha suvarahahi susamayarehi éma. Tacahe, te táitecapapa eta sácheyare téchepucanaya namutu, suyaseacainapa ésu eta nacaicuñahini ena nani máetupicushianahi puiti. Sucáhénapapuca: “Táuricapa nacaicuñahini ena nani máetupicushiana, tájinapa náetseraruina

nasamaripa ema Cristo, ema titupajijiápanavahi mayehe ema Salomón, tásicha vuíchahacaruva nasuapa” sucahénapa jácani. ³² Tacutiquene ena achaneana ticavasanahí acane te Nínive. Tisipecaturarahiana éna. Natupiruvahisera nasuapa eta mame tarairu ema Jonás. Téneuchavavaneanahí. Tásicha, nacahénapapuca te jena sácheyare: “Táuricapa nacaicuñaini ena nani maparajuruana ema Cristo, taviuchahi eta namasuapirohi éma. Taicha éma máuriquenepanahí mayehe ema Jonás” nacahénapa. Eta máimiturapiana ema Jesúś, tamicahu eta vítaresira
^(Mt 5.15; 6.22-23)

³³ Tímiyanava eta máechajirisirava ema Jesúś, ánipa macahe:

—Súnsuanahi nácani tiyustacanahí eta lámpara namicahuyarehi, tásihasera nanacapapucaini te jácani tayumururevahi cuarto, najihapaicapucaini te cajune. Tacamunuhi nanacayarehi te anuquehe. Jéhesare, tamicauchasarepa tamutu apaesa tímaririricanapaipa nácani tisiapanapahi. ³⁴ Ene ecahehi éti, eta esuapirohi eta nímiturapiana, tétavicavahi eta tamicauchiraya eta iáchanevana. Tímijunijicayare eta emaurivahi. Téhesera vahi esuapahini, tétavicavahi eta tamapicuvahi eta iáchanevana. Tanasipa tamutu eta tamaurivahi. ³⁵ Eta tacahe, machu ecainajiruva tayehe eta juca esamaqueneanahí ímahaqueneanahivare, machu tayanariana te timapicu eta iáchanevana. ³⁶ Téhesera yátupina esuapa eta nímiturapiana, tétavicavaya eta tamicauchiraheya tayehe eta

ítaresiranahi. Tásiha, vahi eyaseacanuimahi nímechahe eta tiáramicareana —macahepa.

*Ema Jesús máimereuchavaca eta náejecapiravana ena fariséoana énapa ena escribánoana
(Mt 23.1-36; Mr 12.38-40; Lc 20.45-47)*

³⁷ Tacahe, te titapiricapa ema Jesús eta máechajisirahi, témeñahavapa ema émana fariseo. Macumpirachapa tinipanayarehi te mapena. Masuapahisera ema Jesús. Tiyanapa te mapena ema fariseo. Te tiúripa eta tinicacare, téjacapa ema Jesús te mesa. ³⁸ (Tiuri, ena fariséoana, jucarihi eta nayeherepi te tinicanayare, tayanapanehipuca tipachivahuanahi, ticasipavahunumanaya-rehisera. Eta juca nasipavaurusiravahi, namavarairahi náechipejicahini eta náchanevana.) Émasera Jesús, vahi masipavaurucavanumahini. Tacahe, máraminehi ichape ema maca fariséo eta mamaitauchirahi eta nayeherepianahi éna.

³⁹ Émasera ema Viáquenu Jesús máichapa:

—Eti fariséoana, eta eyeherepiana, ecaeñamarracavahi esipacanuma eta enisirareana étapa eta érirareana, emavarairahi táetseraruinahini tasiapahini eta pecatu te iáquehe. Étisera iápajupanavahi eta tachipejivahi eta iáchanevana táichavene eta evainarajivana, étapa eta tavayuasirahehi eta ejamurachirahi tamutu. ⁴⁰ ¡Tétavicavasamihi eta tamuracavahi eta esamureana! Ema Viya vahi tácarichu máimaha eta te iáquehe eta tiávihahi te ínahu. Énerichuvare máimahahi eta tiávihanahi te amahe esamureana. Éma yátupihi eta máimatriahehi. ⁴¹ Tatuparacahi ejapanurahiya nayehe ena ticamunuwanahi. Tátupiruva te esamureana te

échajiricava apaesa tacuijasarepa tachipejivaina eta iáchanevana.

42 ¡Páurehesami eti fariséoana! ¡Tétavicavahi eta tamuracavaya eta ícuñayare! Éti ímijachavahi yátupiquenehi eta religíosohérahi eta epamisirava eta ecamavahuirahi me Viya eta diésmuri tayehe tamutu eta évaraqui. Ecunachacarehi taicha éta. Váhisera ecatiuchavacahini ena achaneana páureana macatiuchavarahana. Váhivare émunacahini ema Viya. Yátupi tituparacahehi eta ecamavahu eta diésmuri iámavahuana. Énerichuvare tituparacahehi eta ejapanuraivaya, yátupinavare eta émunasiraina ema Viya.

43 ¡Jucarihivare eta apana tiviuchahehi eti fariséoana! ¡Tétavicava eta esiñavavaisirahi! Emetapa evaraha tipicauchaheana, ticaeja-caheana te táurinaquene siya eta te iúrujisirrevana. Evarahavare tipicauchaheanayarehi eta náechajisiraheana te cálleana.

44 ¡Jucarihivare eta apana tiviuchahehi eti escribánoana, étipa eti fariséoana, táichavenehi eta apimirairahehi! Ímijachavahi epicauchacarehiji. Étisera eta eyhererepiana, émejecapavacha ena achaneana eta náehisirahi ema Viya. Páureanasami éna. Váhi náimatiéquenehahini eta náejecapiravahi táichavene eta evayuasirahi eta ecaetemairavacahi —máichavacapa ema Jesús.

45 Matiarihivare ema émana maestro eta mavanairipiana ema Moisés. Máichavarepa:

—Tata maestro Jesús, eta piyunasiravaca ena fariséoana, tétavicavapa tayunasirahavihi víti apanavare viti máestroana. ¿Pivarahapuca vicaviurevhivarení víti? —máichapa.

46 Tacahe, ema Jesús majicapapa:

—¡Eti apanavare eti máestroana, tétavica-vahivare eta eviurevahi! ¿Tájaha tacayema epamicavacahi ena apamuriana achaneana eta júcana eyeherepiana tacajeraqueneana? Nájinapa tiratahaimahi títaucha. Apanasica éti váhivare ítauchahini.

47-48 ¡Jucarihivare eta apana tiviuchahehi eta tamuracavaya eta ícuñayare! Éti ecaijare apimirana, taicha ímijachavahi machanerahe ema Viya eta eyehehearasirahi eta náecariana ena profetanaini nacaparuhanahi ena iáchucanaveanaini. Puiti étarichuhi tacahehi eta epanereruanahi eta evarairahi ecapacahavi viti mavanaranahi ema Viya taicha eta épuruirahi eta vímiturapihanahi táuriqueneanahi.

49 Ema Viya, acane tímatihehi eta ecutirayarehi eta napanereru ena iáchucanaveanaini ticapacanahi ena profetanaini. Eta tacahehi eta máechajiriruvanahi: “Nuvanecayare ena profetana; tásiba, nuvanecayareva ena apóstoleana. Váhiquenesera nasuapaimahi ena tisamanayarehi eta náimiturapihanaya ena nuvanarana. Napanajiricavacayarechucha ena nuvanaranahi. Natiarihiyareva ena nacapacayarepahi” macahehi ema Viya.

50-51 Eta tacahe, numetacahe núti: Eti nujaneanana israelítana etiarihiqueneanahi puiti, ecaicuñayare, taicha timuriacahehi eta naviurevahi ena iáchucanaveanaini taicha eta nacapapajisiravacahi ena profetanaini. Acane te tépanavainapa eta apaquehe, ema Abel máinapuiruhi nacaparuhi. Máequeneruhi

nacaparuhi ema maca Zacarías, ema nacaparuhi te tamirahu eta Templo. Camurianahisera ena náumurivanaini. Puiti étipa tamuriacahi eta ícuñayare naicha ena iáchucanaveanaini.

52 ¡Páurehesamichapucaini eti máestroana! ¡Camuriquenehi eta eviurevanahi! Tamapurujipa eta ímatiequenehairainihi eta yátupiqueneana titucacáreana, taicha vahi esuapaimahi, váhivare éhicaimahi. Éti tásihahi íchejimiráurucavacahi ena tivarahanahi tisuapanaya, náehicaya ema Viya —máichavacapa ema Jesús.

53-54 Tacalhe, eta nasamirahi ema Jesús ena fariséoana énapa ena máestroana, tisemanarinehi eta mayehe. Tépanavanavarepa náitsamarareca eta nayaseresirapahi, navarairahi nasama te maejecapavahipucaini eta macayemaqueneanapahi, navarairahi eta tiviuchayarehi éma.

12

*Ema Jesús vahi mávaraha apimirahávina
(Mt 10.26-31)*

1 Tacalhe, te jena sácheinahi, títecaparacanapaichucha ena camuriqueneana achaneana. Tiyututucavanapa. Énasera ena máimitureana ema Jesús návhahí te machacaya. Tásiha, máichavacapa namutu:

—Tímaticarehi eyehe eta levadura eta tasisijisirahi eta masa. Tacutirichu eta tapareasirahi eta apimirairanahi ena fariséoana. Échapavaicha éti, machu napareacahe éna. **2-3** Ema Viya tímararacahehi tamutu eta íchaqueneanahi, tayanapanenénipuca

eyumurucavaquenéapuca te timapicu.
 Tisamahehivare tamutu eta échajiriruvanahi.
 Tímatihehivare tamutu eta epanereruana.
 Te jácani sácheyare ticaecherayare tamutu,
 tétavicavaya eta etsirihairaya taicha eta
 emaurivanahi—macahepa.

⁴ Étiripa eti némunacasareana, numetacahe:
 Vahi ecupica nácani nacapacapuca eta
 iáquehe, tacarichusera náituruquenehayare.

⁵ Numetacaheva, macarichu ema Viya epicayare,
 taicha macarichu éma téchahi eta ítaresirana.
 Jéhevare, éma maratahahi macamitiequeneha eta
 iáchanevana tayehé eta táñehiquene yucu infierno,
 te ecainajiruva táichavenehi eta episirapuca eta
 nacapasiráhena. Jéhevare, éma epicayare.

⁶ Nímicutichinahe eta cágurechicha. Éti ímijachapapuca vahi tasivachahini éta. Téñamacareaannahisera me Viya. Éma, téchavacahi eta títaresiranahi. ⁷ Evetijipa éti, éñamacarepanahi me Viya. Éma téchahehivare tamutu eta ítaresirana. Váiparinehi témitisicahémahi. Eta tacahe, vahi ecueñamava éti tayehé eta ítaresirana, taicha tétavicavahi eta emunavahi éti mayehe. Éma, máimatihi eta tatupa eta echutimacana. Vímereuchavayarehi eta véhisira ema Jesús

(Mt 10.32-33; 12.32; 10.19-20)

⁸ Numetacahe puiti, nuti Manerejirunuhi ema Viya: Namutu ena tímereuchavanahi eta náehisiranuhi te namirahu ena achaneana, núti apanavare nímereuchaya eta nuchanerairavacahi éna te namirahu ena ángelleana mayeheanahi ema Tata. ⁹ Nácanisera vahi návarahahini náimereu-

chavahini eta náehisiranuhi, nútí apanava nímereuchaya eta vahi nuchaneranainahini éna te namirahu ena ángeleana mayeheanahi ema Viya.

¹⁰ Namutu nácani ticaecahinuanahipuca nuti Manerejirunuhi ema Viya, tiperdonachacareana. Nácanisera nacaecahipuca ema Espíritu Santo, vahi tiperdonachacareanaimahi éna.

¹¹ Jararihiyare eta sácheanayare tiámaheanaya te namirahu ena nacapitarana eta te náurujisira-revana, énapapuca ena tuparairucana, énapapuca ena juéseana te jácani avasareana eta nayasese-resiraya. Váhisera ecueñamava tayehe eta jácani ecatiuchiravayare. ¹² Ema Espíritu Santo tímitu-caheyare eta táurivayare eta ecayemayare te jena sache ecayaseserehinapa —macahepa.

Vahi táurica tahapasamurechahavi eta vímahaqueneanayare

¹³ Matiarihi ema achane te namuri ena camuri-queneana achaneana. Máechajicapa ema Jesús. Máichapa:

—Tata maestro, pímicatacanu, pimetaca ema nuparape máijaracanu eta nuyehe parte eta nímaequeneruyare eta máimahaquenéni ema ticachichanuini —macahepa.

¹⁴ Ema Jesús majicapapa:

—Nuchicha, ¿tájaha tacayema pivaraha pinacanu juésnuyare eta eyehe? Vahi nútina néchaheyare tayehe eta máimahaqueneanaini ema ticachichahéni —máichapa.

¹⁵ Énerichu máichavacavare ena apamuriana achaneana:

—Échapavavare éti apanavare, machu émunahiricava, ejamurarahi tayehe eta tímahacareana. Taicha eta tímahacareana te juca apaquehe, vahi étaina ticaitarecaheyare. Vahi taeñamacarehini.

16 Tacahe, máimicutiarachinavare:

—Matiarihi ema achane ricu. Ichape eta mágnesane. Tiúrina eta máevaru. **17** Tacahe, ema ricu mapanerechapa, ánipa tacahe eta mapanereru: “Ániquehepa eta juca névaru, tájinapa núnasiha. ¿Tájahapuca nícharacaya? **18** Tiúripanapuca nūvetataha eta núnavarahi nujanejuecha. Ichapepanainapa nicha eta táitsivaya. Tiúripanainapa, apaesa tárijica tamutu eta néchatijiru étapa eta apamuriana nucayehequeneana. **19** Tásicha, nucahénapa: Jéhevare puiti tétavícavapa eta nūrivayare. Tájinapa níchiravaimahi. Ichapemurihi eta núnaru. Taratahaquene juca áñoanayare. Nucanaracavaya nútì. Tamutu sache tiúriya eta nunisira, néraya. Ichape eta nūrisamurevaya” macahepa ema ricu. **20** Tásihasera ema Viya máichapa ema achane: “Tétavícava eta pisunsuva, piti achane. Puiti jena yati pépenaya. Tájina vahi pítapanaimahi eta juca piúnaruhi”. **21** Ene nacahe ena achaneana ticurujiricana eta náimahaqueneana nayehechiravarichu. Vahi nápanerechahini naicha eta táuriqueneana tacunachacarehini me Viya taicha tétavícavahi tahapasamurechirahi eta nacaimahaquenéraya.

*Ema Jesús tímitucahavi eta majaneasirahavihi
ema Viya
(Mt 6.25-34)*

22-24 Te apahequenepa, ema Jesús máichavacapa ena máimitureana:

—Étisera, nuvaraha ácasiñava yátupina mayehe ema Viya. Vahi ecucaeñamaracavavaicha tayehe eta enicaquenerepi étapa eta emuiriharapi puiti juca ítaresiraichaha. Eta enicaquenerepi étapa eta emuiriharapi, tájina taeñamavacarevaina. Ímararacarichuhi eta cayureana. Vahi tacaeñamaracavahini tayehe eta tanicaquenerepi. Vahi táevacahini, vahivare taechatiijiricahini, táunacahipucaini eta tanicaqueneyare. Émasera ema Viya máechapajiricahi máijarasirahi tamutu eta tanicaquenerepiana. Evetijipa éti, iápajupanavahi eta éñamacarévahi me Viya tayehe eta cayureana. **25** Vahi tauricahini eta ecaeñamaracavahini eta júcana. Eyehe éti, nájina naratahahini étijivainahini ecajurucavahini, tayanapane te tihapasamurechahehipuca. **26** Vahi étijivaimahi íturucava ecajurucavahini, vahivare tauricahini ecaeñamaracavahini tayehe eta júcana.

27 Ímararacarichuhi eta tajurusirahi eta flúreana, vahi tacaeñamaracavahini tacaematanehini, tájururecahipucaini. Táitsivahisera, te tépunehapa, téavicavahi taurinavahi eta taflurene. Nájina nácuti eta nacamuirihaira eta taurinava, émaripa ema víyarahaini rey Salomón eta tajanunusira eta macamuirihairahinihi. **28** Apanasica ema Viya máijaracahi eta taurinavahi, ániperichuhinéni eta tátaresirahi. Evetijipa éti eta máechapajirisirahehi, máijarasiraheyarehi eta emuiriharapi eti achaneana. ¿Tájaha tacayema vahi ácasiñavahíni eta mayehe?

²⁹ Eta tacahe, vahi ecucaeñamaracavaicha tayehe eta enicaquenerepiana étaripa te échuririacapuca eta une érayare. ³⁰ Ena apamuriana achaneana te juca apaquehe, ichapemurihi eta tacaeñamarasiravacahi eta júcana. Vahi nácasíñavahini mayehe ema Viya, nacuchapahipucaini eta máijararuyarehi éma. Étisera, ecasiñavayarehi eta matiarihirahi ema Ecaiyaque. Máimatihí éma tamutu eta ecamunuiravanahí. ³¹ Eta tacahe, tativayare íjaracava ecaemataneacaya ema Viya, ecasamureraya eta ítauchirayare tamutu eta mavarahaqueneanahí. Máimaharinepa éma. Tíjaracaheyare tamutu eta ecamunuqueneana.

Te vicajirica eta vímahaqueneana, vijacapayare eta táitsivayare ánaqui te anuma

(Mt 6.19-21)

³² Vahi ecupica, eti nuchichanaveana. Tayanapane vahi camurihénahini, eti máichuhahuqueneanahí ema Ecaiyaque. Éma téchahehi. Eta tacahe, téavicavahi eta mavapinairavahi eta majacapirahehi, machaneraheya. ³³ Tacahe, te ecaimahaquenepuca, íjararecayare eta ímahaqueneana. Íjaracayare nácani ticamunuvanahí. Tásicha, ema Viya máimahainepe, éma tíjaracaheyare eta táitsivayare ánaqui te anuma. Máitavacacainapa eti ecaimahaquenéraya. Tájinavarepa tévajaicavaimahi. Váhivare tábamavacare ánaqui taicha nájinapa tiámeyechahemahi, váipavare cachusirimahi eti ímahaqueneanayare. ³⁴ Éti, te ecasamurepuca eti ímahaqueneanahí te juca

apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchiana te anuma, ánaqui evarahayare eyanavaneyare.

Yátupina eta vicuneuchiravaina

35 Éti, yátupina eta ecuchapiranuya eta nuchaviraya. Etsecavaya tamutu sácheana.

36 Ácutihi nácani achaneana músuana titsecavanahi te tapaja navejiequenéraya ema náquenu eta machaviraipahi másihairahi mayehe ema arayenahi. Te máehahamecapa eta tapaja, enevaneyarepa éna navejiequenehayare.

37-38 Tayanapané enumuhupuca yati, tijararahipuca eta machavirayarehi ema náquenu. Tétavicavasera eta náuricacarevahi ena músuana eta machimapirahi ema náquenu eta nacuchapirahi, te vahi náimacaequenehahini. Nutupiruva numetacahe: Yátupinasarepa eta máurisamurevayare ema náquenu, macaejacavacainapa te mamesara, máenicavacainapa. Émajacaruvainapa máechapajiricavacayare.

39 Nuvaraha ácaicutiaraquenéna. Machu ácutiriana mácani achane námeyeruhi ena tiámerahiana. Tájina máechapiavahini tájahapuca hórayarehi eta náitecapauchiraya te mapena. Te máechahipucaini, ticuneuchavaipahini éma, váipasare nacuameyechahini. **40** Eta tacahe, éti écaunechavayare tamutu sácheana, taicha vahi échaimahi tájamuhuyarepuca eta nuchavirayare nuti Manerejirunuhi ema Viya, machu iárameca —macahepa.

*Nararihi ena mísuaná tiúriana. Nararihivare ena mísuaná máurirahana
(Mt 24.45-51)*

41 Tacahe, ema Pedro mayaserecapa. Ánipa maicha:

—Tata Náquenu, eta juca pímicutiarachaquene-havihi, ¿viyeheyarechuchapuca viti dócequeneana, téhesera vimutupuca viti véhicavianahi? — macahepa.

42 Tacahe, ema Viáquenu majicapapa:

—Nímicutichinahepa eta apána. Macañá-rihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apána avasare. Táitusiava matuparacahi ema empleado eta máijarasiraya eta tinicacare ena apamuriana machamusuvanahi. **43** Tétavicava eta máuricacarevaya ema maca ticatuparahahi, te tamutuhi máitaucha jácani machimapirana ema máquenu. **44** Németeaca, eta tamutuirahi tiuri eta machimapirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tiúrihi eta máitauraiva. **45** Téhesera, váhipuca tiuri eta mapanereruana ema mácani empleado, máimijachaichucha tiyereyarehi eta máitecapirayarehi ema máquenu. Tásicha, macaetemajiricavacapapuca ena machamusuvanahi, énapa ena vanaracanahi. Máichapapuca eta piesta, téñiricapa térapa, ticavahapa. **46** Tásicha, vaipa manecapauchavahini te títecápapa ema máquenu. Tásicha, machimaracapa ema empleado eta mamapachichijisiraipa eta

máimahaqueneana. Eta tacahe, ema máquenu macavanairipinapa náestacayare muraca, taicha eta mamasuapajiraivahi.

47 Tacutiquene mácani musu, te máechahi eta mavarahaqueneanahi ema máquenu, tásiha vahi máitauchahi eta mavanahianahi éma, muracayarehi eta macaicuñairayare. Ticaestayarehi éma. **48** Mácanisera musu, te vahi máechahi eta tacayemaqueaneana, tásiha téjecapavapa, éma apaesayaréchu eta máicuñayare. Étipa eti ecaimitucasianahi eta yátupiqueneanahi, tatuparacahi ímitucavacayare ena apamuriana achaneana. Núti, ánaquiaparipa eta nímitusiráhehi; tásiha puiti, étipa táehanacahi eta juca ímituresirayare.

Ena achaneana nacatianacainapa ena téhicanaya ema Jesús

(Mt 10.34-36)

49-50 Núti, eta nítesirahi te juca apaquehe, tímitecanuhi eta népeniraya. Yátupiyare eta nucatajivairayare, naicha ena ticatianacanuana. Éti apanava, ticatianacaheanayare táichaveneyarehi eta éhisiranuhi núti. Tímicutijiricavayarehi te tipaica eta yucu, eta tamuruira eta muiji. Eta juca, nuvarahaquenehi táitauchavavanehini. **51** Éti ímijachaipapuca eta nítesirahi te juca apaquehe, tájina tágayemacarémahi, ímijachaipavarepuca tiúricavacareyarehi nícha. Váhisera ene tacahe. Táichaveneya eta éhisiranuhi, ena achaneana tépuruheanaya térajicavanaya eyehe. **52** Taicha puiti juca vicaijuheyare, te natarihinapapuca te étanahi peti mácani achane, esu mayena, esu machicha, ema machicha, ésupa esu chínénaca.

Te mapanahanhipuca ena téhicanuanahi, tásicha apinahanhipuca ena ticatianacanuanahi. Téhesera apinahanhipuca ena téhicanuanahi, mapanahanhivarepuca ena ticatianacanuanahi.

⁵³ Mácani achane, súcani esena, te natiarahi ena nachichanaveana, nacatichayarehi ena ticachichanahi táichaveneyarehi eta náehisiranuhi éna. Mácani apana achane masuapajirairahahi, súcani esena, nacatichayarehi ena nachichanaveana táichavenehi eta náehisiranuhi, énapa ena nachinenanaveana.

Ena achaneana timasuapanahi eta máimeruana ema Viya

(Mt 16.1-4; Mr 8.11-13; Mt 5.25-26)

⁵⁴ Tacache, ema Jesús máechajicapa ena achaneana:

—Te ímaha timapicurume, émeteacaripa tiquivayare. Ene tacahéhi. ⁵⁵ Técaticavapuca te vana, émeteacaripa váipavare tiquivaimahi*. Énevare tacahéhi. ⁵⁶ ¡Eti masuapajirairahana! ¡Yátupihinéni ímatiequenehahi te tiquivayare, váhisera ávarahahini ímatiequeneha eta máimeruhehi ema Viya, te juca sácheana nucachanerahehi!

⁵⁷ ¿Tájaha tacayema vahi ávarahahini éhica eta juca yátupiqueneana? ⁵⁸⁻⁵⁹ Járajapainapa eta sache ticaicuñanainapa namutu ena achaneana. Tacamunurichu etanucayare puiti ema Viya, ecasiñayare ecuchucuiyavaina. Eta juca tímicutijiricavahi mácani achane te

* **12:55** Te jena avasare Judea, te táerisine eta sache eta tásirareasa eta tiquiva. Étasera eta táuchusiha eta técaticava te vana, tájijicahi tamutu, taicha tijuruhimuhuhivare.

ticametauchacasiya. Tatuparacahi tativaya máetupiricanumaya eta mayaseasirayare perdón ema timetauchahí, mapurare vuíchaha masiapahini te cárcel. Taicha te masiapapa, ticajeraequenénapa eta máuchucuiraina. Numetacahehi puiti: Te jácani esiapa eta yucu infierno, váhiquene iúchucaimahi éti—máichavacapa ema Jesús.

13

Tavaraha náneuchava ena achaneana

¹ Étarichu te jena sache, títecapanavarepa ena apamuriana achaneana. Nametacaipa ema Jesús eta táïñehiquene máichaquenehi ema Pilato, étaripa eta máimicapasiravacahi ena tiyujaracanahi te jena Templo te Jerusalén. Ánivare nacahe:

—Ena nani, galiléoanahi éna. Tépenanapa te tachacayanahi eta sárareana nacaparuuanahi námavahuásanahi. ¿Étapuca eta nasipecaturai-
vahipuca tímicapacavacahi? —nacahepa.

² Tacahe, ema Jesús máichavacapa:

—Éti ímijachaipa táimicaparuhi eta nasipecaturaivanahi ena nani nayehe ena apamuriana najaneananahi te Galilea. ³ Nútisera numetacahe: Váhira étainahi táimicapacahini eta nasipecaturaivanahi. Vahi étaparacaina. Tacamunusera éneuchavavane éti, machu tájiahúchava eta épenira, machu ácuti éna.

⁴ Némechahe ena nani diéciochoqueneana tacaparuuanahi eta táevajaisiravahi eta torre tayuchamarainihi te calle Siloé. Ímijachapapuca táimicapacavacahi eta táichapevahi eta naviureva,

navetijipapuca nayehe ena apamuriana ticavasanahi te Jerusalén.⁵ Nútisera numetacahe: Váhira ichapena eta naviureva ena apamuriana. Étiripa, te vahi ecueneuchava, énerichuvare tíjahúchavaya eta épenira—macahepa.

Ema Jesús máimicuticha eta yucuqui mágiriquire

⁶ Eta máechajirisirahi ema Jesús, máimicutijiri-chinapa. Ánipa macahehi:

—Matiarihihi ema achane. Tatarihihi eta masucure higo. Mágiriquirehisera.⁷ Tacahe, máichapa ema manusura: “Mapanapa año vahi ticahi eta juca nusucure. Péchupaicayare puiti taicha tiápitaváiricaipa eta te juca isaniti” macahepa.⁸ Émasera ema musu majicapapa: “Tiúripanapucaini, tata, vicuchapaichahaini étanainavaréni año. Nuvaraha némurinahe-chayare eta máteji apaesa tacahipapucaini.⁹ Téhesera váhiquenénaichapuca tacucahi, néchupaicasarepa” macahepa ema musu.

Ema Jesús macanaraca esu esena tépiñumaiquehe

¹⁰ Te apanapa sávaru, ema Jesús tímiturecavarepa tayehe eta náurujisirareva.¹¹ Sutiarihihi esu esena mávaháruhi ema éreana, tépiñumaiquehehi eta suítaresira. Vahi táurihini sutupinahahini. Diéciocho áñoripa eta sucajumairahi.¹² Te máimahapa ema Jesús, máichuhapa. Tacahe, supauchapa. Máichapa ésu:

—Páurevi piti esena, picajumahi. Puítisera pinaracainapa —máichapa.

¹³ Tacache, ema Jesús manacapa eta mavahuana te suápsi. Enevanepa titupinahahi ésu, tinara-capá eta sujumainihi. Ichaperinehi eta sucunachirahi ema Viya. ¹⁴ Matiarihihivare ema táquenuruuhahi eta nárujisirareva. Eta máimarahi eta juca, tisemarinehi taicha eta macanarasirahi ema Jesús esu sucajumaquene te jena sache sávaru tacapica-huquenehi. Tásicha, máichavacapa ena achaneana:

—Saisi sache tatuparaha eta vicaemataneraya, énerichuvare eta nacaipuirayareva ena nacajumaqueneana. Puítisera juca sache, vahi tauricahini nacaipuhini taicha tacapicahuquenehi —macahepa.

¹⁵ Tásicha, ema Viáquenu Jesús, majicapapa:

—¡Tétavicavahi eta tamuracava eta esamureana! Te ticaitiquihi eta espera te jácani sache sávaru, evejapuacayarehi eta ésichirayare eta une, tayanapane tacapicahuquenehinéni eta sache. ¹⁶ Suvetijicha esu suca esena vicutiquenehi achane, mámariequenehi ema viáchucaíni Abraham, ticatajicacarehi eta nucanarasirayarehi tayehe eta máitiarapi ema Satanás. Taicha dieciocho áñoripahi eta máecájumachirahi ésu. ¡Tauricahi nucanaracayarehi puiti juca sache tacapicahuquenehi! —máichapa ema Jesús.

¹⁷ Eta nasamirahi ema Jesús, namutu ena tictatianacanahi titsirihanarinehi. Énasera ena apamuriana achaneana tiúrisamureanarinehi, taicha eta náimairahi eta tauricacarequeneana máichaqueneanahi ema Jesús.

*Ema Jesús máimicuticha eta taqui eta mostaza
(Mt 13.31-32; Mr 4.30-32)*

18 Ánivare macahe ema Jesús:

—Puiti nuvaraha nímicutichinahe eta nímiturapiana nuti Manerejirunuhi ema Viya. **19** Tacutihi eta ánicichaquene taqui eta mostaza. Te máevacapa ema achane te máesane, tiúnarahiyarehi eta tajurusira. Tásicha, járajapainapa eta cágureana, ticamacajiyarehi te tatavana efa sucureca.

*Ema Jesús máimicutichavare eta lévadura
(Mt 13.33)*

20 Ánivare macahe ema Jesús:

—Nímicutichinaheyareva eta apana. **21** Eta nímiturapiana tacutihivare eta lévadura. Esu súcani esena tiúrihi eta tasisijisira eta suyehe lévadura te tamutu eta suépiyaruhi masa, tayanapane apinapucaini arroba eta suyehe jarina, tasihajicahisera. Jéhesare, tiápucayarehi tiuri —macahepa.

*Vicamesavayare visiapa te tapaja ánicurichu
(Mt 7.13-14, 21-23)*

22 Ema Jesús tiyanavare tipaica. Máimituvacahi ena achaneana te jácani avasare máitecapihapahi. Macaijuhehi eta Jerusalén, váhisera máitecapavanehini. **23** Matiarihihi ema tiyaseserecahi éma, ánipa maicha:

—Tata Viáquenu, ¿váhipuca camurihavianainaya viti viúchucuhanaya? —máichapa.

Tásicha, éma majicapapa:

24 —Vahi táechacare te ánimuriheanayareichupuca eti esiapanaya eta mávasa ema Viya. Étisera tacamunu epamicava esiapaya puiti. Vahi ecuyacuji. Taicha camurianayare ena apaesachicharichu eta navarairahi tisiapanaya,

váhisera titujicavananaimahi. ²⁵ Taicha járajapainapa eta sácheyare, nératacainapa eta tapaja. Tásiba, ítecapanapuca éti, éhahamecapa eta tapaja, epiaracanupa: “Tátachicha, pivejiequenehahavi”. Tásiba, nujicapahénapa núti: “¿Nájahahesica éti? Vahi nímatihe. Váhivare nuchanerahénahi éti”. ²⁶ Tásiba, ejicapanuinapapuca: “Vítirichu picachanequeneanahi te mesa eta vinisirahi. Pímitucahavihivare te plaza te jena viávasa”. ²⁷ Tásiba, nujicapahénavarepa: “Esamanuripa, vahi nuchanerahéna éti. Évuisiha eta te juca, emutu eti ícharahianahi eta tamauriqueneana” níchahénapa. ²⁸ Járajapainapa eta sache ímahainapa te tajuhe eta mávasa ema Viya te návhahí ena viáchucanaveanainihi: émaripa ema Abraham, ema Isaac, ema Jacobo, énapa namutu ena profetana. Étisera enasinapa te aneca. Tétavicavaya eta íyauchiravaya, ecapitiquiahechiravaya taicha eta ecatisamuréravaya étapa eta etsiriraya eta emasiapirohi. ²⁹ Nasapiha tisiapanaya ena camuriqueneana achaneana tiásihanayare te tamutu avasareana te juca apaquehe. Tétavicavainapa eta náurisamurevaya. ³⁰ Tásiba, te jena sácheyare, nácani téquenehanahi puiti, nasapihainapa tisiapanayare. Étisera eti ínapureanahi puiti, étinavarepa vahi titujicavaimahi esiapa —máichapa ema Jesús.

*Ema Jesús ticatisamureva náichavene ena achaneana ticavasanahi te Jerusalén
(Mt 23.37-39)*

³¹ Tacahe, te jena sáche, títecapanapa ena fariséoana te mávihahi ema Jesús. Náichapa:

—Piyana. Pitátájiva piúchuca eta te juca. Taicha ema Herodes mavaraha ticapacaviyare —nacahepa.

32-33 Émasera ema Jesús majicapapa:

—Eyana emetaca ema mácara ticaetemara-hiquene. Vahi típicararecanuimahi núti eta juca mametarapihi. Nunasiyarechaha puiti, nucanararecanumayare ena nacajumaqueneana énapa ena návaháruanahi ena éreanana. Núti jucarihi eta nématanerepipahi eta tímipaicanupahi puiti juca sácheana, nítauchanumayare tamutu. Vahi émainayare técha eta népeniraya. Yátupisera eta Jerusalén návasahi ena ticapahianahi ena profetanaini.

34 Tétavicavahi eta táimicatisamurechiranu eta viávasa Jerusalén. Namapuruji ena tachichanaveanasami. Éna, ticapapajicanahi ena profetanaini mavanaranahi ema Tata. Puiti navarahainapa nútipavaya ticapacanuana. Ichapemurinehi eta níchuiravacahi éna, náurujiacanuhini tacutihini eta varayu te tacurujimuriha eta tachichanaveana te tapava. Váhiquenesera návarahahíni. **35** Náimahainapasera eta náichararacavayare. Ticaquipaicasiyare tamutu eta napenana. Táimijunavacainapa éna eta napisiraya. Numetacahevane puiti: Eta nínajiasiravacainapa, vaipa tímahanuanaimahi. Tiámainucavainapa te náitsivacha eta napanereruana, navarahainapa tijacapanuana. Nacahénapa: “Ichape eta vicunachiravi píti vanairucaquenévihi me Viya” nacahénapa.

14

Ema Jesús macanaraca ema achane tiámaquiape

¹ Tacahe, te jena sache sávaruhi, ema Jesús ticaichuhacasihi tinipanaya te mapena ema émana náiyamuri ena fariséoana. Ticaichuhacasia-nahivare ena apamuriana fariséoana, énapa ena máestroana tayehe máimiturapiana ema Moiséni. Navarahahi nacaicutiarayarehi ema Jesús.
² Tíjahúchavapa tímerecava te nataracu ema émana achane macajumaquene. Tiámaquiapevacahi éma.
³ Ema Jesús, eta máimairahi ema macajumaquene, mayaserecavacapa ena natarihiqueneanahi:

—¿Táuricapuca vicanaracavaca ena nacajuma-queneana puiti juca sávarumuhuirahi tacapicahu-quenehi? —máichapa.

⁴ Énasera vahi najicapahini, timatinana-richucha. Tásicha, ema Jesús macaratavauchapa ema macajumaquene. Eta macaratavauchirahi, enévanepa tinaraca. Tacahe, máevatacapa mayana te mapena. ⁵ Tásicha, máichavacapa ema Jesús:

—Nímicutichinahe puiti. Éti, németeaca májina émanaina achane vahi macujapanuhini eta mapera burro, mavuiyerapuca, te tiáquipaicavahi te pusu te jena sache tacapicahuquenehi. Eta máeñamirahi, tipatsicavayarehi macaechepupana eta paure sárare, tayanapanehinéni eta sache tacapicahuquenehi —máichavacapa.

⁶ Énasera vahi napatsicavahini najicapahini. Timatinanarichucha.

Eta maconsejarapianahi ema Jesús

⁷ Eta máimarasiravacahi ema Jesús ena macumpirachaqueneanahi ema fariseo, énajivahi tinerejiuchavana eta náejasihayarehi tiúrina-panana. Tacahe, ema Jesús maconsejachavacapa, ánipa máichavacahi:

⁸ —Te natarihinapuca nacumpirachahe, vahi ecainapupuicavaimahi ecaejacava tayehe eta téjasihacareana taicha tijuricati eta maejasihayarehi mácani ticapicahupanahi eyehe éti. ⁹ Taicha ema téniricahi, éma ticaejarecayarehi, tijuricati macaechepucavi te péjasihahi macaejasihayarehi mácani apana. Titsirihacarepahi eta macaejacavihini te náequenemuri.

¹⁰ Te ecaichuhacasipuca, ecaejacavaya te náequenemuri, apaesa ema téchahi táchuhahénapa ticaejacaheyare te návihahi ena tipicauchacareanapanahi. Tásiba, ecunachacarénasarepa nayehe ena natarihiqueneana. ¹¹ Taicha nácani ticasíñavavaicanahi tímijachavanahi ticapicahuana, ema Viya máimicatsiriacavacayarehi. Nácanisera mánsuanahi eta náitaresira, ichapeyare eta nacunachacarevayare me Viya.

¹² Ema Jesús maconsejachavare ema fariseo, ema ticumpirarecahi:

—Píti apanavare, te péniricayare, vahi nacucarichu píchuhavaca ena pémunacasareanahicha, ena piparapenaveanapuca énaripa ena rícoana, táichavenénahi eta pivarairainahi títsirijicavanaya eta piyehe. ¹³ Píchuhavacayareva ena páureana, nácani nacahemahianahi: túpúpavaquiana, masariana, púchuquiana. ¹⁴ Taicha ena nani,

vahi títsirijicavanaimahi eta piyehe. Táitsivasera tétávicavayare eta piúricacarevayare píti eta pijacapirayare eta píuchihi te jena sácheyare picachanevacayare ena náuriqueneanahi macaechepureana ema Viya —macahepa.

Ema Jesús máimicutichinavare ema achane tíchuhavacahi ena achaneana, máeniruanayare

¹⁵ Tacahe, eta nasamirahi ema Jesús ena natiari-hiqueneanahi te mesa, téchajicapa ema émana. Ánipa macahehi eta mayehe ema Jesús:

—Tétávicavayare eta viúricacarevaya te visia-papuca eta mávasa ema Viya, vinicayare te mame-sara —macahepa.

¹⁶ Tásicha, ema Jesús majicapapa, máichapa:

—Jéhesare, te esiapapapucaya! Nímicutichinahe puiti. Matiarihihi ema émana achane téñiricahi eta ichapemuriquene tinicacare. Camuriana ena máichuhauqueneanahi. ¹⁷ Te máimahapa tiúripa eta tinicacare, mavanecapa ema manusura mametacavaca náitecapa ena nacaichuhaca-siqueneanahi taicha tiúriripahi eta tinicacare.

¹⁸ Namutusera natanucapa eta náetseraruyarehi. Ema apana ánipa macahehi: “Vuíchaha nítujicavaimahi níteca. Nuyananumayare nímahapanayare eta nuvachareruhi apaquehe”.

¹⁹ Ema apana énerichuvare, ánivare macahe: “Picatajicanuchaha. Vuíchaha nítujicavaimahi níteca, taicha nuyananumayare nímahapanayare eta cinco yúntaquene vuiye nuvachareruanahi”.

²⁰ Ema apana ánivare macahe: “Nupaenumava nítouchavahi eta nuvehacacairahi. Eta tacahe, vahi nítujicavaimahi níteca”. ²¹ Te tichavapa

ema musu vanairucahi, mamecapa ema máquenu eta namaitujisiravavacahi títecana ena máichuhuqueneanahí. Tásiha, tisemapa ema máquenu. Máichavarepa ema musu: “Tiuri, piyana puítirichu te plaza étapa te cálleana. Píchuhavaca ena páureana, ena masariana, ena púchuquiana, nácani pétupiaruanayare nacahemahiqueneanahí”. ²² Tacahe, te tichavavarepa ema musu, mamecapa ema máquenu, máichapa: “Tata, nítaucharipa eta juca pivanaipipihi. Jucarihichahasera eta juca téjasihacareana”. ²³ Tacahe, ema máquenu máichavarepa: “Piyanavare puítirichu te isanitiana. Píchuhavaca ena achaneana, nácanipa piácapajiruanayarepahi te achene. Picamesavaca náiteca, apaesa nayuriticava eta juca téjasihacareana mávacuanaichahahi. ²⁴ Nusemacarupa puiti. Nájinava néniruimahi ena náinapureanahí níchuqueneanahí” macahepa ema téniricahi —máichapa ema Jesús.

Vahi májejeráena eta véhisiraya ema Cristo

²⁵ Te jena sácheana, camuriana ena achaneana téhicanahí ema Jesús. Tásihasera, éma máesenimurihapa. Máichavacapa:

²⁶ —Te etiarihipuca éti evarahanayare éhicanu, tacamunu epamicavaya yátupina eta éhisiranuya. Nútinapa émunacapanayare, németavicainapa eta émunasiravacaini ena ticachichaheana. Mácani achane németavicayareva eta máemunasiraini esu mayena, machichanaveanapuca, maparapenaveanapuca. Váipavare éñamaimahi eta ítaresira. Téhesera apaesarichupuca eta

émunasiranuyare, vahi táuricaimahi éhicanuhini.

²⁷ Ecatajivayare taicha eta éhisiranuyare. Te epicahipuca íjaracava muraca, taimicapacahepuca eta éhisiranuhi, tiúripanaichu vahi ecuehicanu.

²⁸ Tacutiquene te epanerechahipuca éti épiyarecayare eta anuquehe peti apinapuca piso, vahi táuricahini émunanasicavahini enahahjisiravainarichuini ecaematane, epanerechanumayarehi áyanayarehipuca egastaruva ítauchirainahi eta evarahaquenehi épiyaca. ²⁹ Vahi ácaemuñavaimahi épiyareca eta tiúrina peti, te vahi áratahaimahi ítaucha. ³⁰ Tásicha, nacahénapapuca ena ticaecahiheanayare: “Ímahapa, váhira máratahahini máitauchahini eta jena peti, táurinaqueneyarehíji. Tíjaracavasamipa. Ichape eta mamelaya” nacahenapapuca. ³¹ Émaripa mácani rey, te tisemahipuca, mavarairahi máichayare eta guerra, macanayarehi mácani apuna rey camuripananahi ena machanerana, mapanerechanumayarehi te maratahayarepuca macanara taicha éma vahi camurianainahini ena machanerana. ³² Eta máimairahi vahi máratahayarehi, váhivare tíjaracavaimahi máehcacahini. Tásicha, máimivanerecainapa mayehe ema mánarayarehini táitavapa eta semanerehi, vaipa nacupanerechahini.

³³ Ene ecahehi éti. Eta evarairahi éhicanu, epanerechanumayarehi eta ínajisirayare tamutu, eratahairayarepa yátupi eta éhisiranuyare. Taicha te vahi eratahayare, vahi ecucaemuñava éhicanuhini.

³⁴ Eta icheve, téavicavahi eta táurivahi taicha eta tacamunucarevahi. Étasera eta tajachira eta

icheve, tépurucarepahi. ³⁵ Tájinapa tacamunuca-revainahini. Ticaquijiyarepa. Ene nacahehi ena tínajicavana eta náehisiranuhi. Nacutihí eta ta-jachira eta icheve. Te evarahapuca ecaicutiara, tavaraha eta epanerechinavaya —macahepa.

15

*Ema Jesús máimicutichinahi te témitiaca étana uvesa
(Mt 18.10-14)*

¹ Tiuri, te jácani sácheana, títecaparacanavarepa ena achaneana te mávihahi ema Jesús. Camuria-napahi éna. Natarihipahi ena cóbrarécarahiana eta impuestoana. Namutu éna, ichape eta náepuru-carevahi nayehe ena fariséoana. Émasera ema Jesús, vahi máepuruvacahini. Tásicha, témeñaha-vanapa éna te machacaya, taicha navarahapa nasamararacayarehi éma. ² Natarihipahivare ena fariséoana énapa ena máestroana. Ena nani, vahi náuricahini eta macachaneiravacahi ema Jesús ena nani achaneana. Ánipa nacahe:

—¡Vahi tiuri eta máichaquenehi ema maca! ¡Nanutuchucha majacapavaca ena nacahequenetátájiana ticajachahacareanahi! ¡Nasapihana macachanevacahi eta nanisirahi ena nánitatajiana! —nacahepa.

³ Tacache, te masamapa ema Jesús eta juca, máimicutichinavacapa eta máimitusiravacahi. Ánipa máichavaca:

⁴ —Esamanuchaha. Nímicutichinaheya puiti. Matiarihi ema émana achane. Ticayehehi eta cien uvesa. Te témitiyechapuca eta étana, ema achane tiyanayarehi matanuca eta táemitiaruhi. Eta

máeñamiravahi, majunijicayarehi eta apamuri noventa y nueve uvesa te majaneasihahi.
5 Jéhesare, te máichimavapa eta táemitiaruhi, tichavapa tiúrisamurepaipa. Mámapaipa te machepa. **6** Te títecrapapa te mapena, máichuhapa ena machacayapenana májiriareana. Tacahé, máichapa éna: “Yare, éti apana iúrisamurevare nuyehe nútì. Taicha níchimavaipahi eta uvesa táemitiaruhi” máichapa ena májiriareana.

7 Tiuri, nútì numetacahe eta juca: Énerichu ema Viya te anuma tiúrisamurevare nayehe ena achaneana tiúritaresiranahi, taicha tájina náejecapiravainahini. Tétavicavainehisera eta máurisamurevahí ema Viya nayehe nácani achaneana tímationahi eta nacapecaturairahi, tásicha téneuchavanapa, náinajicapa eta napecaturanaini —macahepa ema Jesús.

Ema Jesús máimicutichinahi eta táemitiaru étana reale

8 Tímiyanava eta máechajirisirava ema Jesús, ánipa macahe:

—Nímicutichinaheya eta apana. Sutiarihi esu ésuna esena. Ticayehehi eta dies reale eta ti-japu plata. Te témitiyechapuca eta étape, tinanesiyarehi sutanucayarehi eta táemitiaruhi. Eta sutanusirayare, suyustacainapa eta sumicahu. Supihicainapa tamutu eta te tajuhe eta supena.

9 Te suíchimavapa, tiúrisamurénapa. Suíchuhavacainapa ena suchacayapenana suájiriareana. Tacahé, suíchavacainapa éna: “Yare, éti apana iúrisamurevare nuyehe nútì, taicha níchimavaipa eta reale nucamitiaruhi” suíchavacainapa esu esena

ena suájiriareana. ¹⁰ Tiuri puiti, nútí numetacahe eta juca: Ene macahehi ema Viya. Tétavicavainehi eta máurisamurevaya te namuri ena ángeleana eta máeneuchiravapa mácani achane cápecatura-rahini, máinajisiraipahi eta mapecaturanaini — macahepa ema Jesús.

Ema Jesús máimicutichinahi ema émana achane amaperu tacamitiriaru eta matuhusiva

¹¹ Tímiyanava eta máechajirisirava ema Jesús, ánipa macahe:

—Matiarihihi ema émana achane. Apinanahi ena machichanaveana. Ajairana. ¹² Étana sache, máichapa ema maiya ema émana machicha amuyapana: “Tata, picatajicanupa, píjaracanu puiti eta nuyeheyare tatuscachaquenenuyare eta picayehequeneana” máichapa. Tacache, tísapavapa ema naiya. Máijaracavacapa eta máimahaqueneana ena apinana machichanaveana. ¹³ Tacache, étarichuhi te jena sácheinahí, tétupiricavapa ema amaperu, tiyanavanepa. Mámapa tamutu eta mayehechiravaripahi máijararuhi ema maiya. Tiyanapa te apana avasare tayerehiquene. Eta ánaqui, máitaiyahí tamutu eta máimahaqueneanaini. Tamutupa mamapachichijica. ¹⁴ Tacache, eta jena sácheinahí, táitecapauchapa eta ecuha eta avasare mávhahí ema amaperu. Tacache, namutu ena achaneana tayehe eta te avasare téchurihanapa eta tinicacare. Tivayuchavapa eta ecuha. Ema amaperu titarahaipahi eta máimahaqueneanaini. Tásicha, tájinapa maviyahini eta manica. ¹⁵ Tásicha, ticaquenurecapa mayehe ema émana achane.

Tacahe, ema máquenuhi mavanecapa ema amaperu eta majaneasinaya eta cúchiana eta te máesane. ¹⁶ Ichapesera eta máecuavahi. Majamurachainehi manicahini eta taniru eta cúchiana, taicha nájina náitátihini éma. ¹⁷ Tacahe, téquecavapa eta mapanereruanahi. Tipanerequenehavapa émajiva. Ánipa tacahehi eta mapanereruhi: “Namutu ena mavanarana ema tata, tiúrihi eta nanisira. Nútisera ani ticapacanuinapa eta nécuava. ¹⁸ Níjaracava, nuyana nuchava eta me tata ticachichanu. Tásiba, níchayare éma: Tátachicha, nucapecaturaipa mayehe ema Viya étapa eta piyehe piti tata. ¹⁹ Tayanarinepuca táimicutijiricavaineepuca vahi pichichanuina. Picatajicanusera. Pijacapanu, nímiáquenuchavarine piyehe piti tata. Nácutirine ena pivanarana. Níchayare ema tata”. Tacahepa eta mapanereruhi ema amaperu achane.

²⁰ Tásiba, tiyanapa tichava eta me maiya. Te tiánehipa títecapa ema amaperu, máimahapa ema maiya. Enurujipa máimativane. Ichaperinehi eta majapanuirahi. Enurujipa tiyana tijunapa mácapa. Majupahacapa ema machicha. Máetserarecpa eta máurisamurevahi. ²¹ Émasera ema amaperu, téchajicapa. Ánipa maicha: “Tátachicha, nucapecaturapa mayehe ema Viya étapa eta piyehe piti tata. Tásihasera, tayanarinepuca táimicutijiricavaineepuca vahi pichichanuinaya” máichapa. ²² Émasera ema maiya, mavaraha máimercaya eta yátupirahi eta majacapirahi ema machicha. Vahi máicuñacahini. Tásiba, mavanecapa ena mavanarana. Máichapa:

“Etátájirica, iama eta muíriare tiúrinapana. Emuiriacha ema maca nuchicha. Iama eta tiúrinapana surtja; masurutijaina. Iámvare eta tiúrinapana eparupeva, máeparupevaina.

23 Énerichuvare épana eta jena mamona tiújepana. Ecapaca, vinica. ¡Víchayare eta piesta! Viúrisamurevaina eta máitecapirahi ema maca nuchicha. **24** Taicha éma, tímicutijiricavahi eta máepenaquenénahini ema maca, puítisera tiúchujicapa tichavapa ani nuyehe. Máemitiaruhi te numirahu, puítisera nímahapa éma” macahepa ema maiya. Tacahe, ichape eta náurisamurevahi namutu. **25** Tiuri, ema émana machicha máechavihi tiyanahi te isaniti. Te tichavapa, te tiánehipa eta napena, masamapa eta piesta te tajuhe.

26 Tásicha, máichuhapa ema émana nacajurure. Mayaserecapa: “¿Tájaha tacayema eta juca piesta?” macahepa. **27** Tacahe, máichapa ema macajurure: “Ema piparape títecaphi. Tásicha, ema piya máimicapacapa eta étana mamona tiújepana. Ichape eta piesta, taicha eta máurisamurevahi ema piya eta máitecapirahi ema piparape” máichapa ema macajurure.

28 Tacahe, tisemarinehi ema maparape. Vaipa mávarahahini masiapahini. Tacahe, te máechapa ema naiya, tiúchucapa. Macamesapa macasiapa.

29 Majicapapasera ema machicha, ánipa maicha: “Pímaha, tata. Ánaquiapapa eta nítatíravihi nútì. Tájina nímatiyahini nácapaemachavihini te pivanairipiana. Tásihasera, tájina píjaracanuhini eta étanainahini chívachichainapucaíni eta nunicahini nucapiestarahipucaini nútì,

ná cachanehini ena nájiriareana némunacasareana.
 30 Tásicha, puiti pímicapacainehi eta mamona tiújepana, taicha eta máitecapirahi ema émana pichichatataji. Ema mácatataji titahacavahi eta píjararuinihi picayehequeneanainihi náchavenehi ena esenana túhusiana” máichapa ema machicha.
 31 Tacahe, ema maiya máichapa: “Pímaha, nuchichachicha, píti ánaquiaparipa eta péjahasiranuhi. Tásicha, tamutu eta nucayehequeneanahi, piyeheanahivare píti. 32 Puítisera, táuricaichucha vicha eta piesta eta viúrisamurevainahi, taicha tímicutijiricavahi eta máepeñaquénahini ema maca piparape, puítisera tiúchujicaipa, tichavapa éma. Ema máemitiaruhi te vimirahu, puítisera viápechavavarepa vímaha éma” máichapa.

Tacahehi eta máechajiriruvanahi ema Jesús nayehe ena achaneana.

16

Eta máimituresirahi ema Jesús, máimicutichina ema capataz timapachichijicahi eta máimahaquene ema máquenu

¹ Ema Jesús ánivare macahehi eta máimitusirvacahi ena máimitureana:

—Nímicutichinahe eta apana. Ema achane rico, matiarihihi ema mayehe capataz, téchahi tamutu eta máimahaqueneana ema máquenu. Tásicha, masamairiricapa ema máquenu eta mamapachichijisiraipahi eta máimahaqueneana. ² Tacahe, ema máquenu máichuhapa. Mayaserecapa: “¿Tájaha tacayema eta juca? Nusamauchavihi eta pimapachichijisirahi

eta nímahaqueneana”. Émasera ema capataz tájina maviyahahini macatiuchiavahini taicha yátupihi eta máejecapiravahi. Tacahe, ema máquenu máichapa: “Tiuri, vitupaequenehayare tamutu taicha vaipa nuvaraha pímiyanava eta nuyehé”. ³ Tacahe, ema capataz ichaperinehi eta mapanereresirahi taicha eta máuchusiraya. Tásiha, macahepa te mapanereruana: “¿Tájahainapapuca nícharacavayare puiti? Ema náquenu ticuchucanuinapa tayehe eta juca nématanerepihi. Ichape eta nutsirihacarevayare taicha vahi núrihahini nucaematanehini eta isaniti, váhivare nuratahaimahi eta tamuracava eta emataneca. Titsirihacarehivare nuyaseserecahini eta nunicaquene”. ⁴ Tiuri, áni nucaheyare. Némeñahavayare nayehe ena ticanteveanahi mayehe ema náquenu, tiámainucava te nítucavapapucaini eta nítatijiyavayare” macahepa te mapanereruana.

⁵ Tacahe, máichuhavacapa namutu émanapahi ena ticanteveanahi mayehe ema máquenu. Tacahe, mayaserecapa ema máinapuiruhi: “¿Péchapuca áyana eta pintevehi mayehe ema náquenu?” ⁶ Tacahe, ema ticantevehi majicapapa: “200 lata eta aceite comer eta nuntevehi mayehe”. Tacahe, ema capataz máichapa: “Júcahi eta piyehe vale pifirmaruhi. Puítinarichu vítsivachaya eta apana vale. Vaipa pivachachaimahi tamutu. Cien latainarine eta pinteveyare” macahepa. ⁷ Tacahe, mayaserecavare ema apana: “¿Pítiyapa péchapuca áyana eta pintevehi?” Ema ticantevehi majicapapa: “Séisientohi tarera eta trigo eta nuntevehi mayehe”. Tacahe, ema

capataz máichavarepa: “Júcahi eta piyehe vale pifirmaruhi. Vítsivachaya eta piyehe vale. Vaipa pivachachaimahi tamutu. Quinientorine tarera eta pintevveyare”. Ene tacahehi eta máichirahí nayehe ena apamuriana ticanteveanahí, máitsivachirapaipahi eta nayeheana váleana.

8 Tacahe, te máechapa ema máquenuní etá máichaqueneanahí ema mayeheni capataz etá macatiuchiravahí, ánipa macahe: “Tétavicavapa etá máitusirahí masámápuha ema maena nuyeheni capataz” macahepa ema máquenuní. Ene nacahehi ena achaneana máimatirahanahí ema Viya. Éna tiápajupanavanahivare etá náitusirahí etá tayanirava. Nacachuricahi ena téhicanahí ema Viya, taicha tavayuacavacahi etá tájiparacana.

9 Puiti numetacaheyare eti nímitureanahí: Eta ítaresirahí te juca apaquehe tamauriquenehi, te ecaimahaquenehipuca, ecajiyare te napauchahepuca ena ticamunuwanahí. Tacahe, te ítecapapa te móvasa ema Viya, tiúriyare etá ítecapiraya, ánaqui ejacapainapa etá táitsivayare.

10 Taicha nácani tiúrihi etá náechapajirisirahí jácani ánichichaquenehi, ene tacaheyarehi etá táurivayare etá náechapajirisirayare etá camuriquenehi. Nácanisera vahi tiúrihi etá náechapajirisirahí jácani ánichichaquenehi, éneyareichuhivare vahi tiúrimahi etá náechapajirisirayare etá camuriquenehi. **11** Taicha te vahi tiúrihi etá ítauchirahí etá ecatuparahairahí échapajircaya etá tímahacareanahí etá te juca apaquehe, ema Viya vahi tituparacahémahi etá tímahacareana yátupiqueneana te anuma. **12** Eta tacahe, ítaurahiyare

tayehe jácani apayeheana apaesa máijaracahe ema Viya eta ícuchihi, taicha eta máimairahi éma eta ítauraivahi éti.

13 Éti, eta ítaresirahi, vahi táuricahini apinanainahini ena iáquenuana. Taicha émunacapanayarehi ema émana, tisuapacarepanayarehivare. Tásicha, ema apana, apaesarineya eta émunasiraina, váipainapa tisuapacaremahi éma. Ene tacahéhi eta juca ímahaqueneana, vahi ecuisapa tahapasamurerecahehini eta plata, machu tahapapiricaheriana eta émunasirahi ema Viya, étapa eta ecaemataneasirahi éma — máichavacapa ema Jesús ena máimitureana.

*Ema Jesús maconsejachapa ena fariséoana
(Mt 19.1-12; Mr 10.1-12)*

14 Natiarihihivaresera ena fariséoana. Nasamararacahi eta juca máimiturapianahi ema Jesús. Tásicha, nacaecahirichuchasera eta nasamirahi éma. Taicha téavicavahi eta tavayuasiravacahi éna eta tímahacareana.

15 Tacahé, ema Jesús máichavacapa:

—Éti épiyacavahi iuri eta ímairavahi nayehe ena achaneana. Émasera ema Viya máimatihi eta esamureana. Macatianacahi ichape éma eta apimirahérahi.

16 Numetacahevare eta apana: Ema víyarahaini Moisés, énapa ena víyarahahanaini profetana tínapucanahi eta náechajisihahi tayehe eta nítesirayarehi nuti Cristo ecuchapaquenehi. Puiti ichape eta navapinairavahi ena camuriqueneana téhicanuanapaipa. Éti apana, tituparacahe éhicanuyareva.

17 Numetacahe puiti: Váhiquene titavaimahi eta tasuapacarevahi eta máechajiriruvana ema Tata. Máichecuaraquire éta, tayanapanehipuca taitava eta anuma étapa eta juca apauehe. **18** Éti, eta ímiturapi, ísapahi mácani achane máquijica esu mayena, tásicha, ísapahivare maveha esu apana esena. Nútisera numetacahe: Mácani achane, te máinajicapuca esu mayena, tásicha maveha esu apana esena, éma ticapecaturaipahi me Viya. Tacutiquene mácani apanavare achane mavehapa esu esena máinajiruhi ema suima, énerichuvare ticapecaturahivare me Viya taicha ésu, matiarihichahí ema suímaquenehi —máichavacapa.

Eta macatajivairahi ema rico étapa eta máuricacarevahi ema paure ticaijare Lázaro

19 Tacahe, ema Jesús máimitucavacavare ena achaneana. Ánipa macahe:

—Nímicutichinahe eta apana. Matiarihihi ema émana achane. Mavayuchahi eta marricuva. Tétavicavahi táurinavahi eta macamuirihaira. Tijanunuuhacanecha. Tamutuhi sácheana máicha eta táurinaquene piesta. **20** Tásicha, matiarihihivare ema apana achane paure ticaijare Lázaro. Ticajumahi. Amairihahi carachachaha eta majuma. Téjahapairicahi éma tamutu sácheana te mapajacura ema rico. **21** Ema maca paure tiyaseserecahi manicayare eta máemacharajiana ema rico. Tájinaserá náijaracaimahi. Tavetijipa, vahi túmenahini ema paure. Vaipa maratahahini macatiuchavahini eta taeversirahi eta tamcuana eta macarachana. **22** Étana sache títecapapa eta máepenirahi ema

paure. Nárajapapa ena ángeleana; náepanapa eta máchaneva ema Lázaro, námapa tayehe eta paraíso mávihahi ema viáchucaini Abraham. Tacahe, te táequenepa, tépenavarepa ema rico. Tiúrinavare eta náecarirahi. ²³ Eta máepenirahi éma, tiyanapa tayehe eta macatajivaiyayarehi. Tásicha, te téjamiháuquichapa, máimahapa eta mávihahi ema Abraham, émapa ema Lázaro te machacaya. Mayerehivacahisera eta máimairahi. ²⁴ Tacahe, tipiaracapa ema rícoini: “Tata Abraham, pájapanunu. Picatajicanu, pivanesinanuini ema Lázaro máechipaicaini apaesachichaini eta mavauqui te une. Máecasarechapanaini eta nunene. Taicha tétavicavahi eta numaunevahi eta te juca nucatajivaiyahi tayehe eta juca návhahi tájurequene yucu” máichapa. ²⁵ Émasera ema Abraham majicapapa: “Vahi nuvanecaimahi. Péchavachucha, nuchicha, te achanevichaha, tétavicavahi eta piúricacarevahi. Tájina pácamunuñuhini eta pítaresirahi. Ánipasera picatajivaiyahi. Émasera ema maca Lázaro, ichapemurihi eta macatajivairahi te achanelrichaha. Puitisera vaipa macatajivahini. Puiti éma, majacaparipahi eta máuricacarevahi. ²⁶ Tacutiquene máitujihí eta mánucuirainahini eta ára piyehe. Pítiripa vahivare pítujicavaimahi pítecapauchahavi ani te juca viávihahi víti, taicha jucarihi eta tíchejmirauchahavihi eta viánucuirainahini tacutihi eta tiúchausi cajacure. Máitujihí eta mayanahini” macahepa ema Abraham. ²⁷ Tacahe, ema rícoini máichavarepa: “Tiuri, te váhipuca titujicacarehi, picatajicanusera.

Pivanesinanuini mayana ema Lázaro te nupena.

²⁸ Mametapaninanuini ena cíncinqueneana nuparapenaveana. Maconsejachapanavacaini eta náeneuchiravainaini éna, apaesa vahini nacuitecahini tayehe eta juca návihahi nuti nucatajivaiyahi". ²⁹ Émasera ema Abraham máichavarepa: "Éna, narataha téchajicurecana, ticaravahuanayare eta Sagrada Escritura. Te nasuapahivarepuca eta tavanairipianahi, vahi tisiapanaimahi eta te jara ecuñaraqui piávihahi píti". ³⁰ Ema rícoini majicapavarepa: "Táitaurevaquene ene tacahehi, tata Abraham. Tiúripanahiserahipucaini mayanahini ema émana máepenaquenehi eta nayehe ena nuparapenaveana, mametapanavacahini. Németeaca téneuchavavaneanapaini". ³¹ Ema Abraham máichavarepa: "Te váhipuca nacusuapahini eta Sagrada Escritura, tacaheyarehi eta namasuapirayare mácani máechepurehi máepenaquenehi" macahepa ema Abraham.

17

*Ichape eta máicuñayare mácani tímiaquipaica te pecatu ena amaperuana
(Mt 18.6-7; Mr 9.42)*

¹ Te táequenepa, ema Jesús mametamurihavarepa ena máimitureana. Ánipa macahe:

—Yátupi eta vahi téjiacavaimahi eta tímiaquipaicayare tayehe eta pecatu ena achaneana. Ichapesera eta náicuñayare nácani táemesiavanayare náimiaquipaisiraya nácani apamuriana tayehe eta pecatuana.

² Mácani tímiaquipaicaya ema émana amaperu, tiúripanahipucaini máepenahini mativainahini éma. Váhirichupucaini macucaicuñahini; taicha vahi macuimiaquipaicahini ema amaperu tayehe eta pecatu. ³ Eta tacahe, échapavaya éti machu ímiaequipaica ena amaperuana.

*Tatuparaca viperdonacha ena téjecapavana
viyehe*
(Mt 18.21-22)

Numetacahe eta apana: Te máejecapavapuca ema piparape eta piyehe, piconsejachaya. Téhesera máeneuchava eta piyehe, piperdonachaya éma. ⁴ Tayanapane siétehénapuca máejecapava te étana sache, máeneuchavasera eta piyehe, tituparacavi piperdonachayare—macahepa ema Jesús.

*Tamutuyare virataha te yátupihi visuapa ema
Viya*

⁵ Tiuri, ena apóstoleana nayaserecapa ema Jesús:
—Tata Viáquenu, picatajicahavi. Pímitucahavi apaesa tajurucapaipaini eta vicasiñairavahi mayehe ema Viya. Vivaraha ichapenaini eta vicasiñairavaya eta mayehe—nacahepa.

⁶ Tacahe, ema Jesús majicapavacapa:
—Vahi tácamea ichapenahini eta ecasiñairavahi mayehe ema Viya. Tayanapanepuca áníchichainarichu eta ecasiñairavahi, tacutipuca eta táquichicha eta mostaza, tamutuyare erataha. Étaripa eta jácani yucuqui, te evarahapuca ecayejeca, eratahayarehi. Te íchapuca: “Piyejecava eta te juca, piyana pisucuchava te cáquiure”; tásicha,

eta yucuqui tisuapaheyarehi. Tiyejecavainapa tayehe eta cáquire.

Tatuparaca vítauchayare eta vicaemataneasirayare ema Viya

⁷ Étaripa ema mácani achane te ticamusurahi, te másihapaipapuca ema musu te vámahi eta majaneasirahi eta vaca, te tísahahipuca, te títecacapapa te peti, ema máquenu váiparinehi matátáuchaimahi máepiyaca eta tinicayare eta máenisiraya ema musu. ⁸ Matátáuchayarechucha mavaneca ema musu émaina máepiyaca eta tinicacare, máenicayare ema máquenu. Tásicha, máichainapuca: “Tiuri, nítanesipa. Pítipavapa pinica”. ⁹ Váiparinehivare mahasulupaya-chaimahi ema manusura eta máitauchirahi eta mavanahianahi. ¹⁰ Ene ecahehi éti, ecuti ema musu. Te ítauchapa tamutu eta evanahiana me Viya, ecahenapa: “Viti müssuanahi vahi vicunachacarémahi. Tacarichuhi vicha eta vivanahianahi” ecahenapa —máichavacapa ema Jesús.

Ema Jesús macanaracahi ena diésqueneana leprosoana

¹¹ Tímiyanavavare tipaica ema Jesús, macaijuhepa eta Jerusalén. Máetavicavacapaipa eta avasareana te provincia Galilea étapa eta Samaria. ¹² Te máitecapauchapa eta apana avasarechicha, tiúchujicanapa ena diésqueneana ajairana ticajumana eta lepra. Nacapayacapa éma. Váhisera náemeñahavahini éna, nayerehichucha. ¹³ Tacahe, napiaracapa ema Jesús:

—Tata Jesús Nazareno, pájapanuhavi. Picatajicahavi, picanaracahavi eta vijuma —náichapa.

¹⁴ Tacahe, ema Jesús máesenicavacapa. Tásicha, máichavacapa:

—Eyana, ímerecava te namirahu ena tuparairucana apaesa náimamaracahe. Énainapa nametajirica eta iúrivaipa, enarasiraipahi eta ejumanainihi —máichavacapa.

Nasuapavanehi éna. Tásicha, eta nayanirahi, tinaracanapaipa. ¹⁵ Tacahe, ema émana, eta máimairavahi eta manarasiraipahi, tichavapa te mávihahi ema Jesús. Tipiaracapaipahi muraca eta macunachirahi ema Viya. ¹⁶ Matupirupa tépuyucahi te mamirahu ema Jesús. Tétipaicapa macaitecapa eta mamira te apaquehe, mamaverarasiravahi eta mahasulupayachirahi ema Jesús. Ema maca achane, indigenahi samaritano. ¹⁷ Tacahe, ema Jesús máichapa:

—Ticutimahi diésnahi ena nucanararuanahi. ¿Tájahapuca tacayemahi vahi nachavahini ena apamuriana nuéqueneana? ¹⁸ Macarichuhi tichava ema maca apavasaquenesamihi, macunachapaipa ema Viya.

¹⁹ Tacahe, ema Jesús máichapa ema achane:

—Péchepuca, piyana pichava. Pinaracaipasera táchavenehi eta picasiñairanuhi —macahepa.

*Eta ecutiarareanaya eta máitesiraya ema Cristo
(Mt 24.23-28, 36-41)*

²⁰ Tiuri, ena fariséoana nayaserecavare ema Jesús tájamuhuyarepuca eta máitecapiraya ema Cristo nacuchapaquenehi. Éma, majicapavacapa:

—Eta máitecapiraya ema ecuchapaquenehi, tájina metárapimahi eta máimeresiravaya éma. Vahi tácajerahini eta ímairaya. **21** Nájinavare timetajiricaimahi eta máitecapiraya taicha matiarihiripahi éma puiti ani. Nútiripa — máichavacapa.

22 Tacahe, máichavacapa ena máimitureana:

—Tatiarihiyare eta sáchevayare ichapeyare eta ecaimairunuiraya. Tétavicavaya eta evarairaya íjahúchavayare ímahanu nuti Manerejirunuhi ema Viya eta nuchaviraya.

23 Te navayuaracahepuca nacahenapuca: “Émaripa ema vímahaquenehi ánaqui”. Ena apamuriana nacahénavarepuca: “Émaripa ema maca vímahaquenehi puiti eta ani”. Váhisera ecusuapavaca éna. Váhivare ecuehicavaca.

24 Taicha te táitauchavapa eta nítecapiraya núti, nucutiyare eta táijahúchirava títecapa eta térameca. Namutuyare ena achaneana te juca apaquehe tinecapuanayanayare. Tacaheyare eta nuchavirayare nuti Manerejirunuhi ema Viya. Ticaecherayaresera, tájina vahi máchasimahi.

25 Tativayaresera nucatajivanumayare ichape. Tépurunuanayare ena achaneana natiarihiqueneanahi puiti. **26-27** Tacutiyare eta acane ena achaneana machamurianaini ema Noé. Ena nani tinicairihianarinecha, náematanerinecha, téran, tímarrerecanahi ena nachichanaveana. Vahi téñamavanaimahi eta náimairahi ema Noé eta masiapiroahi tayehe eta ichape pacure. Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta

ichapequene tiquiva, tacapapajicavacahi namutu éna. Ene nacaheyare ena achaneana te jena sácheyare. Vahi titsecavanaimahi tayehe eta nuchaviraya. ²⁸ Tacutiquene ene nacahehivare acane ena achaneana ena machamuriana ema Lot. Tinicairihianahivare éna, téraracavanahivare. Étanecha napanerechahi náijarareca eta náevavareruana. Ena apamuriana natanujircarinecha eta nacamunuqueneanahi. Tépiyarerecanarichucha pétiana. Vahi naéñamavahini tayehe jácani ecuñaraquiya. ²⁹ Téhesera te majunijicapa ema víyarahaini Lot eta avasare Sodoma, tíjahúchavapa tiquivapa eta yucu ticasiriqui azufre tiásihahi te anuma. Tacapapajicavacapa. ³⁰ Ene tacaheyare eta nusacherayare nuti Manerejirunuhi ema Viya eta nuchaviraya.

³¹ Te jena sácheyare, nácani tachimaranuanayare te aneca, vahi táuricaimahi nasiapahini te napena navehanumahini jácani náeñamaqueneanahi náimahaqueneana. Énaripa ena napaiririruanahi te vámahi, váhivare tichavaequenehavanaimahi náepanahini eta náeñamaqueneanahi. ³² Écharichuhi eta acane eta suíchararacavahi esu mayenaini ema Lot. Ésu, tétavicavahi eta suéñamaequenehairahi eta suímaquaqueneana sujuniruanahi. Táichavenehi eta suvarairahi tichava, ésujivapa

ticamitiequenehava*. 33 Nácani téñamanahi eta náitaresira, tahapapiricarinecha eta tájiparacana te juca apauehe, éna témitiequenehanaya eta náitaresira. Énasera nácani tahapapiriruanahi eta náehisiranuhi, tayanapanepuca táimicapacavaca, éna titújicavanayare tiúchucuhanayare eta náitaresiranaya.

34 Numetacahevanecha: Te jena yátiyare, te apinanahipuca nácani natiarihiqueneanahi te tajuhe peti, émanayare ema níchuhaqueneyare, ema apana manasiyare. 35 Tacutiquene, apinanahipuca ena esenana tiyuvarecanahipuca. Énerichuvare ésuna esu níchuhaqueneyare. Esu apana sunasiyare. 36 Te apinanahipuca ena ajairana te vámahi, éneyareichuvare émana ema níchuhaqueneyare. Ema apana manasiyareva —máichapa ema Jesús.

37 Eta nasamirahi ena máimitureana, nayase-recapa:

—Tata Viáquenu, ¿távihapuca táitauchiavayare eta juca pimetarapianahi? —nacahepa.

Majicapapa éma:

—Vahi ecueñamava eta távihapuca nítecapi-hayare. Núti nítecapauchaheya te jácani iávihahi

* 17:32 Ema Viya mavanecahi ena apinana ángeleana, nametapano ema Lot eta máicuñasirayarehi eta avasare Sodoma. Ésu-sera esu mayena ema Lot, ticametacasihineni eta sujunairayare sucachaneyarehi ema suima, sucatiequeneharichucha eta suíma-haqueneanainihi. Étapa tiviuchahi sunasipa te achene, tépiyavapa icheve máripuhi.

éti† —máichavacapa.

18

Ema Jesús máimicutichinavare ema juez ésupa esu tépenaima

¹ Ema Jesús máimitucavacavare ena máimitureana vahi nacucainajiruva eta nayujarasirana. Tímiyanavanaya, tayanapané vuichaha najacapavanehini eta nayasearuuanahi.

² Eta máimicutichinahi, ánipa máichavacahi:

—Matiarihi ema achane. Juézhi tayehe eta avasare. Éma, tájina vahi mapicauchahini ema Viya. Nájinavare mapicauréna ena achaneana.

³ Sutiarihivare tayehe eta avasare esu ésuna esena suépenaimaquenehi. Suchavauruiricahi ema juez taicha eta sumetauchirahi ema sucatianaruhi. ⁴ Émasera ema juez vahi masuapahini eta sumetauresirahi ésu. Váhisera sucainajiruvahini. Tásiba, mapanerequenehapa macahepa: “Núti néchinava. Nájina nárataha napamicanuhini. Váhivare tipamicanuimahi ema Viya. ⁵ Ésusera esu suca esena, nuyacujipa eta suchavauririsiranuhi. Nícharinepuca eta suvarahaquenehi, apaesa vaipa sucuápechava suíteca” macahepa ema juez.

⁶ Puiti, nuvaraha ecaicutiaraquenehaicha eta juca nímíturapihi mayehe ema juez mapicauruiraha eta macatiuchirahi esu suca

† **17:37** Te máechajiriruvahi ema Jesús, ani macahehi: “Te jácani mávhahi ema máepenaquene, éta távihayare eta sipuquiana”. Eta juca mayehehi proverbio, tatarihi eta tacayemaquenehi tayumurevahi.

esena táichavenehi eta suchavauruirisirahi éma.
 7-8 Ene macahehi ema Viya. Váhi máyererejimahi eta macatiuchirahevaneya eti manerejiruanahi, esamacareyarehi taicha eta emacainajiruvairahi eta eyujarasirainahi tamutu sácheana, yátiana. Étaripa te táitecapa eta nuchavirayare nuti Manerejirunuhi ema Viya, németeacahi natarihiyareichaha nuchimapaqueanaya ena vahi ticainajiruvanahi eta nayujarasira, nacutihí esu suépenaimaquene eta sumacainajiruvairahi —máichavacapa ema Jesús.

*Ema Jesús tímitucahavi vahi vicasiñavavaicaimahi,
 váhivare vépurrahimahi*

9 Ema Jesús apanavare eta máimicutichinahi eta máimituresirahi, nayehe ena tímijachavanahi tiúriana, tájina náichiravainahi; náepuruvacahisera ena apamuriana achaneana. Tacahe, máichavacapa:

10 —Nímicutichinahe eta apana: Natarihi ena apinana ajairana te Templo. Téneuchavanahi. Ema émana achane, fariséohi éma. Ema apana, tisipecaturarahi éma. 11 Ema fariseo, eta macasiñavavaisirahi, témeñahavapa tayehe eta cuarto tacapicahuquenehi te Templo. Ánipa macahehi eta mayujarasirahi: “Nuhasulupayachavi, Tata Dios, eta núrivahi te pimirahu. Váhi nácutihini ena apamuriana achaneana tiámerahianahi, tisipecaturanahi, esenamareeanahivare. Váhivare nácutihini ema mácatataji te juca nuchacaya. 12 Píti pímatinuhi eta apiheirahi áyunanu te semanana. Níjaracavivare eta plata nugarareruasa. Te nugarachahipuca

eta dies peso, étanahi peso eta níjaracaviparaca. Téhesera cien pésohipuca eta nugarareruhi, dies pésohivare eta níjaracavi. Vahi tuyavanahini eta námavhahuásana eta piyehe” macahepa.

13 Émasera ema apana achane vahi máemeñahavahini. Tiyerehichucha eta máeneuchiravahi. Váhivare mapatsicavahini máesenicahini te anuma. Téhatupachavahisera eta máeneuchiravahi. Ánipa macahehi: “Tata Dios, nucatisamureva ichape eta nupecaturairahi piyehe. Pájapanunusera piperdonachanu eta nupecaturana” macahepa ena achane.

14 Tiuri, nutupiru numetacahe: Ema maca achane, eta machaviraipahi te mapena, tijacapacaréinehi me Viya taicha yátupihi eta máeneuchiravahi. Émasera ema fariseo vahi majacapacarehini. Taicha nácani ticasíñavavaicanahí, tímijachavanahí ticunachacarehi, éna tépurucareanayarehi me Viya. Nácanisera ena tiyaseacanahí ema Viya eta májapanuiravacaina, yátupihi tijacapacareanayarehi mayehe —macahepa ema Jesús.

*Ema Jesús mayujaraucha ena amuyana
(Mt 19.13-15; Mr 10.13-16)*

15 Tacahe, ena achaneana námavacapaipahi ena amuyana eta mayehe ema Jesús, navarairahi máemamahacavacayarehi éma. Énasera ena máimitureana vahi náisapahini, nacaichepaipa ena tiámanapahi ena amuyana. **16** Émasera ema Jesús máichuhavacaichucha ena amuyana. Tásiba, ena máimitureana máichavacapa:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna. ¹⁷ Nutupiruva numetacahe: Nácani vahi nácutihi ena amuyana eta nasuapajiraiva, vahi nuchaneranaimahi éna —macahepa ema Jesús.

*Ema achane rico téchajiricava mayehe ema Jesús
(Mt 19.16-30; Mr 10.17-31)*

¹⁸ Matiarihi ema achane. Náiyacararipahi ena achaneana. Témeñahavapa mayehe ema Jesús, mayaserecapa:

—Tata maestro, piti piúriquene. ¿Tájahapucaini eta nícharacavaini eta nítujisiravaina me Viya máichecuarاقuirénahini eta nítaresira? —máichapa.

¹⁹ Ema Jesús majicapapa:

—¿Tájaha tacayema pímijarechanu “Piti piúriquene”? Mararihi ema Viya. Jéhevare éma, tétavicavahi eta máurivahi. ²⁰ Téhesera te pivarahapuca pecha eta apaza vítaresira, pisuapayarehi eta mavanairipiana ema Viya. Píti pímatipa eta júcana: “Vahi picuveha esu esena apayena. Vahi picucapareca. Vahi picuamereca. Nacuija pépiyaequeneruina. Pémunacaya ena ticachichavianahi” —máichapa.

²¹ Tacahe, ema achane majicapapa:

—Tamutu nusuapahi eta juca vanairipiana eta námaperuvahi, puíticha juca ajairanuirapa —macahepa.

²² Tásicha, ema Jesús máichavarepa:

—Jucarihichahasera eta pítauchaqueñeyare. Píjararecaya tamutu eta pímaqueneana. Tásicha, píjaracavacaya ena páureana. Jéhevare éta, pijacapayare eta pímaqueneñeyare te anuma, táitsivayare. Te tamutupa eta juca, pítécavanepa péhicanu—máichapa ema Jesús.

²³ Te masamapa ema achane eta juca macaye-maquenehi ema Jesús, ichaperinehi eta mapanereresirahi, taicha mavayuchahi eta marricovahi. Macatíequeneharinehi tamutu. Tiyanapa tipanererecapaipa. ²⁴ Eta máimairahi ema Jesús eta mapanereresirahi, máichavarepa:

—Yátupiquenehi máitijihi eta náijarasiravainahini eta náehisiranuinahini ena rícoana eta nasiapirainahini te anuma. ²⁵ Esamanuchaha. Eta juca tímicutijiricavahi eta viperá camello, máitijihi tánucuhahini te támicejehe eta parirapa. Ene nacahehi ena rícoana—macahepa.

²⁶ Tacahe, ena tisamararacanahi, ánipa tacahehi eta nayaseresirahi:

—¡Tétavicavahi eta tamáitujicacarevahi! ¡Nájina titújicavaimahi náuchucuhahini!

²⁷ Ema Jesús majicapavacapa:

—Nájina émanaina achane émajivaimahi ticuchucuhava. Macarichu ema Viya marataha ticuchucuhache—macahepa.

²⁸ Émaripa ema Pedro máichavarepa:

—Vítisera, Tata, vinaquicahi tamutu eta vicayehqueneana, vivarairahi véhicavihi.

²⁹ Ema Jesús majicapavarepa:

—Nutupiru numetacahe: Namutu nácani nanaquicahi eta napena, najunijicahivare

ena ticachichana, ena naparapenaveana,
 nayenanapuca, nachichanaveanapuca,
 táchaveneyarehi eta náehisiranuyare;
30 jararihiyare eta táitsivayare te juca apaquehe
 eta náimahaqueneyare. Nararihiyarevare
 ena achaneana téchapajiricanayareva. Tásicha,
 tavetijinapa te náitecapapa te apana náitaresiraya,
 máichecuaraquirenapa eta náuricacarevaya —
 macahepa ema Jesús.

*Ema Jesús tiápechavavare máechajisiha eta
 máepenirayare
 (Mt 20.17-19; Mr 10.32-34)*

31 Ema Jesús máiputsiamurihana mámamurihana
 ena dócequeneana máimitureana. Tásicha,
 máichavacapa:

—Ímaha puiti, viyanainapa vicaijuhénapaipa
 te Jerusalén. Ánaqui táitauchiavayare tamutu
 eta nájucunachaqueneanahi ena profetanaini
 eta níchararacavayarehi nútí Manerejirunuhi
 ema Viya. **32** Ánaqui nucaijararecasiyare nútí
 nayehe ena apavasaqueneana romanoana.
 Énainapa ticaecahijiricanuanayare, ticaete-
 majiricanuanaya, tiátutuquichanuanayareva.
33 Téstacanuanayareva. Tásicha, ticapacanua-
 nainapa. Tásihasera te mapanaquenénapa sache,
 néchepucainapa te nécari —máichavacapa.

34 Énasera ena máimitureana vahi nacaicu-
 tiarahini eta juca mametasiravacahi.
 Váhivare náimatiequenehahini tájahapuca eta
 máechajisihihi taicha vahi náemeteacahini
 énemahinahíni náichahini ema Jesús.

*Ema Jesús macaimairirica ema achane púchuqui
ticavasa te Jericó
(Mt 20.29-34; Mr 10.46-52)*

35 Tacahe, te tiánehipa títecapa ema Jesús tayehe eta avasare Jericó. Matiarihi ema achane púchuqui, téjacahi te achenechacaya tasiaparacuhi eta avasare. Tiyaseserecahi eta limosna.

36 Te masamavacapa ena camuriqueneana achaneana tiánucuhananapaipa, macayasesererupa ema púchuqui tájahahipuca eta téchacarehi.

37 Nametacapasera eta émairahi tiánucuhayarehi ema Jesús Nazareno. **38** Tacahe, tipiaracapa ema achane púchuqui:

—¡Tátachicha Jesús! ¡Pítiqueneripa yátupique-névihi Cristo! ¡Picatajicanupaini! ¡Pájapanunu! —macahepa.

39 Ena achaneana tínapumiráuchanapahi ema Jesús navarahapa nacamatinacayarehini. Émasera tipiararecaichucha:

—¡Tátachicha Jesús! ¡Pítiqueneripa yátupique-névihi Cristo! ¡Picatajicanupaini! ¡Pájapanunuini! —macahepa.

40 Tacahe, ema Jesús te macanarapa, tíchecanumapa. Macavanairipipa náepana ema púchuqui. Te nacaitecapa, mayaserecapa:

41 —¿Tájaha picamunu nuyehe?

Ema púchuqui majicapavarepa:

—Tátachicha, nuvaraha picaimairiricanupaini —macahepa.

42 Ema Jesús máichapa:

—Tiuri, nuchicha. Táichavenehi eta picasiñai-
ranuhi, pinaracapa puiti —máichapa.

43 Jéhesareinehi, tíjahúchavapa timairirica ema púchuqui. Tásicha, tiyanapa máehica ema Jesús tiúrisamurepaipa. Macunachapaipavare ema Viya. Énapa ena achaneana tímararacanahi eta manarasirahi, ichaperinehi eta nacunachirahi ema Viya.

19

Ema Zaqueo mavarahahi máimati ema Jesús

1-2 Tacahe, eta máitecapiraipa ema Jesús te tajuhe eta avasare Jericó, matiarihi ema achane rico, ticaijare Zaqueo. Nacapitarahi ena cóbrarecarahiana eta impuesto. **3** Te masamairiricapa eta émairahi ema Jesús títecrapapahi, mavarahapa máimatiyarehi. Étasera eta máichipichuvahi éma, vahi måratahahini máimahahini ema Jesús te namuri ena camuriqueneana achaneana. **4** Tásicha, tijunapapa eta te mayanihayarepahi ema Jesús. Tiápanapa te yucuqui, máimamaracasaréipahi ema mavarahaquenehi máimati. **5** Tacahe, te macapecupa ema Jesús eta yucuqui mávihahi ema Zaqueo, máesenicapa ema Jesús te anuquehe. Tásicha, máichapa:

—Zaqueo. Yare, piúcupaica, taicha puiti nuvarahahi nunasinumayare te pipena —máichapa.

6 Tacahe, ema Zaqueo titátájipa tiúcupaicapa. Tiúrisamuréinehi eta majacapirahi ema Jesús. **7** Eta náimairahi ena achaneana eta juca, téchajicanapa mayehe ema Jesús. Náichapa:

—Émamesapa máitecapauchayarehi ema maca ticapecaturahítatáji —nacahepa.

8 Te téjacanapa te tajuhe, témeñahavapa ema Zaqueo te mamirahu ema Jesús. Tásiha, macahepa:

—Pímaha, Tata Náquenu. Núti néneuchavapa me Viya. Puiti níjaracayare ena páureana ticutimuriacaca eta nímahaqueneana. Nímichavayareva te natarihipuca ena nucaetemaqueneanahi, cuátrohénapasera eta táitsivayare eta nímichavaqueneya —máichapa.

9-10 Tásiha, ema Jesús majicapa:

—Nímahapa puiti eta yátupirahi eta péneuchi-ravahi eta pipecaturana, taicha pivarahahi pímichavayare eta plata picaetemareruanahi. Tásiha puiti, pijacapacarepa me Viya. Vaipa pémitiequenéimahi. Taicha píti picutipa ema viáchucaini Abraham eta macasiñavairahi mayehe ema Viya. Píti nuchaneravipa, picutipa ena apamuriana nucurujiruanahi. Taicha éta tímitecanuhi nuti Manerejirunuhi ema Viya —macahepa ema Jesús.

Ema Jesús máimicutichinava ema príncipe eta máijarasirahi ena machanerana eta maplatane, apaesa nacajurucayarehi

11 Tacache, ena achaneana, eta náimairahi eta mánehiraripa eta Jerusalén, náimijachaipahi étapa tímiyanayare éma, eta máimeresiravayare eta marreyvayarehi. Tacache, ema Jesús máimatiacaripa eta napanereruanahi. Tásiha, máimitucavacapa eta apamuri máimicutichinapa apaesa nácaicutiara eta tayerevaichaha eta marreyvayarehi. **12** Máichavacapa:

—Matiarihihi ema achane. Ichape eta mapicacarevahi. Tiyanayarehi te apana

avasare tayerehiquene. Eta tímiyanayarehi ánaqui máepanihayarehi eta mávacureyarehi eta marreyvayarehi tayehe eta mávasa. Eta machavirayarepa, téjacayarepa éma. ¹³ Te tiyanayarépa éma, máichuhumanuma ena diésqueneana machanerana. Máijaracavacapa étapevaca eta maplatane tasivachaquenehi. Tásiha, máichavacapa: “Ecajurucayare eta juca nuplatane. Te nuchava, táimecavaipa eta tachichanayare”. ¹⁴ Tacahe, tiyanapa ema rey-yarehi tayehe eta macaijuheyarehi. Te máequenepasera, tisemamurianapa ena majaneanana. Ánipa nacahe: “Vahi vávaraha émaina viyehéna rey ema maca” nacahepa. Náimivanerecapa eta comisión, nayaseserecayare vahi nacuijaraca eta mávacuréna. ¹⁵ Ticamesavauchuchasera majacapaichucha eta mávacurehi. Te tichavapa te mávasa, téjacapa émapa reyhi. Tásiha, máichuhavacapa ena machanerana máijararuuanahi eta maplatane. Mayaserecapa te tímecevaipahipuca eta tachichanahi. ¹⁶ Tiyanapa ema émana tímerecavapa. Máichapa: “Tata náquenu, eta piplatane piújararunuhi tímecevaipa eta tachichanahi. Diésripa eta tajurusirahi”. ¹⁷ Ema rey majicapapa: “Tiuri, nuchicha. Tájina táichava. Tétavicava eta piúriva. Puiti vahi támapurujimahi eta piúrivahi tayehe eta juca ánichichaquenehi níjararuvihí. Puiti níjaracaviyare pituparahaya nujupahaviya. Pítí táquenuya eta diésquene avasareana”. ¹⁸ Tímerecavavarepa ema apana manusura. Máichapa: “Tata náquenu, eta piújararunuhi piplatane, tímecevaipahi cinco

eta tajurusirahi”. ¹⁹ Majicapavarepa: “Tiuri, nuchicha. Tájina táichava. Tétavicava eta piúriva. Puiti nunacaviyare aquenucaviya tayehe eta cíncocueneana avasareana”. ²⁰ Tímerecavavare ema apava mamusura. Máichapa: “Tata náquenu, júcahi eta piplatane. Vahi nucajurucahini. Núnacaichucha, nítipuichahi te pañuelo. ²¹ Taicha nupicahi nácaetehahini, machu pícuñacanu. Pétáviuchahi píti eta pivainarajiva, taicha píti pivehahi eta nématanevachayaréni”. ²² Tacache, ema rey máichapa ema machanera: “Eta juca péchajiriruvahi, éta tímicaecherachavihi eta pépiyahiraivahi. Piplujuvahi eta tíchavihi. ²³ Te pímatinuhipuca eta nuvainarajivahi, eta nuvehairaya eta pématanevacha, étapa eta nícuñasiraviyare te picamitiacapuca, váhiyapa pinacapaini te banco eta nuplatane. Étainahini tajurusihahini apaesainahini nímaequenéhahini puiti”. ²⁴ Tásiba, máichavacapa ena apamuriana: “Everejica ema maca eta nuplatane. Íjaraca ema ticajurucahi eta diéspequene”. ²⁵ Éna nacahevarepa: “Tata viáquenu, tímecavaipahinéni diéspepahi eta tajurusirahi”. ²⁶ Ema rey majicapavarepa: “Tiuri numetacaheya: Nácani ticajurucanahi camuri, nujanechinayare eta apava. Nácanisera tájinaquenehi nacajururénahini, nuverejicayare eta náijaracasinihi. ²⁷ Énasera ena tictalianacanuanahi éna vahi najacapanuhini eta nurreyvahi, iáminanuyare ani te numirahu. Ecapapajicavaca éna”.

²⁸ Tacache, te tamutupa eta juca máimituresirahi, ema Jesús tímiyanavavarepa tipaica. Macaijuhepa

eta te Jerusalén. Tínapucapa ena máimitureana.

*Títecapapa ema Jesús eta te Jerusalén
(Mt 21.1-11; Mr 11.1-11; Jn 12.12-19)*

29 Te apanapa semana, tiyananavarepa. Te tiánehipa eta avasarechichana Betfagé étapa eta Betania, tacanaraipahivare eta masihi ticaijare Olivoquiji, tíchecanumanapa. Mavanecapa ema Jesús ena apinana máimitureana. **30** Máichavacapa:

—Eyanayare eta te jena avasarechicha Betfagé. Te ítecapayarepa, ímahayare eta burrico ticaitihahi. Eta jena sárare mávuéquehchéhaha, nájinaichaha ticaperainahi. Evejapuacayare, iáminanuyare eta ani. **31** Te natarihinapuca náeñama, emetacayare eta nucamunuirahi núti —máichapa.

32 Tacache, tiyananapa ena vanairucanahi. Jéhesaréinehi étapaichuhí eta mametarapihi éma. **33** Te navejapuacaripa eta burrico, ena ticayeheana nayaserecapa:

—¿Táviha iámihayare eta viyehe burrico?

34 Éna najicapapa:

—Ema maena Viáquenu macamunuhi — nacahepa.

35 Tacache, náisapapa eta námiraya eta burrico. Te náitecapauchapa ema Jesús, náepacamaequechapa eta náepacuhana. Tásiba, ticaperapa ema Jesús.

36 Te náimahapa ena achaneana tiúchujicapaipahi ema Jesús, náimativanepa. Tiyananapa nácapahi éma. Tépacapairicanapaipa te mamirahu eta náepacuhana te mayanihayarepahi. **37** Eta napaisirahi, témiricanapaipa te tachausi eta cerro ticaijare Olivoquiji. Namutu ena máimitureana téhicanahi ema Jesús tipiaracanapaipa eta

náurisamurevahi taicha eta náimahaqueneanahi tiáramicareana máichaqueneanahi éma. Ichape eta nacunachirahi ema Viya. [38](#) Ánipa nacahehi eta napiarasirapahi:

—Yare, Tata, ¡Piti réyquene, vanairucaquenévihi me Viya! ¡Asulupaya! ¡Puiti, te anuma vicuticacahi eta viúrisamurevahi víti te eta juca apaquehe! Tétávicava eta vicunachira ema Viya eta macatajisirahavihi—nacahepa.

[39](#) Tacache, eta nasamirapahi ena fariséoana natiarihiqueneanahi eta napiarasirapahi ena achaneana, náechajicapa ema Jesús:

—Tata maestro, picamatinacavacaichu ena nani pímitureana—náichapa.

[40](#) Ema Jesús majicapavacapa:

—Tiuri, numetacahe puiti. Te namatinapuca ena nani, táitsivasera étainapa tipiaracaya eta máriana—macahepa.

[41](#) Tacache, títecapanapa te tápusi eta cerro Olivo-quiji. Ticaecherapa eta Jerusalén. Eta máimairahi ema Jesús eta avasare, tíyahapa táicha. [42](#) Macahepa eta máiyairahi:

—Páurevisami piti návasasami Jerusalén. Te nácaicutiaraini apaesachichainaini ena pichichanaveanahi eta nuvarairahi nucuchucuhavaca núti. Puiti juca sache nutiarihiraripa ani piyehe, náurihainehi nácamapuravahini eta náuricacarevahini. [43](#) Taicha járajapayare eta sácheyare táetaviuchavaya eta nacatajivairaya ena pichichanaveana náicha ena piánaranaya tichayacavianayare. Téhavianainapa, tájinapa piviyavaimahi picatiuchiavaimahi.

44 Témostapaicavianainapa te apaquehe. Nacapapajicavacainapa ena pichichanaveana. Tájina nacaemachaquenémahi eta peti. Tamutuyare náquipapaica. Eta piviurevaya, eta juca pimajacapiranuhi eta néjirairavihi nuti mavanerunuhi ema Viya—macahepa.

*Ema Jesús macuchuchujicavaca ena tíjararecanahi eta sárareana, cágureana te tajuhe eta Templo
(Mt 21.12-17; Mr 11.15-19; Jn 2.13-22)*

45-46 Tacahe, te apanapa sache, tiyanapa ema Jesús. Tisiapahi te Templo. Máimaharinehi ena achaneana tíjararecanahi eta sárareana, cágureana. Tásiha, tisemapá. Eta macuchuchujisiravacahi, máichavacapa:

—Ema Tata Nuaiyaquene, ani macahehi eta máechajiruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étisera eti tiámerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! — máichavacapa.

47 Eta manasiquenerahi ema Jesús, tamutuhi sácheana tímitureca tayehe eta Templo. Énasera ena tuparairucana énapa ena escribánoana, napanerechaipahi eta navairahí nacapaca ema Jesús. **48** Váhisera napatsicavahini taicha natiarihi ena camuriqueneana achaneana tisamararacanahi eta máimiturapiána éma. Váhivare náisapaimahi náichahini ena tictorianacanahi.

20

Nayasereca ema Jesús te vanairucahipuca me Viya

(Mt 21.23-27; Mr 11.27-33)

¹ Étana sache tímiturecaichaha ema Jesús tayeha eta Templo eta máechajiruva ema Viya. Títecaparacanapa ena tuparairucana, énapa ena aquenucarahana, énapa ena escribánoana. ² Nayaserecapa ema Jesús:

—Píti, vahi vitupararuvinahini víti eta píchirahi eta júcana. ¿Nájahasica tivanecavihi? ¿Nájaha tituparacavahi pitcha eta juca píchaqueneana? —náichapa.

³ Ema Jesús majicapavacapa:

—Núti apanavare nuvaraha nuyaserecahe. Ejicapanuyaresera. ⁴ ¿Nájahapuca tivanecahi ema Juan eta máitesirahi eta máicachasirisirahi? ¿Émapuca ema Viya tivanecahi, émajivahipuca eta máitesirahi? —máichavacapa.

⁵ Váhisera náituruequenehahini eta najicapirayarehi. Tiácapaemajiricacanapa. Ánipa nacahe eta náechajiruvanahi:

—¿Tájahasica vicayemayare eta vijicapiroayare ema maca? Te yémunahacava vicha: “Mavaneruhi ema Viya”, éma macahénapapuca: “Tásiha, ¿váhiyapa esuapahini éma?” ⁶ Téhesera vácahepuca: “Émajivaichucha eta máitesirahi”, ticauyayacareipa nacapacahavi ena achaneana te márijahiana, taicha náechahi éna émairahi ema Viya tivanecahi ema Juan —náechajiricacapa.

⁷ Tacahe, ánipa nacahehi eta najicapirahi ema Jesús:

—Vahi vecha víti —nacahepa.

⁸ Ema Jesús máichavarepa:

—Énerichuvare nútí, vahi numetacahémahi nájahapuca ema tituparacanuhi —máichapa.

*Ema Jesús máimicutichina ena pártirárioana máurirahana
(Mt 21.33-44; Mr 12.1-11)*

⁹ Tacahe, ema Jesús tépanavavarepa máimitucavaca ena achaneana. Ánipa tacahehi eta máimiturapiana:

—Nuvaraha nímicutichinaheya, tatiarihi eta isaniti amairiha úvaquiji, masucurehi ema émana achane. Tiyanayarehisera ema ticayehe, tipairiricayarehi te apana avasare. Tacahe, matuparacavacapa ena tírehanayarehi te áñoana eta mayehe uva. Partidoyarepa eta majunijisirayarehi. ¹⁰ Tacahe, te títecápapa eta caje tayairahi eta uva, máimivanerecapa ema mamusura mayaseapanavacayarehi ena pártirárioanahi eta tatucachaqueneyarehi éma. Énasera ena pártirárioanahi, tájina náijaracahini. Tisemauchavanarichucha, náehapa ema vanairucainihi. ¹¹ Tásicha, ema ticayehe máevatacavarepa ema apanavare mamusura, mayaseapanavacayarehi éna. Énerichuvaresera náumehavarepa ema vanairucainihi, náehavarepa. Tájina náijaracahini. ¹² Tásicha, ema ticayehe vahi macainajiruvahini. Máevatacavarepa ema apanavare mamusura. Énerichuvare náehavarepa ema vanairucainihi. Najarachapa, náquijicapa.

¹³ Tacahe, ema ticayehe tipanererecaripa: “¿Tájahasica nícharacavayare?” macahepa.

“Nuvanecapuca mayana émajacaruvaina ema nuchicha némunaruquenuehi. Tatiarihi te émainapapuca napicaucha te náimahapa”. ¹⁴ Tacahe, te náimahapa ema machicha, navetijichucha eta nasemirahi. Tímitujiricacanaripa. Ánipa nacahe: “Émainapapuca ticayeheyare ema maca. Yare, vicapaca, apaesa tánasipa tamutu vítinapa vicayehe”. ¹⁵ Tacahe, nacaratacapa éma, nacuchucapa eta tayehe eta isaniti, nacapacapa.

Puiti nuyaserecaheyare: ¿Tájahapuca máicharacavayare ema achane ticayehe eta úvaquiji? Jéhesare, vaipa macayehehini paciencia. ¹⁶ Títecavanénapa macapapanavacayarepa ena pártilrárioanahi máurirahanahi. Tásiba, máijaracainavarepa eta úvaquiji ena apamuriana pártilrárioanayareva —macahepa ema Jesús.

Tacahe, ena tisamararacanahi, ánipa nacahehi:
—Viti vicatajicacare, vahi vácutihini ena nani máurirahana —nacahepa.

¹⁷ Ema Jesús máesenimurihavacapa. Tásiba, máichavacapa:

—Jéhepuca, németeacasera vuíchaha ácaicutiarahini eta tacayemaquenuehi eta Sagrada Escritura. Éta, áni tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitecapapa eta táicuchihi eta tatuparahahi. Tacapicahuquenuehi puiti” tacahehi eta Sagrada Escritura. ¹⁸ Puiti, núti nucutihi eta ichape mari náepuruquenuehi. Eti epurunuuanahi, iáquipaicavayare évetutujicayare.

Tichimaracaheyare eta muraca ecuñaraqui taicha eta emavarahairahi éhicanu —máichavacapa.

19 Ena tuparairucana navarahapa náijahú-chayarehini nacarataca ema Jesús, taicha tímaticavananapa éna eta énairahi tayunacavaca eta máechajiruvana ema Jesús. Váhisera napatsicavahini taicha návamirahuhi ena camuriqueneana achaneana.

Navarahahi náemejecapavacha ema Jesús tayehe eta impuesto

(Mt 21.45-46; 22.15-22; Mr 12.12-17)

20 Tacahe, náimivanerecapa ena apamuriana ajairana tépiyacavanayarepahi tiúriana te mamirahu, navarairahi natanucayare eta tímica-viuchayarehi. Énayarepa timetauchanavarehi mayehe ema aquenucahi prefecto Poncio Pilato.

21 Tacahe, nayaserecapa éma, ánipa nacahe:

—Tata maestro, vímatihi eta tatupiruvairahi tiuri eta juca pímiturapianahi. Nájinavare pinere-jiruinahini ena achaneana, taicha pivarahahi náehicahini namutu eta táurinaquene achene ticai-juhe me Viya. **22** Vivarahahisera viyasereca-viyare: ¿Táuricahipuca vivachacha eta viyase-hana impuesto mayehe ema Presidente Emperador romano? Taicha víti, machanerahavihi ema Viya, ¿masi? —náichapa.

23 Ema Jesús máimatiacavacapa eta tamauri-vapahi eta napanereruana. Tacahe, máichavacapa:

—¿Tájaha tacayema evaraha ímiaquipaicanu?

24 Nímahaseji, iáminanu étapena eta reale.

Éna náijaracapa. Tásicha, ema máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? — máichavacapa.

Éna najicapapa:

—Mayehe ema Presidente Emperador.

²⁵ Tacahé, éma máichavacapa:

—Tiuri. Táuricahi íjaraca ema Presidente Emperador eta juca mayeherichuhi éma. Tásicha, íjarcavare ema Viya eta mayeherichuhivare éma — máichavacapa.

²⁶ Váhiquenesera náratahahini náimiaquipacahini eta nayaseresirahi te namirahu ena achaneana. Táitsivahi ichape eta náramirahi eta táurivahi eta majicapiravacahi. Timatinanapa tésamiricavanapa.

*Nayasereca ema Jesús náicharacavayarepuca ena náepenaqueneana eta náechepusirayare
(Mt 22.23-33; Mr 12.18-27)*

²⁷ Nacahepaipavare ena apamuriana achaneana. Saducéoana. Ena nani saducéoana, apana eta náimiturapiana; váhi nasuapa eta náechepusirayare ena náepenaqueneana. Éna natanucahi eta tátetseraruvayahi. Tacahé, nayaserecapa ema Jesús:

²⁸ —Tata maestro, ema víyarahaini Moisés manaquicahi eta ajureca máechajiriruvahi eta viyehe: “Te máepenaequenehahipuca ema achane esu mayena, tásicha, nájinahipuca manaquiequeneruvainahini machichainahini; te matiarihihipuca mácani maparapehi, mavehayare esu machinenaequene, apaesa émainapuca macachicha eta suyeho, máitsivainahi ema

maparapeni". ²⁹ Tacutiquene te natiarihipuca ena siétequeneana ticaparapejiricacana, te títauchavapa ema náechavimuri, máepenaequenehapasera esu mayena. Nájinahi machichainahini. ³⁰ Tacahe, ema maparape máitauchavare esu machinena. Énerichuvaresera máepenaequenehavare, nájinavare machichainahini. ³¹ Ema émana maparape máitauchavare ésu. Énerichuvare máepenaequenehavare. Namutu ena siétequeneana navehahi ésu, tásihasera náepenaequenehapahi, nájina émanainahini mágachichahini eta suyehe. ³² Te taequenepa, tépenapa esu esenaini. ³³ Tacahe puiti, te jéhesarepuca tichavanayare titarecana te taequenénapa eta náepenirahi ena nani, ¿nájahapuca ena siétequeneana éma yátupiquenehi suímaquenehi esu esena? Taicha ena siétequeneana namutuhi suímanarihi —náichapa.

³⁴ Tacahe, ema Jesús majicapavacapa:

—Ena ajairana te juca apaquehe natuparacasiswaichuhi títauchavanayare suyehe esu esena. ³⁵ Ánaquisera te apana náitaresira, nácani ticatuparahanayare eta nasiapirayare te anuma te náechepucapa, vaipa nácamunuimahi esu esena. Énaripa ena esenana, vaipa nácamunuimahi - ema ajaira. ³⁶ Taicha vaipa tiápechavaimahi tépenana. Nacutinapa ena ángeleana eta namaepe-nacacairahi. Yátupinapa machichanaveanainapa ema Viya, taicha éma ticaechepecavacahi.

³⁷ Émaripa ema víyarahaini Moisés timetacahavi eta májurehi eta yátupirahi eta vahi tánasi tépena eta náchanevana ena náepenaequeneana. Te

máimahapa ema Moisés eta yucuqui timurujihi, eta macametacasiyahi mayehe ema Viya eta émarichuhi ema macasiñaquenehi ema Abraham, ema Isaac, émapa ema Jacobo. ³⁸ Taicha ema Viya, ema téchahi eta náitaresirana ena téhicanahi, tayanapane tépenanaripa. Namutu ena, tímiyanavarichucha titareca eta náchanevana te mamirahu éma —macahepa ema Jesús.

³⁹ Tacahe, ena escribánoana, ena natiahi que-neanahi náichapa ema Jesús:

—Tétupicava eta juca péchajiriruva, tata maestro —nacahepa.

⁴⁰ Váipasera nacaemuñavahini nápechavahini nayasereca.

*Ema Cristo, yátupiquenehi Viya.
Mámariéquenenihisera ema rey David
(Mt 22.41-46; Mr 12.35-37)*

⁴¹ Ema Jesús máichavacavarepa:

—Éti ecahehi eta échajiriruvahi: “Tiúchucayare ema Cristo, mamariequeneyare ema víyarahaini rey David” ecahehi. ⁴² Yátupihi ema Cristo achane-quenehi eta máimahi taicha mamariequenenihi ema víyarahaini David. Nuvarahasera epane-rechaya eta juca máechajiriruvahi ema David te májurehi Salmo, ani macahehi: ⁴³ “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa. ⁴⁴ Ema David, eta máimijarechirahi ema Cristo: “Tata Náquenu”, ¿tájahapuca eta macayemaqueñehi? Nutupiruva numetacahe: ema Cristo

yátupiquenehi Viya éma. ¿Tájaha íchahi éti? — máichavacapa.

Ema Jesús máimereuchavaca eta náejecapiravana ena escribánoana

(Mt 23.1-36; Mr 12.38-40; Lc 11.37-54)

⁴⁵ Namutu ena achaneana nasamararacahi ema Jesús eta máechajisiravacahi ena máimitureana.

⁴⁶ Ánipa macahehi eta nayehe:

—Échapavayare éti, machu éhica eta nayehe-repiana ena escribánoana. Navarahavare ticapi-cahuanayarehi eta náechajisiraya ena achaneana te jácani nácapajisihapahi éna. Tacutiquene tinere-jiurucavana eta táurinaqueneana téjasihacareana te tiyanana te viúrujisirarevana. Étaripa te nanisirana, ticaejacavanavare te jácani távihahi eta tiúrini-sipana tinicacare. ⁴⁷ Tacutiquene naverejicavare eta nacayehequeneana ena tépenaimana, nájina najapanuquenéna. Tásicha, tépiyacavanapa religiosoanahí, tiúpiemana eta nayujarasira, namavarairahi tácaecherahini eta náichira eta tamauriqueneana. Énasera tiápajucavanahí eta nacaicuñairaya muraca.

21

Eta sunaquiruva esu máimaru tacachuricahi eta nanaquiruvana ena rícoana

(Mr 12.41-44)

¹ Ema Jesús máimararacahi ena rícoana eta nanaquisirava eta plata tayehe eta chapama nanaquisirareva eta námavahuana mayehe ema Viya. ² Énerichuvare máimahavare tinaquicava esu ésuna esena suépenaimaquene. Páurequenehi ésu.

Sunaquicahisera eta apipechichahi eta suplatane.

³ Tacahe, ema Jesús macahepa:

—Ímaha esu suca esena páurechicha. Ácuneucha eta suémunasirahi ema Viya. Jéhesare ésu, tímepanávahi eta sunaquiruva, sucachuricavacahi namutu ena apamuriana achaneana. ⁴ Taicha namutu éna tacarichu nanaquicahi eta náemacharajiana naplataneana. Ésusera esu suca páurehinéni, sunaquicahisera tamutu eta sucayehequenehi. Suítahi eta sunicavachayarehini —macahepa.

Ema Jesús máimereucharipa eta táquipaisiravaya eta Templo

(Mt 24.1-2; Mr 13.1-2)

⁵ Natarihihi ena téchajisihanahi eta Templo. Náechajisihahivare eta táurinaqueneana tayeruvana nanaquiruanahi ena achaneana, étapa eta táurinavavacahi eta máriana tayeheanahi. Ichape-murihi eta taejeravahi te nacae matanénapa. Tacahe, ema Jesús máichavacapa:

⁶ —Jára japatayare eta sáchevayare ticaquipaicasinapa tamutu eta juca Témplosami. Téjanerepaciainapa tamutu eta juca táurinaqueneanahi ímaha-queneana puiti —macahepa.

Tatiarihiyare eta ecutiarareanaya te tánehipaicha eta táchecuiraya

(Mt 24.3-8; Mr 13.3-8)

⁷ Tacahe, nayaserecapa ema Jesús. Náichapa:

—Tata Maestro, ¿tájamuhuyare hipuca eta náimiaquipaisirayare eta Témplosami? ¿Jararihiyarepuca eta ecutiarareyare eta apana péchajisihaqueneana? —náichapa.

8 Ema Jesús máichavacapa:

—Ecuneuchavaicha yátupina, machu navayuacahe, taicha nárajapayare ena tépiyacavanayarepahi tímivasichavanayarepahi nuyehe. “Nútiripa Cristo” nacahénapa. Ena apamuriana nacahénapa: “Táitecapaquenepa puiti eta sache”. Váhisera ecusuapavaca, váhivare ecuehicavaca. **9** Étaripa te esamairiricapuca eta guerra, revoluciónpuca, váhivare ecuarameca. Taicha eta táinapuaraquianayarehi eta júcana ecutiarareanayare, vuíchahasera étaimahi eta táchecuiraya.

10 Ánivare macahe:

—Téhacacayareva eta ichapequeneana avasareana. Ticanarajiricacanainapa eta apamuriana. **11** Tatarihiyareva eta ichapeyare tayamurisirana eta apaquehe. Te avasareana tatarihiyare eta ecuhamuhuyareva, jumaremuhuyareva. Te anuma tímerecavainavarepa eta ichape ecutiarareya, tiámayare eta ecuñaraquiyare.

Ena achaneana napanajiricainapa ena téhicanahi ema Viáquenu

(Mt 24.9-28; Mr 13.9-23)

12 Tativanumayaresera tipanajiricaheanayare éti, táchavenénahi eta éhisiranuhi núti. Ticaratacaheanayare, tiámaheanayare te náurujisirarevana, ecayaserehinapa nayehe ena juéseana. Ecaevatainapa te cárcel. Tásiba, etiarihiyare eti tiámaheanaya te namirahu ena aquenucana, téhevare te namirahu ena Presidenteana gobiernoanahi, ecaviurevayare

táichavenehi eta éhisiranuhi. **13-14** Étumechavasera. Te námahepa te ecayaserehiyaya, ecamapuravainapa échajisianuyare. Váhi ecueñamava eta ecayemayare ecatiuchiravaya. **15** Nímahahéinepa nútì, níjaracaheyare eta ítusirayare ecatiuchava. Nájina ácutimahi eta ítupajijiasiravaya. Ichape ecachuriacayare ena iánaranaya. **16** Etiarihiyare éti énajacaruvainapa ena ticachichaheana tíjararecaheanaya énaripa nácani eparapeanapuca, énajacaruvayareva tíjararecaheana, énayarepaichupuca ena ejaneanana, ítunacasareana. Enerejicavainapa eti nacaparuanaya. **17** Namutu ena acha neana tictorianacaheanayare táichavenénahi eta éhisiranuhi. **18** Tayanapanesera nacapacahepuca, nímahahéinepasera nútì. Vahi émitiequenémahi. Étaripa eta echutimacana, tájinavare témitiequenémahi. **19** Téhesera ecamichahi tamutu, ímiyanavahi eta éhisiranuhi, nútì níjaracaheyare eta ítaresiraya.

20 Te ímahapa ena suntaruana nachayacapa eta Jerusalén, étanaqueneyarehi ejercito eta náichapemurivaya, étainapa ícutiaraya eta tátavirayare eta avasare. **21** Tásicha, te ímahapa eta juca, táuricapa etátájinapa ejuna, eti etiarihiqueneanahi te Judea. Ecaijuheyare eta te céroana, étaina eyumurusiavaya. Nácani tiávihanahi te tajuhe eta avasare Jerusalén, tavarahaipahi náuchucavane tayehe. Nácani tiávihanahi te vámahiana, vaipa távarahahini nachavahini tayehe eta avasare. **22** Taicha táitecapauchainapa eta tasacherayarehi eta

tacaicuñairaya, títauchavainapa eta tametarapi eta Sagrada Escritura. ²³ ¡Páureanasami nácani esenana tachimaranuanayare, nácani ticajarianahipuca, nácani esenana ticachichanahi eta amuya tiájicachaha! Támairijicainapa eta nacatajivairayare namutu ena achaneana tiávihanahi te Jerusalén taicha eta náicuñayare. ²⁴ Natiarahi ena tépenanaya te guerra, ena apamuriana nacaratatajicainapa prisionéroanainapa. Námavacainapa te apanaqueneana avasareana. Ema Viya másapainapa tisiapaná te Jerusalén ena apavasaqueneana. Énapa téchanayare eta Jerusalén. Tiámainucava te máicutichapa ema Viya, macuchucavacainavarepa.

*Eta máitesiraya ema Manerejiruhi ema Viya
(Mt 24.29-35, 42-44; Mr 13.24-37)*

²⁵ Tacache, tímerecavanainapa eta ecutiara-reyare te sache, te caje, étapa te jarairiquiana. Tipicanainapa ena achaneana te juca apauehe. Tiáramecanainavarepa taicha eta nasamirayare eta muracaquene táepacuruha eta ichapequene une. ²⁶ Ena achaneana tiáquipaicavanainapa eta napisiraya, taicha eta náimairayare eta ecutiarareanayare, váhisera náimatieuquene-haimahi tájahapuca eta náichararacavayarehi. Énerichuvare tiyejecavavacainapa eta tiávihanahi te anuquehe anuma. ²⁷ Nupaenumava nítecainapa nuchava nútì Manerejirunuhi ema Viya. Namutu tímahanuanayare eta núcupoaisirayare. Tiámanuinapaipa eta úcaji. Níñehinapaipa eta táetaviuchirayare eta nujaraivayarepahi. ²⁸ Te ímahapa tanacuchavapa eta juca

ecutiarareanayare, evapinavainapa éti taicha tiánehiripa eta nítecapiraya nucatiuchiráheyare.

29 Máimicutirachinavare eta máimituresirahi. Ánipa macahe:

—Ecauneyare eta jácani yucuqui. **30** Te ímahapa títsivachavavacapa eta tapacajiana, tiánehiripa eta únemuhuyareipa. **31** Ene tacahehi, te ímaha-yarepa, ímatiacainapa eta tánehiraripa eta nítesirayare. **32** Numetacahevanecha: Vuíchaha titava-naimahi ena achaneana náitareruanaichaha te táitecapapa eta juca ecutiarareanaya. **33** Títavyarepa eta anuma étapa eta apaquehe. Tativaya-resera títauchava tamutu eta numetaruhehi.

34 Échapavaicha, machu tachimaracahe eta jena sache, vahi ecucuti ena tavayuaruana eta téracare, machu muracachutihéna táicha. Vahi ecueñamava eta ítaresira, machu tahapapicahe eta éhisiranuhi. **35** Eta táitecapauchirayare eta sache nuchavirayare tímicutijiricavahi eta táijahúchirava eta táeratasirava eta trampa. Ene nacaheyare ena achaneana te tamutu avasareana eta namanecapauchiravaya. **36** Eta tacahe, etsecavaicha yátupina. Eyujarauchavahi tamutu sácheana, apaesa túmehénapa eta ecamichiraina tamutu eta juca táichararacavayare, apaesa tacuija ecuichiravaina eta ítecapauchiranuya te numirahu nuti Manerejirunuhi ema Viya — macahepa ema Jesús.

37 Tiuri, tamutu sácheana tiyana eta te Templo ema Jesús. Tímiturecahi. Te yátivare tiyanavare te avasarechicha Betania te taequenehi eta cerro Olivoquiji. **38** Ena achaneana, tamutu yática-

rahiana, tiyanana te Templo, titsecavanaripa eta nasamararasirayare éma.

22

*Napanerechapa eta nacaratasiraya ema Jesús
(Mt 26.1-5, 14-16; Mr 14.1-2, 10-11; Jn 11.45-53)*

¹ Tamirahupaipaicha eta piesta ticaijare Pascua, eta náepanavaira eta semana eta nanisirahi étachucha pan mayehere levadura.
² Tacahe, ena tuparairucana énapa ena escribánoana, navarahaina náimicapaca ema Jesús. Tásiba, natanucahi eta náicharacayare eta nacaratasirayare. Návamirahuhisera ena achaneana.

³ Tacahe, ema Satanás mávahácpa ema émana máimiture ticaijare Júlasi. Émarichuhi nachamurihi ena dócequeneana apóstoleana. ⁴ Tacahe, ema maca Júlasi tiyanapa matanupanavacahi ena tuparairucana, énapa ena nacápitárana ena suntaruana tayehe eta Templo. Téchajiripanavayarehi nayehe, mametacavacaipa eta táicharacavayarehi eta máijararesirayarehi ema Jesús eta nayehe.
⁵ Tiúrisamureanarinehi eta mametasiravacahi éma. Nametacapa eta náijarasirayarehi eta plata.
⁶ Tacahe, éma majacapavacapa eta naplatane. Tásiba, máichavacapa:

—Tiuri, núti népanaheyare te nímahapa nacui-japa ena achaneana te machacaya. Námahénapa tayehe eta mávihahi éma —máichavacapa.

Ema Jesús mavanecahi ena apinana máimitureana, natsecayare eta naniruyare tayehe eta Pascua

(Mt 26.17-25; Mr 14.12-21; Jn 13.21-30)

7 Títecapapa eta sache táepaniravahi eta semana tapiestara eta nanisiraya eta pan mayehere levadura. Étarichuvare eta jena sache ticaijare Pascua, nacapasiraya eta uvesa ticaijare cordero pascual, nanisirayare te jena yati. **8** Ema Jesús mavanecavacapa ena apinana máimitureana, ema Pedro émapa ema Juan. Máichavacapa:

—Eyanayare étupiripanaya eta viniruyare tayehe eta Pascua.

9 Éna nayaserecapa:

—¿Táviha pivaraha vétupirisihaya?

10 Ema Jesús majicapavarepa:

—Eyanayare tayehe eta avasare. Te ítecapayarepa tayehe, iácapajicayare ema émana achane tiámapahi eta une te yupi. Éhicayare éma te peti masiapihayare. Éti apana esiapayareva. **11** Emetacayare ema ticayeheteta peti. Ani íchayare: “Ema viyehe Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare. **12** Éma, tímechahénapa eta ichape cuarto te anuquehe piso. Táuriquenéipahi eta jácara téjasihacareana. Tásiba, étupiricapa eta viniruyare —máichavacapa ema Jesús.

13 Tiyananapa ena vanairucanahi. Jéhesaréinehi, náimahapa étapaichuhi eta macayemaqueneanahi ema Jesús. Tacahé,

náetupiricapa eta naniruyare tayeheyarehi eta Pascua.

*Ema Jesú斯 máenimurihapa ena máimitureana
(Mt 26.26-29; Mr 14.22-25; 1 Co 11.23-26)*

14 Tacache, te hórapa eta nanisirayarehi, téjacanapa te mesa ema Jesú斯 énapa ena apóstoleana.

15 Eta máenisiravacapa, máichavacahi éna:

—Ichapemuri eta nuvarairahi nucachanehe eta nunisirayarehi eta juca téqueneha nénisirahehi puiti eta juca yati pásquairahi, mapurare vuíchaha táitecapahini eta népenirayare. **16** Tásicha, numetacahevaneya puiti, vaipa nápechavaimahi nunica eta Pascua, tiámainucava te táitauchavapa eta nusiapiraya eta nucavacureraya, nucajupahairaya ema Tata —macahepa.

17 Tacache, mavehapa eta vasu náerirare, mahasulupayachapa ema Viya. Tásicha, macahepa:

—Era eta juca. Ecajijiricaca. **18** Puiti numetacahevane: Vaipa nápechavaimahi nera eta juca tachi eta uva, tiámainucava te táitauchavapa eta nusiapiraya eta nucavacureraya, nucajupahairaya ema Tata —macahepa.

19 Tacache, mavehavarepa eta pan, mahasulupayachavarepa ema Viya. Mayuvetuhecapa, máijaracavacapa ena máimitureana. Tásicha, máichavacapa:

—Eta juca neche. Enica. Étivenehi níjararecavahi eta népenirayare. Eta juca apajarahiyare te apaquehe, te étipava énicaca, éta témechaheyare nuyehe —máichavacapa.

20 Énerichuvare, te titanesianapa, mavehavarepa eta náerirare vasu. Máichavacapa:

—Eta juca vino, táchicuarahi eta nítine táepusai-ruvaya íchavene éti, nufirmachirayare eta arairu matratune ema Vicaiyaquene, nucaejasirayareva eta matratune apaesa ejacapacareya mayehe.

21 Puítisera, ani te etaracu, mararihi ema tíjararecanuyare. **22** Yátupiquenuehi eta nacapasiranuyarehi, taicha tacahéhi eta mapanereruhi ema Tata eta nuyehe nuti Manerejirunuhi éma. Páuresamisera ema tíjararecanuya —macahepa.

23 Tacahé, ena máimitureana tiyaserejiricanapa:

—¿Nájahapuca mácani te vitaracu ema tíjara-recaya ema Viáquenu? —nacahepa.

Ema Jesús máimitucavaca eta nacapicahuirayare ena téchapajiricanahi ena nachamuriana

24 Te táchiquenepa, tiácapaemajiricanapa ena máimitureana tayehe eta nájahayarepuca ema ichapequenepanaya aquenuca te nataracu te náejasiraya te návacureanayare. **25** Te máechapa ema Jesús, ánipa máichavaca:

—Ena réyeana énapa ena aquenucana te ichapequeneana avasareana nacaetemajiricavacahi ena achaneana, navarairahi ticapicahuanayarehi. **26** Étisera vahi táuricaimahi ene ácahehini. Téhesera evarahahipuca ecapicahu, vahi ecasiñavaimahi. Ecutiyare ema amaperu eta mamansuvahi. Tacutiquene nácani tivanecanahi, tatuparacavacahi téñamavanayare eta náechapajirisiravacayare ena nachamuriana.

27 Eta nayeherepi ena achaneana, ichape eta napicauchirahi ema ténicahi eta tinicacare. Énasera ena vanairucana téchapajiricanahi eta mesa, vahi nacapicahuhini. Puítisera, nímitucaheyare eta juca arairu nuvanairipi. Puiti ímahanuipa eta nítatirahehi. Nuvaraha ecutinuya. Ítaticacayare éti.

28 Éti, ímararacanuhi eta náichiranuhi ena ticati-nacanuanahi. Váhisera ejunijicanuhini. **29** Eta tacahe, níjaracaheyare núti eta etuparahanayare ecutinuyare núti eta nucatuparahairaya mayehe ema Tata. **30** Éjacainapa tayehe eta ecatuparahairaya. Étinapa evanerecaya nayehe ena dócemuniqueneana ena vijaneanana israelítana. Ecachanenuinavarepa te mesa eta enisiraya ánaqui te nucatuparahairayare —máichapa.

*Ema Jesús máimereucha ema Pedro eta
máepiyasiraya vahi máimati ema Jesús
(Mt 26.31-35; Mr 14.27-31; Jn 13.36-38)*

31 Ema Viáquenu máichapa ema Pedro:

—Nuchicha Simón, péchapavayare. Ema Satanás, ichape eta mavarairahi ticaicutiaraheyare tiáquipaicaheyare emutu éti. **32** Nútisera nuyaseuchahéhi me Tata, pítiripa, apaesa vahi tacuemitiaca eta péhisiranuhi. Piáquipaicavasamiyaresera. Tichavayaresera eta picasiñairanuya, tásiha pétumechavacainavarepa ena apamuriana pichamuriana —máichapa.

33 Ema Pedro majicapapa, máichapa:

—Tata Náquenu, tájina vahi nujunijicaví mahi. Níjaracava néhicavi tayeha eta cárcel. Te nacapacavipuca, núti apanavare níjaracavavare nacapacanu apaesa nácachanevi —macahepa.

³⁴ Ema Jesús majicapapa:

—Numetacavivaneya, Pedro. Puiti jena yati, te tamirahuinarichaha eta táechajisiraya eta varayu, piti mapahayare pépiyacavayare vahi pímatinu, eta picatiuchiravayare pítijiva —máichapa.

Puiti etserereacavainapa

³⁵ Tacahe, ema Jesús mayaserecavacavarepa ena máimitureana. Máichavacapa:

—Te nuvanecahénapa epaica, nutuparacahehi vahi ecuama eta tarera, eta billetera, eta eparupevana, ¿yátupihi, masi, vahi ecamunuuvapahini?

Ena najicapapa:

—Tájina vácamunuipahini.

³⁶ Tásiha, máichavacavarepa:

—Puítisera mácani ticatarerahi, tiúripanahi mámayare eta matarera, étapa eta mayehe billetera. Émaripa mácani tájinahi mayehénahi espada, tiúripanahi máíjarareca eta masacu, mavacharesihaya eta mayeheyare espada.

³⁷ Tacahe numetacahévanécha. Ena achaneana nacatianacahaviya muraca. Títauchavainapa eta táechajiruvanahi eta Sagrada Escritura eta níchararacavayarehi: “Timicutijiricavahi námerahihini náicha”. Tamutu títauchavayarehi eta tacayemaqueneanahi eta Sagrada Escritura eta nuyehe —macahepa.

³⁸ Tacahe, ena máimitureana náichapa:

—Tata Viáquenu, jucarihi apinahi eta espada.

Éma majicapavacapa:
—Tiuri, tarataquene.

*Ema Jesús tiyujaraca te Getsemaní
(Mt 26.36-46; Mr 14.32-42)*

³⁹ Tacahe, tiúchucapa ema Jesús, énapa ena máimitureana, tiyananapa tayeha eta huerta Getsemaní tiávihahi te táemiripaisinehi eta cerro ticajarehi Olivoquiji, eta mayujarasirarehi éma. ⁴⁰ Te títecapanapa tayeha eta Getsemaní, máichavacapa:

—Eyujarauchava. Eyaseaca ema Viya eta étumevaina apaesa vahí macuiturucahe ema Satanás —máichapa.

⁴¹ Térabajpanavapa apaesa ema Jesús eta nayehe. Cincuenta metro eta mayerehinévacahi. Tépuyucapa. ⁴² Eta mayujarauchiravahi, ánipa macahe:

—Tátachicha Nucaiyaquene, picatajicanupaini. Nuyaseacavi vahí tacuitauchavaini eta níchavaqueneyavare. Váhini picuisapaini eta nucataji-vairaya. Níjaracavasera nútia etá nítachiraya etá pivarahaquenehi pítia etá nuyehe —macahepa.

⁴³ Tacahe, tiáramicarepa máucupaucha ema émana ángele tiásihahi te anuma. Máetumechapanayarehi. ⁴⁴ Ichape eta máeñamiravahi eta mayujarasirahi. Témiricapa eta máepatsure tacasiriquiamapahi eta máitine. Cuájujuamapaipa eta táemirisirahi te apaquehe.

⁴⁵ Te titapiricapa eta mayujarasirahi, téchepucapa. Tiyanapa te návihahi ena máimitureana. Máiimahainehi éna, tímacanaripahi táchavenehi eta nacatisamurevairahi. ⁴⁶ Tásiba, máichavacapa:

—¿Tájaha tacayema ímacaichucha éti? Échepuca. Eyujarauchava apaesaina. Eyaseaca ema Viya eta étumevaina apaesa vahi macuiturуча ema Satanás —máichavacapa.

*Nacaratacapa ema Jesús
(Mt 26.47-56; Mr 14.43-50; Jn 18.2-11)*

⁴⁷ Tacahe, téchejiricavainirichaha ema Jesús, títecapananecha ena camuriqueneana suntaruana. Mánapumirauchavacapaipahi ema Júlasi. Témeñahavapa eta mayehe ema Jesús. Máetserarecapa. ⁴⁸ Tásicha, ema Jesús máichapa:

—Júlasi, ¿tájaha tacayema pétserarecanu eta píjararesiranuhi nuti Manerejirunuhi ema Viya? —máichapa.

⁴⁹ Tacahe, ena máimitureana natiahiquesteanahí, eta náimairahi ena camuriqueneana suntaruana, nayaserecapa ema Jesús. Ánipa nacahe:

—Tata Viáquenu, ¿viciatiuchava te espada?

⁵⁰ Tásicha, ema émana mavehapa eta mayehe espada. Mayuchatipaisinapa eta machaca tinapa te vaure ema manusura ema aquenuca Caifás.

⁵¹ Ema Jesús máicha nuti Manerejirunuhi ema vacapa:

—Ésamiricavachucha —macahepa.

Tásicha, ema Jesús mavehapa eta machacaini ema achane, máimichavapa máipistaca, tinaracavanepa. ⁵² Tásicha, máichavacapa ema Jesús ena tuparairucana natiahiquesteanapahi eta nacaratasisrahi éma, énapa ena aquenucaráhana, énapa ena oficiáleana tayehe eta Templo. Macajachavacapa:

—¿Tájaha tacayema ecasiña eta espada, ecaepuchiriquipahivare eta etanusiranupahi, tímicutiji-ricavapa námerahihini nútí? ⁵³ Étayapasica cape juca tamutuhi sácheana nucachanehehi tayehe eta Templo. Váhivare epatsicavahini ecaratacanuhini. Étisera iúricapuca eta tamapicuvahí eta yátimuhuhi eta íchirahi eta tamauriqueaneanahí taicha mávaháruhehi ema Satanás. Máisapaquenéhevarepa ema Tata eta ecaratasiranuyarehi —máichavacapa.

*Ema Pedro tépiyacavapa vahi máimati ema Jesús
(Mt 26.57-58, 69-75; Mr 14.53-54, 66-72; Jn
18.12-18, 25-27)*

⁵⁴ Tacahe, nacaratacapa ema Jesús. Námapa te mapena ema corregidor Caifás. Émasera ema Pedro máehiequenehavacapaipa. ⁵⁵ Ánaqui te tajuhe te canchón, ticamururecanapa eta yucu násasivayarehi. Téjamurihanapa te tachacaya eta yucu. Téjacavarepa ema Pedro te namuri. ⁵⁶ Sucahepaipahi esu sirvienta, suímahapa ema Pedro eta máejasirahi te tachacaya eta yucu. Suímararacaripahi. Tásiha, suíchapa:

—Eñi ñica achane éñirichu ñichamuri eñi Jesús.

⁵⁷ Émasera ema Pedro tépiyacavapa vahi máimati. Máichapa:

—Pímaha, esena, vahi nímati nútí ema píchaquenehi.

⁵⁸ Te tiyererehachichavare, máimrarácaripavare ema apana. Máichapa:

—Piti pítirichu machamurivi ema maca.

Ema Pedro majicapavarepa:

—Vahi, tata. Vahi machamurinuina —máichapa.

59 Te hórapapuca eta táetavisiravahi, máimahavarepa ema apana, máimatipa eta máechajirisirava ema Pedro. Máichapa:

—Yátupiquene pítirichu machamuri ema maena Jesús, taicha eti ecavasana te Galilea, tímaticarehi eta échajisira —máichapa.

60 Ema Pedro majicapapa:

—Vahi nímati, tata, nájahapuca ema maena píchaquenehi —macahepa.

Tacahe, téchajíricavainirichaha ema Pedro, énevanepa téchajicanecha eta varayu. **61** Ema Viáquenu máesenicapa ema Pedro. Enévanerinehi téchava ema Pedro eta mametarapianahi ema Viáquenu eta máichirahi: “Te tamirahuinarichaha eta táechajisirayare eta varayu, píti mapahayare pépiyacavayare vahi pímatinu”. **62** Tásicha, tiúchucavanepa ema Pedro. Tíyahapa taicha máimativanepa eta táichapevahi eta máejecapiravahi.

*Nacaecahijiricapa ema Jesús
(Mt 26.67-68; Mr 14.65)*

63 Ena suntaruana tijaneacanahi ema Jesús, nacaecahijiricapa éma. Náehararacapa.

64 Náitiuquichavare. Náehamirahavare. Tásicha, náichapa:

—Vímahasejicacha, te pijarauquipuca, pímatihaviyare nájahapuca ema téhamirahavíhi —nacahepa.

65 Ichapemurivare eta napanararachirahi éma.

*Nacatupihapa ema Jesús te namirahu ena aque-nucana
(Mt 26.59-66; Mr 14.55-64; Jn 18.19-24)*

66 Te tijarahipa, ticurujicacanapa ena tuparai-rucana, énapa ena aquenucarohana, énapa ena escribánoana. Námapa ema Jesús, nacatupihapa te namirahu. Nayaserecapa:

67 —Viyaserecaviyare. ¿Pítisaréji Cristo, ema vicuchapaquenehi? —náichapa.

Majicapapa ema Jesús:

—Tiuri, te numetacahe eta nútirahi, éti vahi esuapanuimahi. **68** Téhevare nímechahepuca eta ícutiaraina eta nútirahi, éti váhivare esuapanuimahi. Énerichuvare váhivare ecaitanuimahi. **69** Étainapasera nucaijuheyare te anuma nuti Manerejirunuhi ema Viya eta néjasirainapa te mavaure ema Tata, máitupajijihaquenehi éma —máichapa éma Jesús.

70 Nayaserecavare namutu, náichapa:

—Tacahe piti, ¿pímijachavapuca machichavi ema Viya?

Ema majicapavacapa:

—Yátupi machichanu —máichapa.

71 Tacahe, éna nacahepa:

—Vaipa tácamesa vicayasesereruhini ena testigoana. Émaquenepa visamahi puiti eta juca máechajiriruvahi, étapa ticaviureya —nacahepa.

23

*Námapa ema Jesús te mamirahu ema Pilato
(Mt 27.1-2, 11-14; Mr 15.1-5; Jn 18.28-38)*

1 Tacahe, téchepumurihanapa namutu. Námapa ema Jesús te mamirahu ema Pilato. **2** Te nacaitecapa, náepiyaequenehapa éma. Ánipa nacahe:

—Viámapahi ema maca achane ani te pimirahu. Mavarahahi mahapapisinahaviyare ena vichaneranahi. Énerichuvare macahehi váhiji taurica vivachachahini eta impuesto mayehe ema viyehe Presidente Emperador. Énerichuvare, macahehivare eta émairahíji Cristo, ema réy-yarehíji —náichapa.

³ Tásiha, ema Pilato mayaserecapa ema Jesús:

—¿Yátupisareji réyvihi píti nayehe ena pijaneanana israelítana? —máichapa.

Ema Jesús majicapapa:

—Pitupiruvahi eta juca piyaseresiranuhi. Yátupihi eta nurreyvahi —máichapa ema Jesús.

⁴ Tacache, ema Pilato máichavacapa ena tuparairucana énapa ena achaneana natiarihiqueneanahi:

—Tájina maviurevaina eta nímairahi ema maca achane —máichavacapa.

⁵ Énasera nayurucapa muraca ema Pilato. Ánipa naicha:

—Ema maca, ichape eta mahapapisirahi eta napanereruana namutu ena achaneana vijaneanana israelítana, énaripa ena ticavasanahi te Galilea étapa ani te juca Jerusalén —náichapa.

Ema Jesús námavare te mamirahu ema Herodes

⁶ Eta masamiravacahi ema Pilato, macayase-sererupa te étahipuca te Galilea macavasahi ema Jesús. ⁷ Te nametacapa eta étairahi macavasa ema Jesús, macavanairipipa ema Pilato nama mayehe ema Herodes, aquenucahi tayehe eta Galilea, taicha ema Herodes matiarihihi tayehe eta Jerusalén eta jena sácheana páscuairahi. ⁸ Tacache,

tiúrisamuréinehi ema Herodes eta máimairahi ema Jesú. Ichapemurihi eta mavarairahi máimati taicha masamairiricahi tamutu eta tiáramicareana máichaqueneanapahi ema Jesú. Mavarahainehi tíjahúchava máimahahini eta jácani tiáramicare. ⁹ Ichapemurihi eta mayaseseresirahi. Émasera ema Jesú, tájina vahi majicapahini. ¹⁰ Natarihipahivare ena tuparairucana. Tétavicavahi eta nasemanevahi eta náepiyaequenehairapahi. ¹¹ Tásiha, ema Herodes énapa ena masuntarurana, ichaperinehi eta náepuruirahi. Tacahe, ema Herodes mavehapa eta mamuirihaini manaquiriaruvaipahi, táepahamequeneripahi eta tajanunumesirainihi. Mamuriachapa ema Jesú. Táicutiarahi eta nacaecahirahi éma. Tásiha, macavanairipivarepa ema Herodes náimichava te mamirahu ema Pilato. ¹² Ema Herodes émapa ema Pilato ticatianacacanainihi eta náitaresirahi. Étasera te jena sáchequenehi tichavapa eta náemunasiracacahi.

Ema Pilato macavanairipipa eta náetatasiraya ema Jesú

(Mt 27.15-26; Mr 15.6-15; Jn 18.39-19.16)

¹³ Tacahe, ema Pilato eta máimairahi náimichavirahi eta mayehe, macurujimurihana ena tuparairucanahi énapa ena achaneana.

¹⁴ Tacahe, máichavacapa:

—Eta iámirapahi ema maca achane te numirahu, ímijachahi mahapapicavaca ena achaneana. Nútisera nímahahi tájina maviurevainahi eta nuyaseseresirahi te emirahu eta ímijachaquenehi eta máejecapiravanahi. ¹⁵ Émaripa ema

Herodes máimichavavare eta ani nuyehe taicha tájinavare máimahahini eta máejecapiravainahini. Étainahipucaini taviuchahini táimicapacahini. **16** Tiúriserapuca nímivanereca macaemecharahi, tásicha, nucaiticapa —máichavacapa.

17 Eta mayeherepi ema Pilato te Páschuamuhuana te áñoana macaiticayarehi ema émana preso te jena sáchequenehi. **18** Tacahe, ena achaneana vahi návarahahini máuchucuhahini ema Jesús. Tipiarcanaapa muraca. Ánipa nacahe:

—Vahi vávaraha máuchucuha ema maca. Émaina máuchucuha ema Barrabás —nacahepa.

19 Ema Barrabás te cárcel mávihahi. Táimicuñaruhi eta máichirahi eta revolución étapa eta macapahivahi. **20** Émasera ema Pilato mavara-haichucha macaiticayarehi ema Jesús. Mayasermurihavarepa. **21** Énasera muracapanapaichucha eta napiarasirahi:

—¡Pémetatareca te crusu! ¡Pémetatareca te crusu! —nacahepa.

22 Mapahequenepa eta mayaseresiravacahi éma:

—¿Tájasica eta maviurevahi ema maca? Núti tájina nímaha maviurevainahi táimicapacahini. Tiúriserapuca nímivanereca macaemecharahi, tásicha, nucaiticapa —máichavacapa.

23 Énasera tímitujiricacanapa eta napiarasiraina nayaseasiraina eta macaetatairaya te crusu. **24** Jéhesaréinehi, ema Pilato masuapavacapa eta nayasearapihi ena tuparairucana. **25** Émapa tiúchucuhahi ema Barrabás ema nayasesereruhi, táimicuñaruhi eta máichirahi eta revolución étapa

eta macapahivahi. Macavanairipipa táitauchava eta navarahaquenehi éna, eta nacapasiraya ema Jesús te crusu.

*Náetatacapa ema Jesús te crusu
(Mt 27.32-44; Mr 15.21-32; Jn 19.17-27)*

26 Tacahe, námapa ema Jesús tayehe eta macaetataiyayarehi. Eta napaisirapahi te calle, nácapajicapa ema achane ticaijare Simón ticavasahi te Cirene. Éma, másihapahí te máesane. Napamicapa máevachacaya manaracuhayarehi eta macurusura ema Jesús, máehicapaipahi te máequene ema Jesús.

27 Ichapemuriana ena achaneana téhicanapahi. Énaripa ena esenana, tipiararecanapaipa eta náiyairapahi taicha eta nacatisamurevahi, náimarasirasirahi eta máejapanuravapahi éma.

28 Máesenimurihana éma. Máichavacapa:

—Vahi ecuiyauchanu, eti esenana tachichanaveanahi eta Jerusalén. Étina íyauchava, náichavenénahi ena echichanaveana. **29** Taicha tatiarihiyare eta sáchevayare nacapacayarevare ena. Ichape eta nacajapanuravairaya eta nacapasiraya. Tásicha ecahénapa: “Tétavicavapa náuriva ena esenana macheruana. Nájina náimipanererecahini”. **30** Tásicha, ena achaneana, eta napisirayare, tijunananainapa te cérroana, tásicha, nacahénapa: “Tiúripanapucaini viyumurucavahini eta te juca cerro.” Ena apamuriana nacahenavarepapuca: “Étapucaini te juca simena viyumurusiavahini”. **31** Apanasica nuti ichapemuri eta nucatajivairahi, tájinahinéni

taviuchanuhini. Navetijiyarecha éta nátajivayare ena echichanaveana* —máichavacapa.

³² Énerichuvare natiarihipahivare ena apinana tiámerahiana macutiqueneanayarehi ema Jesús eta macaetatairayare. ³³ Tacahe, nacaitecapapa tayehe eta masihi nacaetatairare ticaijarehi Calavera. Náetatacapa te crusu ema Jesús, énapa ena apinana tiámerahiana. Ema émana nanacapa te mavaure, ema apana te sapa. ³⁴ Te náetatacapa ema Jesús, macahepa eta máechajiriruvahi:

—Tata, piperdonachavaca ena nani, taicha vahi nácaicutiarahini eta juca náichiranuhi —macahepa.

Tacahe, ena suntaruana nasuertehachapa eta mamuirihaini eta náijarajirisiracacahi. ³⁵ Natiarihihí ena achaneana tímararacanahi tamutu. Énaripa ena tuparairucana natarihihivare. Nacaecahijiricaripa éma. Ánipa nacahe:

—Ema mácacacha, macahehi eta máechajiriruvahi eta maratahairahíji macuchucuhavaca ena apamuriana achaneana. Tásicha puiti, vivaraha vímaha máimereuchava eta máitupajijiasiravahíji, te yátupihipuca Cristo éma, Manerejiruhíji ema Viya —nacahepa.

³⁶ Énerichuvare ena suntaruana nacaecahijiricahivare éma. Navarahapa náesichayarehi eta tasisiru vino. ³⁷ Náichapa éma:

* **23:31** Eta juca mayeherepi proverbio ema Jesús te máechajiriruva, ani tacahe: “Te náichahi eta juca eta náimairahi eta yucuqui vérepacavacaichahahi, téavicavahi eta navarairahi náquipaica te tájiquipa”. Tatarihi eta tacayemaquenehi tayumurevahi.

—Te yátupinapuca piti reyvihi nayehe ena israelita, pítijivaina picuchucuhava —náichapa.

³⁸ Tatarihihivare eta ajureca nanacaquenehi te tachutisi eta macurusura. Eta juca ajureca tacajuquenehi te náechajiriruva te griego, te latín, téhapa hebreo. Ani tacahéhi eta táchajiriruvahi: “Ema maca ema Rey nayehe ena israelitana”.

³⁹ Ema émana tiámerahi macaetataquenehi te machacaya, énerichuvare éma macaecaahihi. Ani macahehi:

—Te yátupinapuca pítiquenehi Cristo, picuchucuhava pítijivaina. Tásicha, picuchucuhavivare víti apana —máichapa.

⁴⁰ Émasera ema apana macaetataquenehi macahepa:

—Váhipuca pipicahini píti ema Viya. Váhipuca péchahi étarichuhi viávacuha víti eta juca vícuñahi.

⁴¹ Víti, vivachachahi eta juca vitapiravahi taicha ichapequenehi eta véjecapiravanahi. Émasera ema maca Jesús, ticatajivahi tájinahinéni taviuchahini.

⁴² Tacahé, máichapa:

—Tata Jesús, péchanupaini te péjacapa tayehe eta piávacureya —máichapa.

⁴³ Ema Jesús majicapapa:

—Numetacavivane, puiti píti nucachaneviyare te paraíso —máichapa.

Eta máepenirahi ema Jesús

(Mt 27.45-56; Mr 15.33-41; Jn 19.28-30)

⁴⁴⁻⁴⁵ Tacahé, te las dócequenepa, témahapa eta sache. Timapicupa tamutu eta apauehe. Mapana hora eta tamapicuirahi. Étarichuhi eta jena máepenirahi éma, tíjahúchavapa tétsayumeca eta

tayehe cortina eta Templo. Ticutimecaca eta taetsayumesirahi. ⁴⁶ Ema Jesús tipiaracapa:

—Tata, pijacapinanu eta náchaneva — macahepa.

Te titapiricapa, tépenapa.

⁴⁷ Tacache, ema nacapitara ena suntaruana romanoana, tipicarinehi eta máimairahi eta júca. Étapa macaicutiarapa, macunachapa ema Jesús, ánipa macahe:

—Yátupiquenéichuyapa ema maca achane matapiravarehi —macahepa.

⁴⁸ Namutu ena achaneana natiahi que-neanahí, eta náimairahi eta júcana, ichaperinehi eta napisirahi. Téhatupachávanapáipa eta nacatisamurévairahi. ⁴⁹ Énasera ena téhicanapahi ema Jesús te másihainapa te Galilea, énapa ena esenana, namutuhi nanecapararecahi eta juca táichavaquenevanahi. Nayererehíhisera eta náimararasirahi.

*Nacucupaicapa te crusu ema Jesús, nádecarapa
(Mt 27.57-61; Mr 15.42-47; Jn 19.38-42)*

⁵⁰⁻⁵¹ Matiarihihivare ema achane ticaijare José. Ticavasahi te Arimatea te Judea. Tipicaurahihi éma. Tétavicavahivare eta máuriva. Masuapahi ema Jesús, eta émairahi ema Cristo mavaneruhi ema Viya, étaripa eta émairahi ema téchayarehi namutu ena achaneana. Ema maca José, náumurivahi ena aquenucarahana, váhisera mapauchavacahini ena machamurianahi tayehe eta juca náichaquenevanahi tamauriquenevanahi. ⁵² Te cáperrehichichapa, eta máimairahi máepeniraipahi ema Jesús, tiyanapa mayehe

ema Pilato, mayaseapanahi eta máquehe ema Jesús, mavarairahi máecarayare.⁵³ Te tichavapa, macucupaicapa eta máquehe tayehe eta crusu. Máguruacapa eta te sávana tijapu. Náiyaracuhapa tayehe eta máecari eta te mari nasecajueruhi. Nájinaichaha nacaecarasihini tayehe.⁵⁴ Titatajianapa taicha cáperehichichaipahi. Taicha vahi táisapacarehini náecararecahini te yati, váhivare te tijarahiacaimahi taicha sávarumuhuyarepa.

⁵⁵ Ena esenana téhicanapahi ema Jesús te másihainapa te Galilea, tiyananapa tayehe eta máecari, náimatiyarehi eta mávihahi.⁵⁶ Te náimatipa, tichavanapa te napena. Natsecpa eta perfume mayajihayarehi. Tinaraçanapasera te jena sáchequenehi, napicauchahí eta tapicauchacarevahi.

24

*Eta maechepusirahi ema Jesús te máecari
(Mt 28.1-10; Mr 16.1-8; Jn 20.1-10)*

¹ Te apanapa sache, te tijarahi chichapa eta lumíncuquenehi, tiyananapa ena esenana tayehe eta máecari. Námapaipa eta perfumeana náicurevanahi, nacachanevacapaipa ena apamuriana esenana. ² Te títecapanapa tayehe eta ecari, náimaharinehi eta ticheyarame mari tajihainihi eta ecari, téquehepuichavaipa. ³ Tisiapanapa éna, náejiacainehi eta máquehe ema Viáquenu Jesús. Májinaripahi. ⁴ Tiáramecanarinehi eta náejiasirahi. Váipa náimatiéquenehahini tájahahipuca eta máichararacavahi. Tásiba,

tiáramicarepa náimahahi ena apinana ajairana titupihanahi te nachacaya. Tijanunucavacahi eta namuirihana. ⁵ Eta náramesirahi éna, tétipaimurihanapa. Énasera ena ajairana náimahaqueneanahi náichapa:

⁶⁻⁷ —Éti ímijachaipapuca manasihi tépenahi ema Jesucristo, Manerejiruhi ema Viya. Májinari, tichavaripahi titareca. Échavarichuhipuca eta macayemaqueneanahi te achancerichaha te manasiquenerichaha te Galilea. Macahehi eta máechajiriruvahi eta nacaratasirayarehi ena tictatianacanahi éma, náetatasirayarehiva te crusu. Téchepucayarehisera te mapanaquenénapa sache —nacahepa ena ajairana.

⁸ Tacalé éna, enurujirinehi náechavane eta máechajiriruvanahi ema Jesús. ⁹⁻¹⁰ Te tichavanapa te napena, nametacapa ena óncequeneana apóstoleana, énapa ena apamuriana nachamurianahi. Te nataracu ena esenana tímahanahi ena ángeleana, sutiarhipahi esu María Magdalena, esu Juana, ésupa esu apanavare María, máenahi ema Jacobo. ¹¹ Énasera ena apóstoleana vahi nasuapahini, náimijachaichucha náepiyahiraivahi namaurishivahi ena esenana.

¹² Tiyanavanepasera ema Pedro tayehe eta ecari. Tijunapapaipahi. Te títecápapa, máimahapa tacarinehi eta sávana. Mapanerequenehainehi eta juca táichararacavahi. Tacalé, tichavavarepa.

*Tímerecavapa ema Jesús nayehe ena apinana máimitureana te táchahu ticaijuhe eta avasarechicha
Emaiús*

(Mr 16.12-13)

13 Étarichu te jena sáchequenehi, tipaicanapahi te achene ena apinana máimitureana ema Jesús. Násihahi éna te Jerusalén nacaijuheyarehi eta avasarechicha Emaús. Once kilometro eta tayere-hivahi. **14** Eta napaisirapahi nacasamurepaipahi eta nasamaiririruhi. Téchajiricavanapaipa. **15** Eta náechajisihairapahi eta juca táichararacavanahí, tiáramicarepa macapayamurihapa ema Jesús, macachanevacapaipa. **16** Énasera vahi náimatihiini, taicha éma vahi másapahini náimati. **17** Tacahe, ema Jesús mayaserecavacapa:

—¿Tájahasica eta juca échajisihapahi eta epaisirapahi? ¿Tájaha eta tímpañererecahepahi? —máichavacapa.

18 Ema émana ticaijarehi Cleofas majicapapa:

—Namutu ena achaneana náechahi eta juca táichararacavahí te Jerusalén puiti juca sácheinahí. ¿Picarichuhipuca píti vahi péchahini eta juca, eta piávihairahi te Jerusalén?

19 Éma máichavarepa:

—¿Tájahasica eta téchacarehi?

Éna náichapa:

—Émara véchajisihapahi eta máichavaquenévahi ema Jesús Nazareno, ema profeta máuriquenehini nayehe ena achaneana. Tamutuinihi tiuri eta máimiturapiana, tétávicavahivare eta máitupajijiasiravahí taicha ema Viya, éma tíjaracahi tamutu. **20** Énasera ena tuparairucana te viávasa, éna tíjararecanahí nayehe ena apavasanana taicha navarahahi náimicapaca. Tásiha, náetatacapa te crusu. **21** Víti ichapemuri eta vicasiñavairainihi eta mayehe. Vicuchapavainihi

eta macatiuchirahaviyarehi vimutu viti israelítana. Tamapurujipasera puiti, taicha tépenapa éma. Puiti mapanaripa sache eta táetávisiravahi eta juca. ²² Icháquenesera te yáticarahichichapa, ticaramecahavianapa ena esenana vichamurianahi eta nayatiruirahi tiyanana tayehe eta máecari. ²³ Vaipa nachimapahini eta máquehe. Májinaipahi. Te tichavanapa, timetacahavianaipa eta náimairahi ena apinana ángelleana. Nametacavacapaji eta machaviraipahi titareca ema Jesús.

²⁴ Tásicha, tiyanavaneanapa ena apamuriana vichamuriana tayehe eta ecari. Jéhesaréinehi májinaipa ema Jesús, étarichuhi eta nacayemaque-neanapahi ena esenana —náichapa.

²⁵⁻²⁶ Ema Jesús máichavacapa:

—Tétavicavapa tájinaira ácaicutiaraquenéna eti páureana. Váhivarepuca ácaicutiarahini eta náechajiriruvanahi ena profetanaini tayehe eta tacaheyarehi eta macatajivairayarehi ema Cristo eta máopeniranumaya, tásicha tichavayarehi titareca. Váhivarepuca ácaicutiarahini eta tacaheyarehi eta mápanirayarehi tichava éma te mávasa anuma —máichavacapa.

²⁷ Tásicha, mametacavacapasera tamutu eta táechajiriruvanahi eta Sagrada Escritura, eta táechajisihairahi éma. Tépanavapa tayehe eta májureanahi ema víyarahaini Moisés; étapa eta apamuriana nájureanahi ena profetanaini.

²⁸ Tíecapananecha tayehe eta avasarechicha nacaijuhequenepahi. Mavarahapa ema Jesús majunijicavacayarehini. ²⁹ Énasera

nacumpirachapa máehicavacahini te napena.
Náichapa:

—Pácaherine eta ani viyehe, taicha yátinapa eta jena —náichapa.

Tásicha, ema Jesús manasipa tisiapapa eta nayehe. ³⁰ Te tiúripa eta tinicacare, mavehapa eta pan, mahasulupayachapa ema Viya, mayuvetucapa, máijaracavacapa éna. ³¹ Enévanerinehi náimativanepa éma. Émasera tíjahúchavapa témitiacahi te namirahu. ³² Tésenijiricacanapa éna. Tásicha, nacahepa:

—¿Tájaha tacayema eta vahi vímativanehini ichaquene te achene te ticapayacahavipa éma? Étapa eta vicachanerapahi, váhivare vímatiacavanehini, véjapusamurechapaipahinéni eta visamiravahi eta máimitusirahavipahi tayehe eta Sagrada Escritura —nacahepa.

³³ Tacahe, enévanepa téquequecavanahí tichavana te Jerusalén. Te títecapanapa, tisiapanapa tayehe eta návihahi ena óncequeneana apóstoleana énapa ena apamuriana nachamuriana. ³⁴ Ánaqui ticametacasianaripavare éna. Nacahevarepa ena apóstoleana:

—Yátupi eta máechepusiraipa ema Viáquenu. Maimahariпа ema Pedro —nacahepa.

³⁵ Ena apinana najicapavarepa:

—Énerichuvare víti vímahaipavare éma, te achene eta vipaisirapahi. Váhisera vímativanehini. Tapaenumava te mayuvetucapa eta pan, vímatipa éma —náichapa.

*Tiápechavavare tímerecava ema Jesús nayehe ena máimitureana
(Mt 28.16-20; Mr 16.14-18; Jn 20.19-23)*

36 Tacahe, téchajiricavanarichaha éna, tíjahú-chavavarepa tímerecava ema Jesús te namuri. Máechajicavacapa, ánipa macahe:

—Íchararacava, nuchichanaveana.

37 Énasera tipicanarichucha, náimijachaichucha cunarehi éma. **38** Émasera ema Jesús máichavacapa:

—Vahi ecupicanu. Étumecha eta esamureana.

39 Ímaha eta juca nuvahuana étapa eta nívapeana. Émamahacanu apesa écha eta nútiquenérahi. Eta cunare, tájina taechená, tájinavare táperaina. Vahi tacutihini eta nuqueherahi núti —máichavacapa.

40 Tacahe, eta máichiravacahi, ticajaru-vauchavaipa eta mavahuana, étapa eta máivapeana. **41** Vuíchahasera nasuapahini éna, tiúrisamureanaripahinéni eta náimairahi, tacachanehisera eta napisirahi. Eta tacahe, máichavarepa:

—¿Jararihi nunica?

42 Éna náijaracapa eta nájimaru jima, étasipa vasu eta mápama. **43** Majacapavacapa éma, tinicapa te namirahu éna. **44** Tásicha, máechajiricavacapa:

—Eta juca níchavaquenevahi, étara eta numetaruhehi cape juca nucachanejiricahéichahahi. Eta tacaheyarehi eta táitauchiravayarehi eta májucha-queneanahi ema víyarahaini Moisés núti taechajisi-haquenehi. Étapa eta nájuchaqueneanahivare ena profetanaini, étapa eta Salmo.

45 Máemechavacaipahi eta táechajiruvana eta Sagrada Escritura. **46** Tásicha, máichavarepa:

—Étara eta juca tacajuqueneanahi eta népenirayarehi nuti Cristo. Néchepucayarehisera tayehe eta nécarí te mapanaquenepa sache. **47** Étayaréichuhivare iámapicayare eta níjare eta ímituresiraya ena achaneana ticavasanahi te tamutu avasareana. Étaripa te juca Jerusalén, emetacavacayare ena achaneana eta náeneuchiravaina apaesa macaepaha ema Viya eta napecaturana. **48** Éti, nutupararuheya eta ímituresiraya eta júcana. **49** Enasiyarechahasera ani te juca Jerusalén. Tiámainucava te máitecapauchahevacula ema Espíritu Santo nuvaneruyare, máijararunuyarehi ema Tata. Éma, tíjaracaheyare eta ítupajijiasiravanayare —máichapa.

*Eta mayapirahi ema Jesús te anuma
(Mr 16.19-20)*

50 Te titapiricapa eta máimitusiravacahi, mámamurihana te tachachacu eta avasare Jerusalén, te tachacayahi eta avasarechicha Betania. Macanuquechapa eta mavahuana, mayujarauchavacula éna. **51** Te titapiricapa eta mayujarauchiravacahi, timutserahavapaipa ticanuquechavapaipa eta mayapirahi te anuma. **52** Eta náimairahi éna eta macanuquechiravapaipa, tépuyumurihanapa eta nanecaparesirahi eta mayanirahi. Tásicha, tichavanapa tayehe eta Jerusalén. Tiúrisamureanapaipa. **53** Tájina vahi náejiacavahini tayehe eta Templo.

San Lucas 24:53

clxxxix

San Lucas 24:53

Tiyujarauchavanaparacahi eta nacunachirahi
ema Viya.

Tamutupa eta juca numetasiravihi puiti.

**Eta Táurinaquene máechajiriruvahi ema Viya eta
viyehe, ticaijare puito Eta Nuevo Testamento
New Testament in Ignaciano (BL:ign:Ignaciano)**

copyright © 2012 Wycliffe Bible Translators, Inc.

Language: Ignaciano

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ignaciano

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

cxi

2014-04-25

PDF generated using Haiola and XeLaTeX on 11 Nov 2022 from source files
dated 29 Jan 2022

332465cd-916c-5bfc-8721-b0114be92360